

प्रेम की पीर
(भोरी सखी कृपा)

ग्रंथकार परिचय

जाके प्रानन सँग प्रेम की पीड़ा आई।
प्रानन ही में रमी कछुक नैनन में छाई।।
पीड़ा ही में प्राणनाथ के दरशन पाये।
जुग जुग के प्यासे नैना छवि देखि सिहाये।।
सहो सराहि सराहि कै, कठिन प्रेम की पीर।
बिक जान्यौ बिनु मोल ही हित भोरी मति धीर।।

श्रीभोलानाथ जी का जन्म वर्तमान मध्य प्रदेश के भेलसा नगर में संवत १६४७के आषाढ़ कृष्ण ६ को हुआ था। भगवत मुदित जी के रसिक अनन्यमाल में गोस्वामी दामोदरवर जी (संवत १६३४-१७२४)के शिष्य जिन रसिकदास जी का चरित्र दिया हुआ है , वे भेलसा के ही रहने वाले थे और आज भी वहां इस सम्प्रदाय के अनेक अनुयायी विद्यमान हैं।

भोलानाथ जी के पिता का नाम छेदालाल जी था। वे सक्सेना कायस्थ थे। इनके एक भाई बैजनाथ जी सब जज हो गए थे और दूसरे शंभूलाल जी वकील थे। भोलानाथ जी को बाल्यकाल से ही भगवत प्राप्ति की धुन थी और किशोर अवस्था में ही वे योग्य गुरु की खोज में घर से निकल पड़े थे। उस समय उनके बड़े भाई बैजनाथ जी कोलारस, जिला शिवपुरी में नाजिर थे। दस बारह दिन की खोज के बाद भोलानाथ जी नरसिंहपुर के जंगलों में भटकते हुए मिले और अपने भाई के पास कोलारस लाये गए। बैजनाथ जी ने उनको कोलारस के गोपालजी के मंदिर के अन्यतम सेवाधिकारी पंडित गोपीलाल जी से श्रीराधावल्लभीय सम्प्रदाय की दीक्षा दिलवा दी। अपने गुरु की आज्ञा से उन्होंने गृहस्थ जीवन व्यतीत करना स्वीकार कर लिया और विवाह करने को सहमत हो गए।

भोलानाथ जी ने प्रारम्भ में, मैट्रिक तक शिक्षा प्राप्त की और फिर बजरंगगढ़ में अध्यापक हो गए। अध्यापन कार्य करते हुए उन्होंने इंटर और बी ए पास किया। इसी काल में उन्होंने अखिल भारतीय रामायण प्रतियोगिता में भाग लेकर मर्यादा पुरुषोत्तम श्रीराम शीर्षक निबंध लिखा और उस पर प्रथम

पुरस्कार प्राप्त किया।

उनकी प्रतिभा से आकृष्ट होकर छतरपुर नरेश राजा विश्वनाथ सिंह जी ने उनको अपने पास बुला लिया और वहां वह कई वर्ष राजा साहिब के धार्मिक परामर्श दाता के रूप में काम करते रहे। अधिकांश समय एकांत भजन और पदरचना और निर्दिष्ट समय पर राजा साहब के पास जाकर धार्मिक चर्चा करना ही उनका कार्य था। राजा विश्वनाथ सिंह प्राचीन ग्रंथों के संग्राहक थे और उन्होंने राधा वल्लभीय ग्रंथों का भी अच्छा संग्रह अपने पास कर लिया था। भोलानाथ जी को छतरपुर में रहते हुए अध्ययन का बड़ा संयोग मिला और उन्होंने उस काल में वाणियों के साथ विभिन्न भारतीय दर्शनों का भी विस्तृत अनुशीलन कर लिया। वहां रहते हुए ही उन्होंने वकालत पढ़ी और कुछ दिन बाद राज्य की नोकरी छोड़कर भेलसा चले गए।

भेलसा में कुछ दिन वकालत करने के बाद वे कोलारस गए और अपने भाई के पास रहकर वकालत करनी चाही। किंतु उनका मन नहीं लगा और राजा साहब के निमंत्रण पर पुनः छतरपुर चले गए। इस बीच उनके पुत्र और पत्नी का देहांत हो गया और थोड़े दिन बाद उनके पिता जी भी चल बसे। अब

उनका कोई भी ग्रहस्थिक बन्धन शेष नहीं रह गया और वे वृन्दावन आकर स्थायी रूप से निवास करने लगे।

वृन्दावन में कुछ दिन तक तो इनके भाई शम्भूनाथ जी इनको खर्च भेजते रहे किंतु अल्पकाल में भाई का भी देहांत हो गया और उनसे प्राप्त होने वाली आर्थिक सहायता भी बन्द हो गई। इस स्थिति में पड़कर कुछ दिनों तक भोलानाथ जी ने सेवाकुंज के बंदरों द्वारा छोड़ी हुई चने की ठुड़ीयाँ चबाकर जीवन यापन किया और शांति पूर्वक भजन करते रहे। बाद में श्रीराधावल्लभ जी के मन्दिर में उनके रहने और भोजन का प्रबंध हो गया और यहीं उन्होंने ४२ वर्ष की अल्पायु में आषाढ़ शुक्ला ६, संवत् १६५९को निकुंज गमन किया ।

हम कह चुके हैं कि भोलानाथ जी वृन्दावन आने से पूर्व भी पद रचना करते थे और उनके उस काल के लगभग ६०० पद लेखक को कोलारस से प्राप्त हुए हैं। इनमें से अधिकांश पद विनय के हैं और इनमें एक सच्चे भक्त हृदय की महान आकुलता भरी हुई है। वृन्दावन निवास काल के पद अधिक प्रौढ़ और शांत हैं। किंतु प्रेम की नैसर्गिक पीड़ा उनमें भी व्यक्त हुई है। राधावल्लभीय सम्प्रदाय में नित्य संयोग की उपासना है

किंतु उसके साथ पूर्ण अतृप्ति भी विद्यमान रहती है। भोलानाथ जी के पदों में यह अतृप्ति उभरकर आयी है और इसी ने उनके पदों में गहरी पीड़ा की छाया डाल दी है।

पद रचना के अतिरिक्त भोलानाथ जी ने वृन्दावन में दो बड़े ग्रंथों की भी रचना की जिनमें एक सुधर्म बोधिनी की विपुल टीका है और दूसरा ब्रह्म सूत्र पर हिंदी में भाष्य है।

श्री गुरु वन्दना

रस घन गुरु पादाः व्यास पुत्रस्तथैव,
जयति रसिक नाथो राधिका वल्लभश्रय।
वन हिम कर मुख्यो नाद बिंदु स्वरूपः
रसिक नृपति वंशो में गतिः सर्वदास्तु॥

॥दोहा॥

मेरे जीवन प्राण धन , श्री गुरु चरण सरोज।
ध्यान धरत प्रगटत हृदय, दम्पति केलि मनोज।।१।।
गुरु पद नख की चाँदनी, मेटत भव अंधियार।
कोटि कोटि चिन्तामणी, जिन पर डारौं वार ।।२।।
भली -भली सब लेत हैं , वस्तु परखि कै ठीक।
खोटे दास अनाथ के, तुम ही गाहक नीक।।३।।
श्री राधा जानूँ नहीं , नहिं जानूँ घनश्याम।
तव पद पंकज बिन कहूँ, मोहि न सूझत ठाम।।४।।
श्रीजी सन्मुख कहत जे, विनय गीत प्रति द्यौस ।
तेई इत संग्रह करौं , करुणा कोर भरोस ।।५।।
श्री गुरु गोपीलाल मम, श्री गोवर्धन लाल।
इष्ट देव हरिवंश हित, पोच पतित प्रतिपाल।।६।।

(७)

श्री गुरु चरण रेणु बलि जाऊँ।
श्रीहित रूप प्रकट गोवर्धन लाल, चरण युग पंकज ध्याऊँ।
तुमसों मोहि मचलिबौ अब तौ , ज्यौ त्यों श्री हित दर्शन पाऊँ ।।

भरि भरि नयन माधुरी पी-पी , मत्त मुदित बलिहारी जाऊँ।
भोरी हित कृपाल करुणा निधि , तुम बिन और न दूजी ठाऊँ।।

(८)

श्री गुरु चरण रेणु चित लाऊँ।

श्री हित गोपीलाल कृपा कर, बार -बार बलि जाऊँ।।
पामर पोच पतित अति दुखिया, तुम्हरौ तदपि कहाऊँ।
कबहुँ चरण कमल की महिमा , निरखि निरखि सचु पाऊँ।।

श्री हरिवंश कृपालु दरस कौ, बार -बार ललचाऊँ।
कौन भांति भरि नयन देखि कै, दुर्बल बांह गहाऊँ।।
तुम्हरौ बल हियरा में मेरे , तुम्हें पुकारि सुनाऊँ।
भोरी हित जग विदित रावरौ, पोच निवाहन पाऊँ।।

श्रीहित हरिवंश वन्दना

(६)

जय जय श्री हरिवंश गुसाईं।

जय मोहन कर कमल युगल पर, वेणु रूप श्रुति गाईं।।

जय-जय लीला ललित मनोहर, मानस राज मराला।
जय सुख सागर रूप उजागर, कारण रहित कृपाला।।
आरति हरण शरण सुख दायक, करुणा सिन्धु दयाला।
जय-जय-अधम उधारण रसनिधि, रसिक सभा प्रतिपाला।।
जय शरणागत वत्सल हित वपु, रहसि केलि विस्तारी।
माया मानुष रूप मनोहर, हरण मोह भृम भारी।।
अशरण शरण सहज करुणानिधि, राधा चरण उपासी।
राधा प्राण देह तन सरबस, कुंज केलि सुख रासी।।
जद्यपि मोहन अधर सुधा रस , पान करत सुख पाई।
तद्यपि राधा नाम रटत नित, गुप्त रीति प्रगटाई।।
महिमा अमित कहा मुख वरणौ , शारद पार न पावै।
हौं तो चरण शरण करुणानिधि , तासौं कछु कहि आवै।।
यह जानत हौं अवसि कृपा करि, कबहूँ पार लगै हौ।
यह माँगत दै दरशन कबहुँक , हँसि-हँसि जूठन दैहौ।।
तब जो करो भली सो सबही, अब तौ यह मन भावै।
भोरी जूठन खाइ उदर भरि , बैठि विमल गुन गावै।।

(१०)

और न राधा , श्याम न दूजे।

सब विधि दोउ प्रसन्न करुणानिधि, श्रीहरिवंश चरण रज पूजे।।
प्रीति रीति बिनु व्याकुल भोरी, ठौर ठीक नहिं अब कहुं सूझे ।
व्यास सुवन बिनु को अस दुजौ, जो अब पीर हिये की बूझे।।

(११)

का जानों कब भाग जागि है।

श्री हरिवंश चरण रज उर धरि, जुगल रूप रस पागि है।
रसिकन सों नित मिलबौ-जुलबौ , विमुख संग हठ त्याग है।।
बढ़ि है नित उर मिलन चटपटी , चरण कमल अनुरागि है।
भोरी रसिक कृपा सों कबहुँ, प्रीति अनोखी लागि है।।

(१२)

ऐसी तुमहिं कि बूझिये हरिवंश कृपाला।
हौं तो लगी चरण से, उर आस विशाला।।
अवलम्ब इक तिहारौ , कोऊ न और मेरौ।
पुण्य नहीं गांठ कछू , पाप तौ घनेरौ ।।

जो कछु अब होइ - होइ , हौं न कछू मांगौ।
ऐसौ मन मेरौ करौ , चरणन अनुरागौ ॥
रिपु सम सब लगै जगत, पंकज पग प्यारे।
दिन तौ कटै गुणन गनत , रात गिनत तारे॥
जुगल मिलन चटपटी, उर में अधिकावै ।
असन बसन जगत्प्रीति , नेक ना सुहावै॥
सहज कृपा सिंधु बेगि, मेटहु भव भारी।
भोरी हिय प्रेम देहु, चरणन बलिहारी॥

(१३)

क्यों न द्रवहु हरिवंश कृपाला।
बहुत बेर भई करत बीनती, आरत हरण दयाला॥
हौं तौ दामन लगी तिहारे, सुनहु अधम प्रतिपाला।
भोरी बलि अब बेर न कीजिय , तन मन होत विहाला॥

(१४)

व्यास कुँवर हँसि कहौ लाडिले, यह कैसे बनि आवै।

शिव सनकादिक विष्णु ब्रह्मादिक , जेहि पद रज सिर लावै।।

सो मोहन जेहि मुख रस बतियाँ, सुनिवे नित ललचावै।

किस विधि सो कृपालु अलबेली, हँसि मोसों बतरावै ।।

पापी अधम पतित अति खोटी, तौहू धीर न आवै।

भोरी की यह भोरी आसा, तुम बिन कौन पुजावै ।।

(१५)

उमड़त रस पयोधि अँखियन में।

श्रीहित सखी कृपाल सुनों अब, तुम तौ श्रेष्ठ सभी सखियन में।।

सब पर सहज कृपा रस बरसत , कृपा सुदृष्टि कनखियन में।

क्यों न पुकार सुनों , रस प्यासी भोरी टेर रही दुखियन में।।

(१६)

श्री हरिवंश कृपा बलि कीजै।

निज सरबस भरि नयन दिखावहु, मो सरबस सब लीजै।।

ऐसो मो हिय करहु कृपानिधि, छिन छिन उमगि पसीजै।

बिनु देखे पल धीर न आवै, विरह ताप तन छीजै।।

लोचन छके रहैं वा मुख पै, हियौ रंग सों भीजै।

बिनु हित बढन न और सुहावै, नित नव माधुरि पीजै।।
तुम बिनु कछु न सुनै नहिं देखै, देख-देख छवि जीजै।
भोरी दीन दुखारी याचक, रीझ दान यह दीजै।।

(१७)

श्री हरिवंश चरन चित धरि हौं।

तुम्हरे बल कृपाल करुणा निधि, सब ही शंक बिसरि हौं।
कबहुँ भाग जगै हौ ऐसे, उमगत पाँव पकरि हौं।।
मत्त मुदित डोलत रस छाकी, सब की लाज निदरि हौं।
भोरी हित बल चरण कमल के, गरजत-गरजत मरि हौं।।

(१८)

ऐसी हौंस बढत उर माहीं।

हित हरिवंश कृपालु कृपानिधि , कबहुँ गहौ हौंसि बाहीं।।
जदपि पोच पतित शठ मोसौं, दूजौ त्रिभुवन नाहीं।
गरजत तदपि फिरौंगी निर्भय, पग पंकज की छाहीं।।
त्रिभुवन वैभव तृनलौं गनिहौं ,शिव अज भाग सराहीं।
भोरी हित पद कंज गहे बिनु, जीवन जनम वृथाहीं।।

(१६)

हौं हरिवंश के द्वार डरी।

काहू के न उठाये उठि हौं, इन सौं मचल परी।।

कोटि जन्म लागि रगर कृपानिधि, हौं हठ करि जु अरी।

बनिहै जो पै बनैहौ तुम ही, बात नतर बिगरी।।

काहू सौं नहिं काज कछू अब, हौं जु भई तुम्हरी।

भोरी हित रस प्यासी याचक, विलपत द्वार खरी।।

श्री राधावल्लभ लाल

(२०)

श्री राधावल्लभ रंग भरे लाल।

कबहूँ मोहि कृपा करि हेरौ , चरण शरण प्रतिपाल।।

कबहूँ हरौ हृदय कठिनाई, कोमल चित्त कृपाल।

ऐसी प्रीति हिये में दीजै, जरहुँ विरह की ज्वाल।।

त्रिभुवन विदित किशोर- किशोरी , परम उदार दयाल।

भोरी हृदय प्रीति हँसि दीजै, विलपत द्वार विहाल।।

(२१)

जय जय राधावल्लभ रसिक रसीले।
कोटि मदन-मन-मथन मनोहर ,राका कोटि चन्द्र शरमीले।।
करुणा धाम किशोर कृपानिधि, रसिक शिरोमणि रंग रँगीले।
युगल एक वपु दुगुणित शोभा, कृपा अपार छबीले।।
हित हरिवंश लाड़िले प्यारे, दीन जनन के दिल दरदीले।
भोरी ओर कृपा करि हेरौ , चरण शरण की लाज लजीले।।

(२२)

मेघ श्याम मुकुन्द कृपाला।
मधुर मधुर आनन्द मूर्ति तुम,छवि निधि रूप रसाला।
गाढी प्रीति हिये में दीजै, करुणा सिंधु दयाला।।
प्रिय पद दरश चटपटी लागै, बाढ़े विरह विशाला।
भोरी श्री हरिवंश वचन बल, याचत तोहि गुपाला।।

(२३)

कोमल चित मन मोहन , कबहू मेरी सुरति करैहौ ।

सहज कृपाल दयानिधि प्यारे, जब जब अवसर पैहौ।
सहज द्रवन की बान सदा ही, दिल दरदीले कहैहौ ॥
आरत हरण दीन दुखिया की, विनय सुनत चित लैहौ ।
भोरी बलि-बलि जाइ चरण पै, सोयो भाग जगैहौ ॥

(२४)

सुन्दर मोहन रसिक रसीले।

अखिल लोक चूड़ामणि प्यारे, कोटि कलानिधि बदन छबीले ॥

ब्रह्मा विष्णु शंभु सनकादिक, महिमा रहे बिचार बिचारी।

तुम्हरे वेद पुराण शास्त्र सब, गुनगन गिनत न पावत पारी ॥

परब्रह्म परमारथ प्यारे, मुरलीधर कृपाल रसदानी।

अधम उधारण रसिक शिरोमणि , पीताम्बर ओढे चटकीलौ।

नीलाम्बुद सुन्दर तन प्यारे, चंचल चितवन चारु हँसीलौ ॥

भोरी भाल कु अंक मिटावौ, प्रणत पाल दिल के दरदीले।

नव -नव नेह प्रिया पद दीजै, चतुर मुकुट मणि रंग रँगिले ॥

(२५)

श्री हरिवंश किशोर तिहारे नयन कृपा रस बरसै ।

जिहि दिस छिन करि कृपा विलोकौ , हृदय प्रेम रस सरसै।।

कारण रहित कृपा पतितन पै, हिये माधुरी दरसै ।।

कारण रहित कृपा पतितन पै, हिये माधुरी दरसै।

कठिन अभाग कौन विधि कहिये , भोरी अब लग तरसै।।

(२६)

श्री हरिवंश किशोर लाड़ले तुम सौं भाँवर पारी।

तुम्हरे संग कटी सब जग ते सब विधि भई तिहारी।।

अब तौ काज न कछु काहू सौं लोक-लीक सौं न्यारी।

त्रिभुवन चरण कमल पर वारैं कोटि प्राण बलिहारी।।

तुम बिनु को मम आस पुजावै कहिहौ काहि पुकारी।

जो रुचि होइ करौ करुणानिधि मैं मुख कहौं कहारी।।

पोच प्राण की भेंट चढ़ावत, लाज लगत अति भारी।

दृग भरि रूप माधुरी पीवों माँगत गोद पसारी।।

नातर गाढ़ी पीर विरह की , मिलन चटपटी भारी।

बन -बन देहु भटकिबौ भोरी, टेरत नाम सदारी।।

(२७)

हित हरिवंश किशोर लाडिले , तुम्हरे द्वार अरी।
टारे टरत न बरजौ मानत, तुम सौं मचल परी।
कब की रूप माधुरी प्यासी, टेरत द्वार खरी।।
लै लै नाम विनय बहु भाखी , भनक न कान परी।
अब तौ ठान लई वरु जन्मन, बिनती करहुँ ररी।।
तुम सौं रगर जन्म कोटिन लागि, आस एक तुम्हरी।
जो कछु होइ सु होइ कृपानिधि, रहि हों द्वार डरी।।
तुम पर मोहि फ़कीरिन हौनौ, टेक यही हमरी।
भोरी श्री हरिवंश स्वामिनी, कृपा पियूष भरी।।

कबहुँ मोहि उमगि अपनैहौ।

हित हरिवंश किशोर लाडिले कब ढिंग टेर बुलैहौ ।
सजल पौँछि दृग बाँह पकरि कै मन्द मन्द मुसिकैहौ ।।
पूछत कुशल कृपाल लाडिले हिय को शूल मिटैहौ।
रँग भरौ रूप दिखे हौ नित-नित अँखियन माहि समैहौ।।

दैहौ बास पावँ पंकज में लोचन कोर चितेहौ।
भोरी हित अति दीन दुखी की कब बिनती चित लैहौ॥

(२९)

व्याकुल मन कबहूँ समझावौ।
हित हरिवंश किशोर कृपानिधि, सपने दरस दिखावौ ।
धीरज देहु अधीर दुखी कौं, सब ही शंक मिटावौ॥
नातौ सत्य करौ अपने मुख, चरणन सुवस बसावौ।
भोरी दीन दुखी याचक की, अब विनती चित लावौ॥

(३०)

तुम्हरौ बल हिय मेरे रँगीले।
मो सम पतित पोच नहिं कोऊ, तुम जैसे न बसीले।
मो सम दीन दुखारी को है, तुम सम दिल दरदीले॥
मो सम निलज न तुम सम प्यारे, निज जन लाज लजीले।
भोरी हित शरणागत वत्सल, प्रिय पद रसिक रसीले॥

(३१)

श्री हरिवंश किशोर लाडिले, बिनती कबहुँ विचारौगे।
दीन दुखी भुज गहन कृपानिधि , कोमल बाँह पसारौगे।।
निज मुख सत्य करौगे नातौ, सूल हिय की टारौगे।
सब विधि पामर नीच निबल अति , पोच पतित प्रतिपारौगे।।
उमगत सहज कृपा कौ सागर, लै-लै नाम पुकारौगे।।
भोरी विलपत द्वार दुखी तन, करुणा कोर निहारौगे।।

श्री प्रिया वन्दना

(३२)

लटकि रहै मन लटकी लट सों।
रंग भरौ छिन अनत न जावै, रंग भरे जमुना तट सों।।
मान करत रँग भरी वधूटी, रंग भरे नागर नट सों।
पिय कर जोर निहोरत भोरी, छवै-छवै चरण मुकट सों।।

(३३)

महिमा अमित कही न परै।

शिव अज पद रज चाहत जाकी, सो तेरे पावँ परै।
एक सबल सर्वोपरि प्यारी, श्रुति नित सुयस ररै।।
कोटि पतित पल-पल निस्तारत, सब भव ताप हरै।
भोरी सठ की सब बनि आवै, जो छिन चित्त धरै।।

(३४)

जयति नव नागरी , रूप छवि आगरी।
कृपा चितवन भरी, नेह जल निधि हिलौरै।।
जयति करुणा भरी, सहज सोभा भरी।
मन्द मुसिकान में श्याम कौ चित्त चोरै।।
जयति चन्द्राननी, सुधा- सारा धनी।
माधुरी नित नई बरसि तिहुँ लोक बोरै।।
जयति जग वन्दनी, हास मृदु चंदनी।
जीति आधीन किये, श्याम नैना चकोरै।।
जयति हित स्वामिनी, श्याम घन दामिनी।
भोरी द्वारे खरी, याचती नैन कोरै।।

(३५)

बिंधे विलोचन चोर किशोरी,
मोहन चन्द्र चकोर किशोरी।
बरबस विवस किये मन मोहन,
नेक निरखि मुख मोरि किसोरी।
त्रिभुवन मोहन मन अलि राखे,
कनक कमल कुच कोर किशोरी।
पिय दृग चपल जुगल खग खंजन,
बांधे अलकन डोर किशोरी।
जय-जय नवल नागरी राधा,
बरसत प्रेम अथोर किशोरी।
लाज लगत निज ओर निहारे,
कस देखहुँ तब ओर किशोरी।
देखहु मन की उमंगे मेरी,
कैसी बढ़त बर जोर किशोरी।

तोहि तजि मैं निज ओर न देखौं,
तुम तौ लखौ मम ओर किशोरी।
मो हिय तप्त कीजिये सीतल,
नेक सींच दृग कोर किशोरी।
मन कुरंग बन विषय भुलानौ,
दीजिय तेहि रंग बोर किशोरी।
मन मेरो बाँधि राखिये लट सों,
विषय डोर सों छोर किशोरी।
जानी दृग कृपाल उमड़ेंगे,
बाढ़त कृपा हिलोर किशोरी।
भरि दृग देखि वारि कब डारौं,
कोटि प्राण तृण तोरि किशोरी।
ठरिहौ बान आपनी कबहूँ,
करिहौ भावती मोर किशोरी।
तेरे चरण कमल सों लागी,
हौंसैं भोरी करोर किशोरी।

प्रिया स्वभाव

(३६)

नवल वयस योवन मतवारी।

ब्रज नव तरुणि कदंव नागरी, कृपा सिंधु सुकुमारी।

रूप रुचिर अङ्ग अङ्ग माधुरी, कोक कलानिधि प्यारी।।

छिन छिन कुशल सुधंग अङ्ग में, पोच पतित अधिकारी।

मत्त करिनि गति ढरत किशोरी, अङ्ग अङ्ग छवि न्यारी।।

काहू भलै जानि नहिं पाई, श्रीहित कृपा बिना री।

भोरी हित जन्मन की याचक, ललकत गोद पसारी।।

(३७)

पतित पावनी प्यारी हमारी।

जब सुभाव हिय समझत तेरौ, हर्ष होत अति भारी।।

पतित शिरोमणि मैं अघ खानी, तजत सुभाव न जैसे।

त्रिभुवन विदित कृपालु स्वामिनी , आपुन तजिय कि तैसे।।

हौं चलि हौं हठ पंथ नरक की, बरबस आइ बचैहौ।

करि हौं पातक पुंज कोटि विधि, सकल मेटि मुसिकैहौ॥

विषय पंक मोहि मग्न देखि कै, लैहौ दौरि उबारी।

सहज कृपालु बान पर भोरी, बार बार बलिहारी॥

(३८)

सर्वोपरि म्हारी महारानी।

जीत लियौ घनश्याम लाडलौ, स्ववस एक रस दानी॥

ललितादिक संग सखी सहचरी, वृन्दावन रज धानी।

ब्रह्मा विष्णु शंभु सनकादिक , महिमा नैकु न जानी॥

वेद पुराण सबै पचि हारे, श्री हरिवंश बखानी।

भोरी ओर कृपा करि हेरौ , अलबेली ठकुरानी॥

(३९)

दिल दरदीली भानु दुलारी।

कोमल चित्त सहज करुणानिधि , पोच निबाहन हारी॥

जब जब सुमिरत मृदुल सुभाऊ, हर्ष होत हिय भारी।

कहा भयौ तजि शास्त्र वेद पथ, लोक रीति हठ टारी॥

कहा भयौ जो सन्त जनन की , आयसु सीस न धारी।
कहा भयौ नहिं भजन कियो जो, खोई आयु वृथा री।।
कहा भयौ जम नरक द्वार पै, देखत बाट हमारी।
कौन की शंक परी जो सिर , समरथ राखन हारी।।
गरव गहेली अति अल्बेलौ , अखिल लोक -पति प्यारी।
भोरी तो बल गिनत न काहू, सोवत पावँ पसारी।।

(४०)

तेरी नेह निबाह की बान सुहाई।
छलिया ढीठ महारस लंपट, कपटी चोर कन्हाई।।
तासों प्रीति की रीति निबाहत, नित नव नेह सदाई।
यही कृपा के भरोसे भोरी, चरण शरण चलि आई।।
युक्ति वचन सों विनती ठानी, ऊँचे टेर सुनाई।
सो सुनि चितै लाल के मुख तन, श्यामा मृदु मुसिकाई।।

(४१)

करुणाधाम कृपालु किशोरी।
अधम उधारण पतित पावनी, कोमल चित नव गोरी।।

आरत हरण दयालु दयानिधि , दृष्टि कृपा रस बोरी।
सहज कृपालु दोष भय भंजन, बेगि लखौ दृग कोरी।।
शरणागत प्रति पाल लाड़िली, सदा सुखद सबको री।
भोरी भाग्य हीन पर तौहू, नहीं निठुरता थोरी।।

(४२)

कोमल चित्त लाड़िली प्यारी।
कपटी कुटिल सबै अपनावत, सहजहि भुजा पसारी।।
गनत न अवगुण कोटि दयानिधि, कृपा सिंधु सुकुमारी।
पातक पुंज कोटि जन्मन के, मेटत नेक निहारी।।
सहज कृपा की बान सुहाई, सबकौ सुखद सदारी।
प्रीति रीति जानत दरदीली , अधम निबाहन हारी।।
तेहि दै पीठ विषय में दीन्हे, तकत धाम धन नारी।
भोरी सठ उपजाइ जननि जड़,लाजत मरत बिचारी।।

(४३)

जानत प्रीति की रीति किशोरी।
कोमल चित कृपालु करुणा निधि , सदय हृदय ब्रज गोरी।।

ताकौ त्यागि विषय मन दीन्हौ, जीवन यों ही गयौ री।
कोटिक भाँति कुकर्म कमाये, छिन नहिं नाम जपयौ री।।
भोरी धृग-धृग वृथा मातु कौ, तव तारुण्य हरयौ री।

(४४)

रूप भरी रँग भरी रँगिली।

रसभरी गुणभरी भरी दया सौं, सुखभरी छविसौं भरी सरमीली।
भरी भाग अनुराग सुहागिन, कोमलता सौं भरी रसीली।।
गरव भरी वात्सल्य भरी री, नेह भरी जन दिल दरदीली।
भोरी आरत टेर पुकारत, चरण शरण की लाज लजीली।।

(४५)

कब मेरी सुधि करि हौ वृषभानु लड़ैती राधा।
कोमल चित्त किशोरी प्यारी, करुणा सिंधु अगाधा।।
अधम उधारणि पतित पावनी, हरन सकल भव बाधा।
धर्म कर्म तजि कोटि पाप किय, साधन कछू न साधा।।
टेर सुनत ऐसेहु पतितन की, विरमत नहिं पल आधा।
भोरी अब सब भाँति भरोसौ, चरण कमल सौं बांधा।।

(४६)

कोमल चित्त स्वामिनी प्यारी।

कोमल चित्त सहचरी आली , जे सँग रहत सदारी।।

कोमल चित्त कृपालु लाड़िलौ, मोहन गिरवर धारी।

कोमल चित्त श्री कीरति रानी, श्री वृषभान बबा री।।

श्री हरिवंश सबहिं में कोमल, जस गावत श्रुति चारी।

कोमल चित सब सिखवन हारे, कोमल चित सुकुंवारी।।

तौहू इती निठुरता मोपै, यह इक अचरज भारी।

कठिन अभाग्य मिटत नहिं भोरी, टेर-टेर कै हारी।।

(४७)

कृपा सिंधु दृग लेत हिलोर।

ऐसी कृपा करहु नित यह तनु, जरै विरह सौं मोर।।

विरह विकल जब प्राण चलैं हठ, तन सौ नातौ तोर।

सहज कृपालु उमगि चलि आवौ, बरषत कृपा अथोर।।

सब तन ताप हरहु हँसि राखौ, सुधा माधुरी बोर।

मुख मयंक मृदु हास चाँदनी, मम दृग करहु चकोर।।

प्रेम मगन अटकी वा छबि पै, लखौ न काहू ओर।
भोरी दीन द्वार पै ठाड़ी, याचत लोचन कोर।।

(४८)

प्यारी मैं तो तिहारी दासी,
तरसत अजहुँ दरस की प्यासी।
बार-बार लोचन अकुलावैं,
मन अधीर नहिं धीरज आवै।
अब तौ देहु कृपालु किशोरी,
सहज कृपा कर कुंज ख्वासी।
निशि दिन बदन सरोज निहारौं,
सहज रूप पर तन मन वारौं।
सपनेहुँ और न देखहुँ कोऊ,
चरण सरोज अनन्य उपासी।
नैन दरस सुख निशि दिन लूटै,
सहज प्रीति कौ तार न टूटे।
कौन की संक कीजिये भोरी,

सिर पर अलबेली राधा सी।

(४९)

सकुचत कहत कहावत दासी।

कहँ मैं अधम नीच अति पामर, कहँ तुम नवल निकुंज
निवासी।।

निज कारण देखौं जग माहीं, नित सब करत रावरी हाँसी।

याही सोच जरत निज छाती, व्यापी रहत हृदय चिन्ता सी।।

भूषण भार असन विष लागत, सुखद सेज जनु जरत चिता सी।

भोरी दुख सब हरहु कृपानिधि, करि पद कंज अनन्य उपासी।।

श्री प्रिया-चरण कमल

सजल जलज सुन्दर प्यारी पद नीके,

साधन और लगत अति फ़ीके।

सीतल मकरंद भरे सुख रस भीने,

श्याम मधुप जिन रस बस कीन्हे।

सुन्दर श्याम प्यारौ दावानल पीकै,

जियत आसरे मनु इनहीं के।
प्रेम विवस निसि दिन इनहि हिय लावै,
नाग राज विष ताप मिटावै।
चूमि-चूमि इनकों इनके रस पाग्यौ,
तुरत पूतना विष सब भाग्यौ।
जब घुमड़ि मैन सैन बाँकी आवै,
तब मोहन शरण यहाँ पावै।
सुर तरु पतितन के अधमन उद्धारण,
मो अभाग्य मिटबे के कारण।
सरबस श्री हरि के दाता सब केरे,
आशा धन जीवन गति मेरे।
इतनौ नित टेर-टेर माँगै भोरी,
राखिये मोहि चरण रस बोरी।

(५१)

कौन भाग्य पद पंकज पावौं।

सजल जलज मृदु सुन्दर शीतल, उर धरि ताप बुझावौं।।

मृदु सहराय लाय हिय राखौं, हुलरावौं दुलरावौं।
दृग चकोर नख चंद महा छबि, माधुरी पान करावौं।।
दृग भरि-भरि अवलोकत निशिदिन, देह गेह बिसरावौं।
छोड़ौं बहुरि न कबहूँ भोरी, दृढ़ गहि हृदय बसावौं।।

(५२)

बड़े भाग्य पग पंकज पेखौं।
मुक्ति भुक्ति सुख-दुख सम लागैं, आपनि और न देखौं।।
डोलत मस्त दिवानी बन -बन, डगर-बगर नहिं पेखौं।
तन मन पल-पल वारैं भोरी, नित नव जोवन लेखौं।।

(५३)

जीवन सफल कमल पग पेखे।
कौन काज श्रुति मारग संजम, साधन बहुत परेखे।।
संपति भोग मुक्ति स्वर्गादिक, करि विचार सब देखे।
भोरी बिनु पद कंज छटा के, सपनेहु सुखद न लेखे।।

(५४)

चरण कमल पर तन मन वारौं।

कोटि कल्प लागि छिन न बिसारौं, जो भरि नयन निहारौं॥

दृढ़ लै हिये बसावौं निसि दिन, मन की उमंग निकारौं।

भोरी छिन इक दरसन आसा, कोटि प्राण तजि डारौं॥

(५५)

अधम उधारण पद रज प्यारी।

त्यौं पद कंज, चंद नख तैसे, त्यौ नख चन्द छटा री॥

मृदु मुसिकान मनोहर चितवन, अङ्ग अङ्ग द्युति न्यारी।

कोटि पतित पल पार लगावत, राधा नाम सदारी॥

जेते पतित उधारन सिर पर, गिनत गिनत हठ हारी।

भोरी जो अब भाव निधि डूबै, तौ इक अचरज भारी॥

(५६)

सो पद कमल छटा मन भावै।

जेहि पद कंज महावर दैवे, मोहन नित ललचावै॥

जेहि पद कंज हिये धर गोपी, रसिक प्राण पति पाये।

जे पद कोमल कमल मनोहर, रहत रसिक चितलाये॥

जे पद मोहन प्राण जीवन धन,चांपत नित हिय लाई।
जे पद धरि -धरि मुकट लाड़िले, मानिनि मान मनाई।।
जिन पद रज ब्रह्मादिक जांचत, बड़े भाग जो पावैं।
जिन पद नख की विमल चाँदनी, हिय कौ तिमिर नसावैं।
जे पद कमल रास में प्यारी, नव-नव गति प्रगटावैं।
जिन पद लोभ रसिक जग-सम्पति, श्रुति पथ चित्त न लावैं ।।
जे पद पंकज हिये धरि प्यारौ,मनमथ ताप निवारैं।
सेवत नित हरिवंश चरण जे, सुभग सिंगार सिंगारैं ।।
ते पद नूपुर-क्लरव संयुक्त, जीवन धन नित मेरे।
भोरी जो छिन एक दिखावों, वारैं प्रान घनेरे।।

(५७)

कोटिक प्राण चरण पर वारैं।
कैसे हैं सो चरण लाड़िली, सपने नेक निहारैं।
त्रिभुवन सोभा धाम लाड़िले, जेहि नित हिये लगावैं।
कैसे सीतल सजल जलज सो, तेरे चरण सुहावैं।।

श्रीहरिवंश स्व सरबस भाखयौ, अधिक प्राण ते प्यारे।
पिय दृग अटक रहे जँह प्यारी, सो शुभ चरण तिहारे।।
शिव श्रीहरि अज पद रज चाही, गोपिन सिर पर धारे।
कैसे सरस् चरण सो प्यारी, नित रस बरसत हारे।।
श्रवनन सुनत लगत अति प्यारे देखन दृग ललचावै।
भोरी कृपा करहु अलबेली, बार-बार बलि जावै।।

श्री प्रिया कर कमल

तेहि कर छाँह राखिवै प्यारी।

जेहि कर पिय कर पेलहु मानिनि, मान भरी सुकुमारी।।

जेहि कर लिये रंग पिचकारी, रँग भरी खेलत होरी।

जेहि कर कमल लाल की प्यारी, हँसत मुरलिया चोरी।।

गिरत नागरी दास जौन कर, रोक लिये रँग भीने।

जेहि कर, कर गहि रस बस मोहन खेंचि भुजा भर लीन्हे।।

जेहि कर कमल कृपा कर बाँधत, पिय सिर मुकुट संभारी।

जेहि कर कंज धरत अंसन पै, पुलकत कुञ्ज बिहारी।।

जेहि कर कमल करत जल केली, जल कन अधिक उड़ावै।
जेहि कर कमल फेरि करुणानिधि, निज गुन शुकन पढ़ावै।।
जेहि कर बैठि जुगल कुच पिय कौं, रस बस चित्र बनावैं।
तेहि कर मोहि कृपालु किशोरी, बांह पकरि अपनावैं।।
बार-बार हठ बिनती ठानों , विलग भये दुख पावों।
भोरी बेगि कृपा अब कीजै, चरण कमल बलि जावों।।

(५६)

जलज -दाम सुन्दर भुज प्यारी।

जिहि भुज बाँधि जीति बस कीन्हें, मोहन गिरवर धारी।।
सकल लोक चूड़ामणि प्यारौ, सो भयौ आज्ञाकारी।
सहज प्रीति की डोर बंध्यौ नित, डोलत रहत पिछारी।।
सो ऐसी भुज परम मनोहर, केहि विधि देखिय प्यारी।
याही सोच जरत निज छाती, दृग ललचात सदारी।।
ऐसौ भाग्य कौन दिन जागै, रहत बिचार बिचारी।
भोरी प्यारी कुञ्जन डोलै, भुजा कण्ठ सोई डारी।।

(६०)

सुधि करत कमल कर पोरन की।

वीणा कर लै ग्रीव दुरेबौ , भरि-भरि तान झकोरन की।

भौह विलास तिरिछी चितवन, हँसि- हँसि पिय चित चोरन की।।

आनन्द कन्द मन्द मुख हाँसी, पिय मुख चन्द चकोरन की।

तन मन अति अकुलात किशोरी , भोरी बलि दृग कोरन की।।

(६१)

रँग भरे कोमल अँगुरिन पोरैं।

जो गड़ि रहे श्याम हियरा में, रस बस लेत हिलोरैं।

नख उजियार कौंध दृग चौन्धत, दीप लियें चित चोरैं।।

परम निशंक करत मन भायौ, निगम श्रृंखला तोरैं।

शिव अज मति परसत हू नाहीं, छबि बरनैं कवि कोरैं।।

देखें एक श्याम नैना भरि , सो देखत भये बौरैं।

काहू भाँति भेद नहिं पायौ, अमित जतन छके झकोरैं।

चञ्चल मधुर अरुण अति कोमल , मनौ प्रेम रँग बोरैं।।

हौं अति पतित तदपि करुणानिधि , इनकी आसा मोरैं।

भोरी हित कब तलक विलोकौं, टेरत अपनी ओरैं।।

श्री प्रिया मुख-कमल

प्यारी तेरौ मुख चन्द न्यौरी।

कैसौ सो शशि जाहि देखि कै, हरि दृग भये चकोरी।।

तीन लोक इक मदन किये बस, सहज चाप टँकोरी।

कोटि मदन दल दलन मनोहर, सो यह जीत लयौरी।।

ललकत दृग छिन दरसन आसा, करुणा धाम किशोरी।

एक झलक हँसि नेंक दिखावौ, बार-बार बलि भोरी।।

(६३)

हँसि-हँसि मोहि किन घायल कीजै।

जोपै इतनी कृपा कृपानिधि, तौ यह मांगे दीजै।

छिन इक भरि-भरि लोचन प्यारी रूप माधुरी पीजै।।

पुनि निशिवासर विरह ताप सौं , यह तनु पल-पल छीजै।

भोरी सहज कृपाल किशोरी, अब बिलम्ब नहिं कीजै।।

(६४)

तुमने आज लों बात न पूछी, को द्वारे चिल्लात न पूछी।

जीवन बीत्यौ गोद पसारे, कहा लोभ ललचात न पूछी।।
मैं नित हौंस मरी कहिवे की, हँसि कबहू कुसलात न पूछी।
कोटि उपाय किये पै तुमने, का सोचत दिन रात न पूछी।।
दृग-सर घाव फूलि कै सहिवे, कस हियरा अकुलात न पूछी।
नित प्रति कुटिल अलक में फँसिवे, कस लोचन ललचात न
पूछी।।
कैसे कटत दिवस-निशि तेरे, का दुख सूखत गात न पूछी।
भोरी दीन दुखी आरत सौं, बिहँसि हृदय की बात न पूछी।।

(६५)

अधर मधुर राजत मुसिकान।

कुञ्ज भवन बैठी अलबेली, कुल दीपक वृषभान।
रँग भरे नयन, रँग भरयौ आनन, रँग भीजी बतरान।।
रँग भरे श्याम चन्द्र मुख हेरत, करत सुधारस पान।
भोरी याचक विलपत द्वारे, हा-हा कृपा निधान।।

(६६)

ठग मुसिकान चोर चित केरी।

लूट लेत हित सरबस बरबस , ऐसे चोर सुनेरी।।
दन्त कौमुदी जग विस्तारत, चाँदनी चारु घनेरी।
तेहि प्रकाश तम हरन हरत मन, ठीठ निसंक बड़ेरी।।
तिहुँ पुर बान विदित यह इनकी, मैं नित लटकत टेरी।
भोरी हित चित चोरत क्यों ना, दीन दुखी की बेरी।।

(६७)

सुन्दर बदन मन्द मृदु हँसिबौ।
छिन इक भरि दृग देखन दीजै, हिल-मिल सुधा बरसिबौ।।
श्याम गौर भुज केलि परस्पर, नयन-नयन में फँसिबौ।
भोरी हित छिन देखन ललकत , भुज भरि हिये हुलसिबौ।।

श्री प्रिया नयन-कमल

नयनन सो नित देखिबौ कीजै।
कर सौँ चरण सरोरुह चाँपत, श्रवन माधुरी पीजै।
नयन पुतरि लौँ चखन बसैये, लाय-लाय हिय लीजै।
असन बसन सुधि-बुधि परिहरिये, देखि -देखि कै जीजै।

भोरी विमल युगल छवि ऊपर, बारि-बारि जल पीजै।

(६९)

नैनन कोटि मनोज बसाये।

ना मानहु मोहन सों बूझहु, जिन्हें जीत कै आये।
चंचल भौंह भाल पर राखीं, करत सदा मन भाये।
ठग मुसिकान ओंठ पर राजत, मन हर लेत पराये।
औरहु मुख का कहौं किशोरी, अंग-अंग चोर सुहाये।
चञ्चल चपल चोर मन मेरौ, रुकत न कोटि उपाये।
भोरी घटत कहा करुणानिधि, एक याहि अपनाये।

(७०)

सुधि करत कमल लोचन की।

लाज छकी महि ओर विलोचन, नई-नई भेंट सकोचन की।।
रूप छकी छकी द्वार रहन की, कर गहि ढिंग लैजैबे की।
कुसुम सेज पै नवल लाल ढिंग, हठ कर लाइ बिठेबे की।
कहि-कहि मृदु बतियाँ रस भींजी, अधिक प्रेम सरसैवे की।
रस सों रसिक रसीली स्वामिनि, हँसि-हँसि तोहि हंसेबे की।।

कुञ्जरंध्र तोहि देखन हू की, नूपुर धुनि सचु पैवे की।
कहँ लौं कहौं किशोरी प्यारी, मुख सों कछू कहिवे की॥
तरसत दरस लालची लोचन, हौंस बढ़त कहूँ पैवे की।
प्रगट कृपालु करहु किन बातें, भोरी आस पुजैवे की॥

(७१)

वा चितवन पर तन मन दीजै।
बरसत सहज कृपा रस धारा, भृकुटि कुटिल नयन रस भीजै॥
तोरि-तोरि तून त्रिभुवन बारिय, पी-पी रूप माधुरी जीजै।
भोरी कौन भाग्य सौं प्यारी, रँग भरी नयन कोर तेरी लीजै॥

(७२)

सो दृग कब गड़ि हैं उर मेरे।
जिनकी कोर ललित लीला सौं , उपजत छिन-छिन मदन घनेरे॥
जिनके हाथ बिकाने मोहन, परम प्रवीन भये तेरे चरे।
जे नित अधमन पै रस बरसत, सहज कृपा रस सौं उमड़ेरे॥
जे नित सोयौ भाग जगावत, भाल कु अंक मिटत जिन हेरे।

भोरी कौ यह भाग्य कृपानिधि, फिर है एक इन्हीं के फेरे।।

(७३)

जय-जय राधा दृग को कोरें।

खन्जन कंजन मीन मृग जिन पै बारैं कोटि चकोरें।।

बरसत सहज माधुरी धारा, त्रिभुवन रस में बोरें।

बंक विलोकन चञ्चल मानहुँ, करुणा सिंधु हिलोरें।।

इनको ही अवलम्ब किशोरी, एक सदा हिय मोरें।

भोरी प्रीति-रीति सौं रीती, विनय करत कर जोरें।।

(७४)

जय-जय राधा नयन सुरंग।

जिनके चपल दृगचंल ही सौं, उपजत कोटि अनंग।।

जिनकी बंक विलोकन मानों, उमड़त प्रेम तरंग।।

निज जन हृदय सिंधु उमगावत, नित नव नेह उमंग।

भोरी कौं इक आस रावरी, दीजै प्रेम अभंग।।

(७५)

अशरण शरण प्रिया दृग तेरे।

मदन मथन मोहन भय भागै, कोटिन-कोटि मनोज बसेरे।।
नील कमल सर वर्षत मानों, सहज बंक अवलोकन प्रेरे।
जीत लिये श्री मधुरिपु मोहन, रस बश किये आपने चेरे।।
मोकों एक आसरौ इनकौ, यह तौ कृपा सिंधु उमडेरे।
कहा कहौ किन दोषन भोरी, अजहूँ मो तन नैक न हेरे।।

(७६)

करुणा भरे प्रिया दृग तोरैं।

सहज कृपा की उठत तरंगे, त्रिभुवन रस में बोरैं ।।
उमड़त कृपा सिन्धु परि पूरण, दिस-दिस लेत हिलोरैं।
भोरी परम अभागी तौहू, इनकौ आसरौ मोरैं।।

(७७)

कहाँ छुपाये प्यारी लोचन चपल शिकारी हो।
जेहि देखत हिय बेधत ताकौ, सब जग कहत पुकारी हो।
अखिल लोक चूड़ामणि मोहन, चपल चतुर गिरधारी हो।।
बरबस पकरि जकरि छबि राखयौ, डोलत नित जु पिछारी हो।
चँचल चित्त कुरंग हमारौ, हौं तासौं अति हारी हो।

गगन-पताल गिनत नहिं कछुवै, डोलत विषय मंझारी हो।
जो तेहि वेधि बाँधि कै राखौ, कर निज आज्ञाकारी हो।।
सब विधि सबल नवल अलबेली, मानौं जीत तिहारी हो।
भोरी आस इनहिं अँखियन सों, चितवन पर बलिहारी हो।।

(७८)

जो अलि होत प्रिया दृग मेरे।

तौ उड़ि क्यों न करत करुणानिधि , पंकज पावँ बसेरे।।

मुदित मत्त नित छके एक रस, गिनत न साँझ सबेरे।

लव निमेष छिन होत विलग ना, छवि ही मनो पगेरे।।

लौट न मोहि देखते कबहूँ , मुसिकन फंद परे रे।

हा प्यारी कछु बन न परी तब, हठ थकी हार रहे रे।।

उड़न चाह्यो उड़िबौ नहिं आयौ, तरसत विकल भये रे।

का अब कहौ कृपालु लाडिले, सालत अधिक हियेरे।।

ता पर और निलजता ऐसी, अजहुँ विषय के चरे।

भोरी हित फूटत तक नाहीं, वादि कहावत मेरे।।

(७८)

ललकत नयन-नयन में फँसिवे।

वा छवि छके मुदित मतवारे, पी-पी सुधा हुलसिवे।।

हिय अकुलात धीर नहीं आवत, पंकज पावं निकसिवे।।

रँग बरसात रँगीली आवौ, कबहूँ हियरे धसिवे।

भोरी पोच पतित ललकत है, हित बल कुंजन बसिवे।।

(९०)

खंजन खग दृग चपल तिहारे।

छिन ठहरात समात नहीं कहूँ, कमल श्रेणि सित बरसन हारे।।

उलट-पलट चहुँ चलत दृगंजल, बंक निशंक अरुण अनियारे।

करुणा कोर बोरिहै सहजहि , विलपत दुखी देखि निज द्वारे।।

हौं तजि शंक आजहू सोबत, यही आस निज जीवन हारे।

भोरी हित उमड़त रस सागर, हरत दोष दारुण दुख भारे।।

सुरतान्त

।।छंद चारी।।

(५१)

नव छवि भोर निहारों, तन मन जीवन वारों।
तन मन जीवन वारों जब ही, आलस बस अंगरावौ।।
झुक-झुक परत परस्पर अंसन, मंद-मंद मुसिकाबौ।
लटकि-लटकि पग चलन मनोहर, देखि-देखि मन हारौं।।
कबहूं भाग जगावहु ऐसौ, नव छवि भोर निहारौं।

(५२)

पलटे विमल दुकले, देखि-देखि मन भूले।
देखि-देखि मन भूलै प्यारी, अटपट बचन उचारौ।।
शिथिलित गिरा देह गति शिथिलित, डगमग मग पग धारौ।
निशि जागर लोचन मद माते, अरुण कमल से फूले।।
प्रात समय कुंजन सों आवत, पलटे विमल दुकूले।।

(८३)

अलक कपोलन छाई, जनु अलि रहे भुलाई।
जनु अलि रहे भुलाई आनन, पंकज के रस भीने।।
बिनु गुन हार कुसुम झर लागी, गंड ललाई लीने।
देखि चिन्ह रजनी के सजनी, नैनन में मुसिकाई।।

कुच रस-कलसन मृग मद छुट्यौ, अलक कपोलन छाई।

(८४)

मदन मनोहर वेषा, विथुरित सुन्दर केशा।

विथुरित सुन्दर केशा स्वामिनी, नख छत हृदय सुहाये।।

अधरन रंग दृगन कों दीनौ, अंजन पलटे पाये।

माँग गिरा जमुना कच डूबी, भाल तिलक रुचि लेशा।।

कौन भाग नित प्रात निहारों, मदन मनोहर वेषा।

(८५)

जय-जय नवल नागरी राधा।

प्रात समय जागी रस माती, सखियन की सुख साधा।

लाल-लाल लोचन के कोये, बरसत प्रेम अगाधा।

शिथिलित गात अलक लट छूटी, तिलक भाल पर आधा।

भोरी सहज कृपालु कृपा करि, हरहु सकल भव-बाधा।।

(८६)

नित नव दरस भोर कब पैहीं।

शिथिल गात नव कुंज भवन सों, भोर उनीदी ऐहीं।।

छाके नयन देह सब थाकी, बुधि बल सुरत दुरैहौं।
हँसि-हँसि झुक-झुक परत किशोरी, झुकि-झुकि हँसि-हँसि
जैहौं॥

विलुलित शिथिल लसैं लट छूटी, कच सों कुसुम गिरेहौं।
भोरी नित नव दरशन पाऊँ, कब मेरी आस पुजैहौं॥

(८७)

रँग भरी टहल कौन विधि पावौं।

प्रात भये नव कुंज भवन में, सोबत जाइ जगावौं।
विथुरे कच शिर सुभग बनाऊँ, काजर दृगन लगावौं॥
टूटे हार कंठ पहिरावौं, माथे तिलक बनावौं।
बहुरि मांग भरि सैंदुर रेखा, भूषन वसन सजावौं॥
ओठन रँग कुच चन्दन चर्चित, रति के चिन्ह दुरावौं।
भोरी रँग भरी नवल किशोरी, देखि-देखि बलि जावौं॥

(८८)

कैसे रहस-दास्य हौं पावौं।

भोर उनींदी उठौ किशोरी, देखत नैन सिरावौं॥

निशि जागर आलस तनु छायाँ, मंजन बेगि करावौँ ।।
सजि तन नील बसन आभूषण, मधु सेवा लै आवौँ ।
किसलय शयन संभारि किशोरी , हँसि-हँसि लै पौढावौँ ।।
भाग्य भरी हौ बैठि पायँते, मृदु तरुवा सहरावौँ ।
भोरी सोवत नवल नागरी, देखि- देखि बलि जावौँ ।।

(८९)

सोच-सोच पुनि-पुनि अकुलावौँ ।
भोरहिं कौन भाग्य सौँ प्यारी, रंग भरे कुञ्जन आवौँ ।।
अंग राग अंगन सौँ छूटे , लै निज अंग लगावौँ ।
टूटे परे हार मालावलि , निज तनु सुभग बनावौँ ।।
तुम कौँ उबट न्हावाय किशोरी, नव श्रृंगार सजावौँ ।
भूषण बसन प्रसादी माला, बड़े भाग्य सौँ पावौँ ।।
कीजै कृपा कृपालु किशोरी, चरण कमल बलि जावौँ ।
भोरी यह सुख सोचि-सोचि के, बार-बार ललचावौँ ।।

(९०)

रँग भरे दरसन नित-नित दीजै।
लटकत आवें भोर कुंज सों, बचन कहत रस भीजै।
आलस भरे नैन लट छूटी, देखि-देखि छबि जीजै।।
हँस-हँस कहत अटपटी बतियाँ, श्रवण माधुरी पीजै।
भोरी मन या सुख पै भूल्यौ, कहा मुक्ति लै कीजै।।

स्फुट लीला

(९१)

ऐसी लीला की सुधि आवै, मन मेरौ बार-बार अकुलावै।
लिये आरसी निज छबि देखत, प्यारी मृदु मुसिकावै।।
ताही छिन रचि रास लाडलौ, मुरली मंद बजावै।।
सुनि धुनि आतुर चलत निकुंजन, रस बस पंथ भुलावै।।
तब हठ हाथ गहौ अलबेली, सो लखि हँसि सकुचावै।
धरि भुज अंस लाडलौ चलिवो, लटकि चाल अति भावै।।

मृदु-मृदु बैन अमी रस

बरसत, हँसन दसन चमकावै।

कंकण किंकिणी नूपुर बाजत, आगम सरस् जनावै।।
कीजै कृपा कृपाल किशोरी , तन मन अति अकुलावै।
भोरी छिन यह सुख की आशा , बार-बार ललचावै।।

(९२)

सुधि आवत खेल खिलेबै की।

नवल निकुंज भवन में प्यारी, हिय मिल ब्याह रचैबै की।।

बन विहरन यमुना तट चलिबौ, झूला डार झूलैबै की।

हिलमिल चौपर खेल खेलिबौ, भूषण अबीर लगैबै की।

रंग भरी होरी खेलत दोऊ, मुखन अबीर लगैबै की।

जब-जब होड़ परत दोउन में, तब-तब न्याब चुकैबै की।

यह अभिलाष अटपटी लागत, छिन ऐसे हियौ सिरेबै की।

भोरी बातें प्रगट करहु अब, बाँह पकरि अपनैबै की।।

(९३)

कब बाट हेरिबौ तेरे आवन की।

सोचत करुणाधाम किशोरी, ललित-ललित गति धावन की।

फहरत अंचल अंग झलकिबो , मुख पर छवि मुसिकावन की।।

हाँसि-हाँसि करुणा कोर हेरिबौ, मधुर-मधुर बतरावन की।
भोरी हिय अकुलात किशोरी, हौंसन हियौ सिरावन की।।

(९४)

कब आवत जानि किशोरी प्यारी, तेरे पथ में नैन लगैहौ।

नूपुर धुनि सुनिवे के लोभन, श्रवन दिये चित लैहौं।
सोच-सोच मुसिकान माधुरी, छिन-छिन प्रति अकुलैहौं।।

नित-नित नाम रटत करुणानिधि, नैनन नीर बहैहौ।

ऐसौ भाग जगै कब भोरी, रँग भरे द्योस बितेहौं।।

(९५)

सुधि आवत मान मनैबे की।

चँचल दृग थिर किये किशोरी, अवनी ओर चितैबे की।।

कर दै विमल कपोलन प्यारी, भृकुटि कुटिल लचेबे की।

कंज बदन मूँदे करुणानिधि, सुन्दर ग्रीव झुकेबे की।।

परि-परि पावँ मनावन हू की, कर सों ठेलि हटेबे की।

भोरी हौंसन मरत किशोरी, कहि रस बौन हँसैबे की।।

(९६)

रँग भरे नयन रँग भरी भौहैं।

रँग भरे भवन विराजित प्यारी, रँग भरे श्याम सुन्दर मुख जोहैं।।

रँग भरे वचन कहत हँसि दोऊ, रँग भरे चितवत कछु तिरछोहैं।

रँग भरी कुसुम सेज सखि निर्मित, रँग भरे दृग राजत अलसोंहैं।।

रँग भरी छबि-लव विमलछटा सौं, रँग भरे तिहुँपुर कौ मन मोहै।

भोरी याचक द्वार पुकारत, दरस लोभ लोचन ललचोहैं।।

शयन

(९७)

सुधि करत कमल दल शयनन की।

हियरा अकुलात जब सुधि आवै, मधुर मनोहर बैनन की।

झुकि-झुकि झूमि भवन कौ चलिबौ, अद्भुत शोभा नैनन की।

भोरी बलि-बलि जाइ किशोरी, सुभग तिरीछी सैनन की।।

(९८)

कब ऐसौ भाग्य जाग है प्यारी।

फूले फूल पँखुरियन रस बस, शैय्या रचौं सुधारी।।

कुञ्ज रंध्र रस केलि विलोकित, हर्ष होत हिय भारी।
करहु कृपा बलि भोरी स्वामिनि, बहुत विनय कर हारी।।

(९९)

किसलय शयन पधारौ किशोरी।

रजनी ढुरी गयौ दुरि चन्दा, समय भयौ अब पौढन कौरी।
लटकत चलिये कुञ्ज भवन कौं, झूमत मोहन अंसन कोरी।।
आलस बलित शिथिल मुख वाणी, छाई नयन अरुणाई थोरी।
नवल सेज नव दलन कृपानिधि, पौढि हिये सुधि कीजिये मोरी।

(१००)

कुञ्जनि चलौ नवल अलबेली।

सुर तरु कुञ्ज कमल दल सैय्या, पौढि करहु किन केलि।।
चलत मोहि भरि नयन निहारौ, छबि निधि गरव सहेली।
तुम बिनु कछु अवलम्ब न मेरैं, विलपत बिकल अलबेली।।
सहज कृपालु कृपा करि राखौ, निगम-नीति-हठ ठेली।
भोरी हित चरणन सों लागी, ज्यों तरुवर सों बेली।।

(१०१)

नव निकुञ्ज नव सेज सुहाई।
दोऊ नवल किशोर रूप निधि, पौढि करौ मन भाई।।
नवल सखी मिल करत बधाई, आरती गावत गीत बधाई।
श्यामल गौर गात मिल उरझन, उर उमंग अधिकाई।।
ललकत दृग छिन देखन कारन, लीला ललित लुभाई।
भोरी हित अलबेली स्वामिनि , दीजै आस पुजाई।।

(१०२)

किसलय शयन पधारौ प्यारे।
हिल मिल करौ भावती बतियाँ, रूप सुधा मतवारे।
हौंतौ दीन दुखारी पामर, आरत बिलपत द्वारे।।
मेरीहूँ हँसि चरचा कीजो, श्याम मोरपछ बारे।
भोरी हित दरदीले मोहन, पोच निबाहन हारे

चौसर

प्रेम की चौसर खेलैं पिय प्यारी।
हारे मोहन जीती प्रिया तू, वे जीते तू हारी।

दोऊ हारे दोऊ जीते, कोधों कहीं बिचारी।।
हार जीत मिल एक भये री, गौर श्याम सुखकारी।
एक देह इक प्राण एक वपु, सलिल-तरङ्ग न न्यारी।।
तन मन प्राण दुहूँ नै हारे, ऐसे अजब खिलारी।
दोऊ कोटि गुणित करि पाये, प्रीति रीति रिझवारी।।
तुम सम प्रीति रीति को जानें, मैं मुख कहीं कहारी।
भोरी को भुज गहौ लाड़िली, नेह निबाहन हारी।।

(१०४)

प्रीति की बाजी खेलियें प्यारी।
हौ तौ काची प्रीति लै आई, साँची प्रीति लाऊँ सुकुंवारी।
हौं तौ बाजी अवसि हारिहौं, जीति करौ निज आज्ञाकारी।।
ऐसी चेरी करौ आपनी, छिन न हौँउँ चरणन सौँ न्यारी।
तेरी सहज बान पै भोरी, बार-बार जाऊँ बलिहारी।।

(१०५)

प्रीति की बाजी रची, अब खेलौ प्यारी।
जोपै हारौं तौ दासी हौं तेरी, चरणन सौँ न करौ छिन न्यारी।

जोपै जीतौ तौ बसौ हिय मेरे, कोमल चित्त कृपानिधि प्यारी।।

नित प्रति दरस मोहि देहु कृपानिधि, प्रीति रीति हिय नैन
खुमारी।

विनती एती मानो कृपालु किशोरी, भोरी चरण कमल पर वारी।

वेणी

पीठ बिराजत सुन्दर बैनी।

फूलन सों पिय प्यारे ने गूँथी, लाँबी भली बनी सुख दैनी।।

मोतिन सों कच प्यारे सँवारे, बीच विराजत सैनदुर ऐनी।

भाग्य सों चौरं ढुराइहौं भोरी, तौ हियकी मिट जैहै कुचैनी।।

(१०७)

भौरन लौं बैनी पर अटके।

यह वर देहु रीझि कै प्यारी, मन मेरौ अनत न भटकै।।

यह अति चंचल रुकत न क्योंहूँ, विषयन में सिर पटकै।

भोरी तौ थिर होइ छिनक में, जो अलबेली हटकै।।

जावक

जावक लौं पाँयन सौं लागै।

**नूपुर लौं गुन गाय निरन्तर, पद रज लौं अनुरागै।
कुंजन लौं हिय सदन बसाबै, किंकिन लौं रस पागै।।
छाया लौं बन डोलत प्यारी, मन छिन पास न त्यागै।
यह मेरी आस पुजावहु भोरी, प्रीति अटपटी जागै।।**

(१०६)

**रसिक रँगिली गोरी। नागरि नवल किशोरी।।
नागरि नवल किशोरी प्यारी, नवल लाल गिरधारी।
कोटि काम अभिराम लाड़िले, करत केलि सुख कारी।।
चरण महावर दैन रसिक, भरि- लाये रंग कटोरी।
बैठी मृदु मुसिकावत देखौं, रसिक रँगिली गोरी।।
भरि रंग अंगुरिनु माहीं। पिय पग परसन चाहीं।।
पिय पग परसन चाहीं जौंलौं, बीच भई चित चोरी।
दोऊ चन्द चकोरी है गये, अरुझि नैन की कोरी।।
पियें रूप मधु छके खुमारी, तन मन की सुधि नाहीं।**

इक टक बदन विलोकित प्यारे, भरि रँग अँगुरिन मांहीं।।

प्रेम पगी हौं आवौं। महावर पगन लगावौ।।

महावर पगन लगावौ हँसि-हँसि , दोऊ नेक न जाने।

टेर कहौं पुनि रसिक लाड़िले, काधौं रहे भुलाने।।

प्रेम गहर सौं काढ़ि किशोरी, हँसि-हँसि दुहुन हँसावौ।

कबधौं रहसि कुंज अलबेली, प्रेम पगी हौं आवौं।।

बार-बार मुस्कावैं । तन की तपन बुझावै।।

तन की तपन बुझावत दोऊ, लगे महावर देखी।

रुक-रुक हँसि-हँसि परत लाड़िले, पुनि-पुनि मो सम पेखी।।

हास चाँदनी छिटकी चहुँ दिशि, हृदय उमँग सरसावैं।

भोरी देत रीझि कै माला, बार-बार मुसिकावैं।।

(११०)

रुचिर बधू नव कुंज किशोरी।

निज कर दैन महावर बैठौ, रँग अँगुरियन बोरी।।

निज पद मुकुर मनोहर मूरति , देखत बैठि सराहैं।

पुनि-पुनि रँग अँगुरियन बोरत, छाकी अमित उछाहैं।।

पिय की छबि सों निज छबि तोलत, जबहि अचक रहि जावौ।
दैन महावर लगौं आइ तब, सो लखि मृदु मुसिकावौ।।
हँसि-हँसि मो मुख देखौ, जब-जब , छवि छकि-छकि रहि जावौ।
बार-बार बलि जाऊँ लाड़िली, यह मेरी आस पुजावौ।।

अभिसार

ऐसी हौंस बढे हिय माहीं।
श्री यमुना तट बैठे नागर, कल्प वृक्ष की छाहीं।।
अति अनुराग भरे दृग मूंदै, टेर-टेर पुलकाहीं।
हौं लै आऊं कृपालु किशोरी, आतुर तोहि तहाँहीं।।
वे टेरें तुम ढाँप तबै दृग, मंद हंसौं तेहि ठाँहीं।
भोरी मन यह लोभ लुभानौ, देखन दृग अकुलाहीं।।

स्वप्न

ऐसौ स्वप्न मोहि अति भावै।
नैन समीप मोहिनी मूरत, मंद-मंद मुसिकावै।।

कोटि चन्द छवि सुन्दर आनन, रूप सुधा बरसावै।
भोरी रंग भरी अलबेली, हिय में आइ समावै।।

(११३)

प्यारी हो, मोहि ऐसो सपनौ भावै।

उर धरि पंकज पावं लाडिलौ, मंद-मंद सहरावै।।
बार-बार हिय मांहि लगावत, तन की ताप बुझावै।
बैठि पांयते सरस् रागिनी, मंजु मधुर धुनि गावै।
दरस माधुरी देखत छिन-छिन , अपने नैन सिरावै।
भोरी रूप सुधा रस छाकी, छिन सम रैन बितावै।।

*सखी*114

ललिता ललित रूप तनु श्यामा।

जुगल माधुरी पियत निरन्तर, कुंज भवन अभिरामा।
सहज कृपालु उदार सुन्दरी , कोमल तनु नव बामा।।
आरत हरन चरण सुखदायक, पोच पतित बिश्रामा।
अखियाँ जासु बड़ी दरदीली, उमगत करुणा धामा।।

श्री बन वास विलास विलोकित, निशि दिन आठौ जामा।

कबहूँ द्रवौं कृपानिधि मोपै , तोहि करहुँ परनामा।।

इतनी सुधि कराउ हित जू कौं , कोउ इक भोरी नामा।

पोच पतित विलपत प्रतिपारौ, जहपि परम निकामा।।

(११५)

सखी विशाखा अति सुकुमारी।

छोटी वयस बड़ी-बड़ी अखियाँ, उमगत कृपा अंबुनिधि प्यारी।।

पोच पतित प्रतिपाल सुन्दरी, अति उदार रिझवार महारी।

कोमल तन कोमल मन नागरि, मृदुल स्वभाव रूप उजियारी।।

करुणा धाम कहा कहि वरणौं, आरत टेर सकत सहि नारी।

श्री बन वास रास रस छाकी, छिन न होत प्यारी सौं न्यारी।।

मेरी ओर कृपा करि हेरौ, निरवलंब अति देखि दुखारी।

कुंज वास है तेरो सजनी, हित जू कौं सुधि मेरी करा री।।

कहियत सहज कृपालु लाड़िली, अधम उधारन बान तिहारी।

पूछत क्यों न कुशल भोरी सौं, विलपत आरत द्वार पुकारी।।

(११६)

जय राधा चरनन की दासी।

ललितादिक जे सखी संग की, प्रिय पद कंज निवासी।।

शिव ब्रह्मादिक वन्दते पद रज, राधा चरण उपासी।

जिनकौं जोर-जोर कर बिनवत, मोहन कुंज-विलासी।।

महिमा अमित अपार अगोचर, सहज नेह की रासी।

सिध-निधि कोटि-कोटि की दाता, आरत कल्पलरासी।।

श्री दम्पति मन लिये रहत नित, निश दिन करत ख्वासी।

हित नाते सुध करहु-करावहु, भोरी सठ रस प्यासी।।

नख-सिख

(११७)

लाड़िली प्यारी हो ऐसौ रूप मोहि भावै।

बयस किशोर रस भरी प्यारी, तनु छवि कोटि मनोज लजावै।

अंग-अंग द्युति झलकत नीकी, चौन्धि-चौन्धि दृग ठहर न पावै।

सिर सीमंत सुभग कच गूथित, बैनी भुवंग पीठ छवि छावै।

बरसत नैन कमल सित श्रैनी, भृकुटि मरोर न बरणी जावै।

(११८)

सुन्दर सहज कृपानिधि प्यारी।

पूरण कोटि शरद शशि सुन्दर, मुख चन्दा उजियारी।

खंजरीट द्वय खेलत तामें , भृकुटि धनुष छवि न्यारी।।

ओंठ दन्त द्युति युत मृदु हाँसी, उपमा कहौं कहारी।

मनु अनुराग अमी मिलि बरसत, चाँदनी अति सुखकारी।।

आनँद में तिहुँ लोक डुबोये, कोर कटाक्ष छटारी।

जन हिय प्रेम सुधा रस सागर, उमगन अमित अपारी।।

संत शास्त्र श्रुति सब ही गावत, सबकौं सुखद सदारी।

भोरी शठ पर इती निठुरता, सपनेहुँ नाहिं निहारी।।

(११६)

कैसे देखिये भरि-भरि नैन।

चंचल नयन खये थिर दुँहुँ दिशि, टारे नैक टरें न।

जनु चकोर रस उमंग अटक रहे, मुख मयंक छबि रण।।

भूषण बसन देह सुधि बिसरी, घटिका याम गिनै न।

दौ भुज अंस बदन अवलोकत, इक टक पलहु लगै न।।

बार-बार मृदु-मृदु मुसिकावत, मुख कछु कहत बनै न।

भोरी किशोरी अति अलबेली, श्याम सुन्दर सुख दैन।।

(१२०)

कबहुँ देखि हौं भरि-भरि नैन।

नर्तन रास दिये गलबाहीं, विमल शरद की रैन।

अरुझे नील निचोल पीत पट, सैनन अरुझी सैन।।

श्यामल गौर गात मिल अरुझे, मुख आवत नहीं बैन।

प्रेम उमंग देह सुधि बिसरी, नव-नव उलहत मैन।।

हिल मिल दोऊ एक भयेरी, सो क्यों हूं सुरझैं न।

भोरी दृग अकुलात किशोरी, पल छिन धीर धरै न।।

(१२१)

कुँवर दोऊ ऐसे बसौ दृग मेरे।

इक रस मगन रहौं वा छवि पै, गिनौं न साँझ सबेरे।।

सुन्दर सुखद मनोहर जोरी, हिय में करहु बसेरे।

मंद-मंद मुसिकान महा छबि, दैदै बाँह गरे रे।।

ता छबि माँहिं फंसे दोऊ अँखियाँ, टारी नाहिं टरैं रे।

भोरी नैन दरस रस प्यासे, करहु आपने चेरे।।

(१२२)

सुन्दर स्वामिनि प्यारौ हमारी, छबि निधि सहज रूप उजियारी।

मुख छबि कोटि चन्द सौं नीकी, हँसन दसन द्युति भांवती
जीकी।

चितवन बरसत वृष्टि अमी की, रंग भरी छबि सुखद सुखारी।।

लोचन रहत रूप ललचाने, सपनेहु तुम बिनु और न जाने।

शिशु लौं बार-बार हठ ठाने, चहुँ दिशि रहत निहार निहारी।।

हँसि कृपाल बिधु बदन दिखावौ, सहज माधुरी पान करावौ।

भोरी हिय की आस पुजावौ, तन मन रहौं चरण पर वारी।।

(१२३)

विनती मेरी तुम्हारे तलक, दृग नेक दिखावौ रूप झलक।

मोतिन लौं कच सौं लगि लटकै, मधुकर लौं मुख पंकज अटकै।

मन मेरौ अनत कहूं नहि भटकै, रहै बुलाक ज्यौं अधर हलक।।

काजर लौं दृग कमल समावै, मृग मद सरस भाल पर छावै।

पायँन जावक रूप सुहावै, यही आस नित रहहु ललक।।

दरसन देहु लाड़िली प्यारी, आस पूजावहु नव सुकुमारी।
भोरी तन मन जीवन वारी, देखत दृग न लगाऊँ पलक।।

(१२४)

जय-जय राधे रूप उजारी।

जय अलबेली सहज सुन्दरी, श्री वृषभान दुलारी।।
जय रस दायन स्ववश बिहारिनि , सर्वोपरि सुखकारी।
जाकी भ्रू विलास बस मोहन, लाग्यौ रहत पिछारी।।
जय मंगल धुनि गावत किंकिन, पग नूपुर झंकारी।
गुन गन अमित पार नहिं पायौ, पचि हारे श्रुति चारी।।
त्रिभुवन विदित भानु कुल-दीपक, सबकौं सुखद सदारी।
भोरी शठ पर परम निठुरता , टेरत-टेरत हारी।।

(१२५)

जय-जय नवल निकुञ्ज नागरी, निज सर मनु जीत त्याग री।
मदन विमोहन कौ मन मोह्यो, गावत किंकिन विजय राग री।।
मोहन मंत्रन उघटत नूपुर, छवि निधि सहज सरुप आग री।

भोरी ओर कृपा करि हेरौ, सोबत स्वप्न जगाऊ भाग री॥

(१२६)

बिनु छिन दरसन पाये क्यों धीरज धारौं।

पद नख चंद्र चंद्रिका ऊपर कोटि-कोटि चिन्तामणि वारौं॥

कोटि मराल चाल पर वारौं, चरण कमल पर कोटिक कंजन ।

कोटि-कोटि केहरि कटि ऊपर, दृग पर कोटि-कोटि वर खंजन॥

कोटि-सुमेर दिव्य कुच ऊपर,कोटि-कोटि मन्मथ धनु भौंहन।

कोटिक चन्द्र मन्द हाँसी पै बरबस विवस किये मन मोहन॥

कोटिक कुंद दन्त पर वारौं, बैनी ऊपर कोटि भुवंगन।

कोटि कोटि ब्रह्मांड सुभगता, बार डारिये अंगन-अंगन॥

कोटिक प्राण छिनक दरसन पै वारौं, सहज कृपालु किशोरी।

नैक कृपा करि दरसन दीजै, आरत टेर पुकारत भोरी॥

(१२७)

वे अधर मधुर वैसे मृदु-मृदु बैन।

वैसी छिटकी हँसन चाँदनी, वैसे रँग भरे नैन।

वैसी बैनी लसत पीठ पै, त्रिभुवन सुखमा ऐन।

वैसी झुकन बजन नूपुर की, वैसी गति सुख दैन।।
सोच-सोच अकुलावत हियरा, पल छिन धीर धरै न।
मणिबिनु फणिज्यों व्याकुल भोरी, पलछिन परत न चैन।।

(१२८)

वह छटा छिन हू दिखावौगी कहौ,
माधुरी हँसि-हँसि पियावौगी कहौ।
मन कुटिल अलकन में मेरौ घेरि कै,
सब कुटिलता कब मिटावौगी कहौ।।
अपने कोमल पावँ धरि मेरे हिय,
सब कठिनता कब नसावौगी कहौ।
ओठ पै अनुपम लसै अनुराग रस,
हँसि सुधा धारा झरावौगी कहौ।
हौं तौ तेरे पंथ में व्याकुल पड़ी,
लाड़ सौं नूपुर बजावौगी कहौ।
है हियौ मम तप्त तीनहुँ ताप सौं,
अपने पद सौं कब सिरावौगी कहौ।।

हौंजु सोती दै दरस कब स्वप्न में,
भाग्य सोये कौं जगावौगी कहौ।
अपने कच के संग मो मन बाँधिहौ,
अपनी छवि में दृग फँसावौगी कहौ।।
नयन कोयन सों बरसि कै माधुरी,
मेरौ मन रँग में डुबावौगी कहौ।
मेरी भोरी कहिकै हँसि-हँसि लाड़िली,
सब सौं कब नाता छुड़वौगी कहौ।।
हौं तौं व्याकुल टेर नित द्वारे करत,
अब तौ मेरे हिय समावौगी कहौ।

129

वा अलक में चित्त फँसि रहि है कभू,
पीर साँचे प्रेम की सहि है कभू।।
लेत सांसें बैठि दुख सौं लाड़िली,
दौ विरह की देह यह दहि है कभू।
जैसे चातक मेघ कौं टेरत सदा,

तैसी हठ यह जीभ हू गहि है कभू।।
वा सुधा मुस्कान भरि दृग पान कौं,
दृग चकोरी से विकल चहिहैं कभू।
भोरी नित-नित द्वार पै बिनती करै,
रीझ तेरी लाड़िली लहि है कभू।।

(१३०)

अलक कुटिल मन मेरौ फँसावै, नयन कोर हिय माहि धसावौ।
हौं तौ विलपत बिकल अकेली, आइ हंसौ छिन मोहू हँसावौ।।
जाकौ ठीक-ठौर नहिं कितहूँ, तेहि भुज गहि बरसाने बसावौ।
चरण धूर लागि धूर मिली में, अब न कृपालु बहुत तरसावौ।।
लोचन मृदु मुस्कान लुभाने, छिन इक छटा विहँसि दरसावौ।
भोरी चातक दीन पुकारत, हँसि-हँसि क्यों न सुधा बरसावौ

(१३१)

नवल वयस झूमत रँग भीनी।

कौन भाग भरि नयन निहारौं, शोभा नित्य नबीनी।
चंचल चखन तिरिछी चितवन, कुण्डल लोल कपोला।
अधर बिंब मृदु हास मनोहर, सुधाधार मधु बोला।।
चंपक कनक बरन तन शोभा, अंग-अंग छबि न्यारी।
झूमत चलत ढरत करनी लौं, नव यौवन मतवारी।।
गूंथित चिकुर रुचिर सिर सैंदुर, मुक्ता पंक्ति सुहाई।
भाल विशाल तिलक मोहत मन, भृकुटि बंक छबि छाई।।
चिबुक चारु सुन्दर भुज ग्रीवा, मूरति रंग रँगीली।।
करुणा धाम किशोरी राधे, दीन दुखी दरदीली।।
श्रवनन सुनत बिकानी छवि पै, अँखियाँ धरत न धीरा।
कभू उमगि करुणानिधि पूछौ, हँसि-हँसि हिय की पीरा।।
ये अँखियाँ रिझवार बड़ी री, इनकौ भरोसौ भारी।
भोरी हित इत नजर जो फेरौ, तौ बड़ बात कहा री।।

(१३२)

करिवर चाल चलत मतवारी।

नवल वयस यौवन मदमाती, झूमत झुकत ढुरत सुकुमारी।

फहरत अञ्चल चञ्चल कुण्डल, किंकिणि कल नूपुर झंकारी।।
नवल निकुंज चलत अति आतुर, नवल वधू वृषभान दुलारी।
भोरी हित मग कबहुँ ठहरि हौ, बूझन कुशल कृपानिधि प्यारी।।

सेवा -अभिलाषा

नयनन सौं नित देखिबौ कीजै।

कर सौं चरण सरोरुह चाँप्त, श्रवण माधुरी पीजै।

नयन-पुतरि लौं चखन बसैयै, लाय-लाय हिय लीजै।।

असन-बसन सुध-बुध परि हरिये, देखि-देखि कै जीजै।

भोरी विमल जुगल छबि ऊपर, वारि-वारि जल पीजै।

(१३४)

रुचि-रुचि अर्पहुँ कंठन माला।

हिलमिल डोलहुँ लगी-लगी पीछै, गावत गीत रसाला।
रुचि-रुचि रास लाडिले नाचत, सोभा विशद विशाला।।
कंकन किंकिनि नूपुर बाजत, लाजत मोर मराला।
वारों तन मन जीवन कोटिन, देखि-देखि तिहि काला।।
लै -लै पंखी पीछे डोलहुं, हरि श्रम होत निहाला।
यह मम आस पूजाइय भोरी, शरणागत प्रतिपाला।।

(१३५)

मन मेरौ बार-बार अबिलाखै।

ऐसौ भाग जागिहै कबहुँ, रूप माधुरी चाखै।
रुचि-रुचि विमल माल पहिरावै, रस की बतियाँ भाखै।।
नित-नित नव-नव लाड़ लड़ावत, पुतरिन लौं दृग राखें।
तन मन पल-पल बारत भोरी, निगम श्रृंखला नाखे।।

(१३६)

रस भरी टहल कौन विधि पावौं।

नूतन मृगमद लिये लाड़िली, कुच पर पत्र बनावौं।।
अनुपम देह दिव्य द्युति राजै, देखि अचक रहि जावौं।

मो गति देखि कृपालु किशोरी, मन्द-मन्द मुस्कावौं ।।
निज कर पत्र रचन जब लागौ, देखि-देखि पछितावौ ।
भोरी या सुख टहल आस पर, कोटिक जन्म गमावौं ।।

(१३७)

प्यारी मोहि ऐसौ जीवन भावै ।

आलस भरी लता के गृह में, रुचि शैया पौढावै ।।
तुम सोवौ मैं ब्यार डुलावौं, भाग्य कह्यो नहिं जावै ।
तुम हूं अकेली मैं हूं अकेली, आनन्द उर न समावै ।।
बार-बार छवि देखि-देखि कै, छिन इक वह सुख पावै ।।

(१३८)

सोवत कबहूँ प्यारी तोहि भरि-भरि नैन निहारौं ।
तुम तौ पौढीं फूलन की सैया, मैं तो बायु करौं तन बसन
सम्भारौं ।।

देखौं कबहुँ मुख आवत हाँसी, कोटि प्राण ताहि ता छवि पर
वारौं ।

कबहुँ कहत पिय छोड़ौजी छोड़ौ, तब पुलकित गात तोपे जीवन
हारौं ।।

कबहूँ आनन्द भरी तेरी देह सुहावै, अंसुवा पौछ सम्भारौ।
भोरी हित यह आस पुजाबौ, बिन देखे नैन लागत अंधियारौ।।

(१३८)

ऐसी सेवा की सुधि आवै।

अतर अरगजा माँग महावर, भूषण बसन सजावै।।

मज्जन भोग सिंगार आरती, रुचि सैया पौढावै।

चन्दन मृग मद सेंदुर काजल, तेल फुलेल लगावै।।

लै बीना मृदु गाइ किशोरी, जुगल किशोर रिझावै।

कबहूँ रीझि देहु यह सेवा, भोरी बलि-बलि जावै।।

(१४०)

भावै हिल मिल सैया रचिवौ।

पिय के चाटु बैन तेरी नाहीं, प्रणय कोप सौं लचिवौ।।

श्याम गौर भुज कलह मनोहर, भृकुटि नैन कौ नचिवौ।

यह सुख छिन नहिं पायौ भोरी, वृथा सृष्टि नचि पचिवौ।।

(१४१)

मेरे मन भावै अलक संभारिवौ।
बीन नवीन फूल रचि रुचि सौं, हार गरे में डारिवौ।।
बैनी चारु चमेली फूलन, मुतियन लरी सुधारिवौ।
रुचिर चिकुर भरि सैंदुर कबहूँ, देखत तन मन बारिवौ।।
काजर कोर अनोखी अँखियन, बंक निसंक निहारवौ।
अद्भुत अधर अरुणाई तापै, मृदु हाँसी विस्तारिवौ।।
भावत भोर भुजा अंसन दै, लटक-लटक पग धारिवौ।
नख सिख रूप अनूप निरखि दृग, कोटिक जीवन हारिवौ।।
कंज दाम छवि मृदुल मनोहर, उमगत बाँह पसारिवौ।
भोरी हित अति दीन दुखी कौं, कुशल बूझि प्रतिपारिवौ।।

ब्रज-वृन्दावन वास

कब बसिहौ ब्रज बीथिन माहीं।
जहँ नित डोलत जुगल लाडिले, दिये विमल गलबाहीं।
मगन चलत डगमग पग धावन, छिन-छिन पंथ भुलाहीं।।

ठहर-ठहर मुख कंज बिलोकित, मंद-मंद मुस्काहीं।
फहरत अञ्चल चञ्चल कुंडल, परत कपोलन झांहीं।।
कोटि मनोज अंग छबि मिल-मिल , चौगुन होत सदाहीं।।
भोरी किशोरी तन मन अकुलत, देखन दृग ललचाहीं।।

(१४३)

कब बसिहौं ब्रज कुञ्जन माहीं।
ह्वै मृग बन मृगनैनी ढूँढ़त, फिरौं कदम्बन छाहीं।।
पीछै लागि नित रहौं किशोरी, छिन संग छाँड़त नाहीं।
भोरी जबकर फेरि बिलोकौ , शिव अज लखि ललचाहीं।।

(१४४)

दीजौ मोहि वास ब्रज माहीं।
जुगल नाम कौ भजन निरन्तर, और कदम्बन छाहीं।।
ब्रज बासिन के जूठन टूका, अरु जमुना कौ पानी।
रसिकन की सत संगति दीजै,
सुनिवौ रस भरी बानी।।
कुञ्जन कौ नित डोलिबौ दीजै, दीजौ भोर बुहारी।

मिल्वे की हिय माँहिं चटपटी, प्रीति हिये अति भारी।।
कोटि प्राण नित बारिबौ दीजै, देखत चरण छटारी ।
इतनी आस पूजावहु प्यारी, भोरी बलि बलिहारी।।

(१४५)

श्री वृन्दावन तोहि करूँ परनाम।

रँग भरी केलि करत जहँ नित-नित , रँग भरे श्यामा श्याम।
रँग भरौ जमुना तीर सुहायौ, रँग भरे राजत धाम।।
रँग भरे कुंज लता तरु पल्लव, शोभा अति अभिराम।
रँग भरे खग रँग भरे द्रुमन पै, टेरत राधा नार्मल
रँग भरी ललित रागिनी गावत, रँग भरी सहचरी बाम।
भोरी हृदय रँग में बोरौ, देहु प्रीति निष्काम।।

(१४६)

बन्दिय चातक मोर चकोरन।

बन्दिय मृग जे सँग लागि डोलत, बंधे प्रेम के डोरन।।
बन्दिय खग जे गुण गण गावत, भीजे प्रीति हिलोरन।
बन्दिय हंस प्रिया पुचकारत, जे अपनाये किशोरन।

भोरी इक-इक रज कण ऊपर, वारिय प्राण करोरन।।

यमुना पुलिन

श्री यमुना पग वंदन कीजै।

कबहूँ बड़े भाग तट बसिये, ताप हिय की छीजै।।

जहँ हिलमिल जल केलि करत नित पिय प्यारी रस भीजै।

केसर मृग मद चन्दन मिश्रित, बड़े भाग्य जल पीजै।।

जूठन खाय थार की रहिये, गाइ-गाइ गुण जीजै।

भोरी के हिय रँग भरी यमुना, प्रीति अटपटी कीजै।।

(१४८)

कब हिय उठै विरह कौ शूल।

व्याकुल हूँडौ जुगल लाडिले, विहरत जमुना कूल।

इकटक नाम रटत निशिवासर, सपनेहु परै न भूल।।

नैन सनीर गात पुलकावलि, सुधि नहिं देह दुकूल।

ऐसी प्रीति देहु अलबेली, भोरी जीवन मूल।।

(१४९)

कब हिय बढै हिये की पीर।
तन मन अति अकुलात आइ कब, बैठहुँ जमुना तीर।।
चहुँ दिस हेरि-हेरि कै टेरत, ढरत नैन सौं नीर।
लोटत भूमि देह रज छाई, विलपत धरत न धीर।।
डगर बगर नहिं नैकु निहारत, ढूढत कुंज कुटीर।
भोरी बिना प्रेम उर आये, धृग-धृग जन्म शरीर।।

(१५०)

यमुना कूल कदम्बन नीचै।
चहुँ दिस हेर-हेर अति दुख सौं, बैठी अँखियाँ मीचै।।
गहरी लेत उसाँस प्रेम कौ, मनौ पयोधि उलीचै।
भोरी विरह-ताप तन सँचरत, दृग जल धार न सींचै।।

(१५१)

यमुना तट कब रात बितावौं।
दरसन आस लुभानी बैठी, छिन न निमेष लगावौं।।
कबहुं हेर-हेर दिस टेरत, नैनन बारि बहावौं।।

व्याकुल गात देह रोमांचित, नाम टेर रट लावौं।।
कबहूँ गुन गन गुनत दयानिधि, बैठि-बैठि अकुलावौ।
यह मेरी आस पुजाइय भोरी, बार-बार बलि जावौ।।

(१५२)

अटकि रहै मन जमुना कूलन।
रचि-रचि माल कंठ पहिरावै, नील सरोरुह फूलन।।
झूलै नैन कदम्बन डारन, रंग हिंडोरे झूलन।
मिल निरवारत बलि-बलि भोरी, अरुझे विमल दुकूलन।।

(१५३)

मन मेरौ भानु सुता तट डोलै।
कानन बात सुनै नहिं प्यारी, मुख सौं कछू न बोलै।।
करि श्रृंगार बदन अवलोकै, रूप छकी छबि तोलै।
पुनि-पुनि तन मन बारत भोरी, गाँठ प्रीति की खोलै।

नवल निकुञ्ज

मन मेरौ नवल निकुंजन डोलै।

जहँ रँग भरी नवल अलबेली, दरपन लै छबि तोलै।
डगर-बगर हठ मिलत अकेले, करत नैन में मोलै।
भोरी किशोरी बदन दुरावत, पिय हँसि घूँघट खोलै।।

(१५५)

भावत मोहि निकुंजन बसिबौ।
दम्पति मुख की छबि दृग देखे, छिन-छिन हिये हुलसिबौ।
तन मन की न संभार किशोरी, जुगल माधुरी फ़ंसिबौ।
हिल मिल कै तेरी बतियाँ सुनिबौ, ओठन सुधा बरसिबौ।।
रस भरी चोज कछू मुख कहिवौ, तुम हँसाय कै हँसिबौ।
सहज कृपालु कृपा बिन भोरी, कबलों बैठि तरसिबौ।।

(१५६)

मेरे मन भावै कुञ्जन रहिबौ।
युगल माधुरी पान निरन्तर, रस की बतियाँ कहिबौ।।
उबटन मज्जन भोग आरती, वस्तु प्रसादी लहिबौ।
निशिदिन तोहि अवलोकत प्यारी, शशि-चकोर गति गहिबौ।।
इतनी हौंस बढ़त उर माहीं, सपनेहु और न चहिबौ।

सहज कृपालु दरस बिनु भोरी, लै लै नाम करहिबौ।।

(१५७)

जहँ राजत नवल निकुंजन प्यारी।

जहँ पग देत महावर मोहन, जहँ हित बाँधत बैनि संभारी।।

ललिता ललित विशाखा राजत, सेवा करत सखी सुख भारी।

जहँ की महिमा वेद न जानत, शिव अज रहत बिचारी।।

जहँ मन-बुद्धि-वचन नहिं पहुँचत, व्याप्त नहीं काल माया री।

भाग्य हीन पामर भोरी की, किस विधि तहाँ होइ चरचा री।।

(१५८)

लाड़ भरी मुसिकात लजीली, झुकि देखत निज पायँ।

लालच भरे लाल के लोचन, ललकि रहे तँह छाय।।

युगल बदन संगम अति सुन्दर, पद पंकज उर लाल।

लालत ललित लाड़िली भोरी, चूमि-चूमि बलि जाय।।

(१५९)

रस फिर गयौ दुहुन पर माई, प्रेम गहर की थाह न पाई।

सावधान सजनी सम्भरावे, बहुत उपायन चेत करावैं।

मीठी जुगति न कछु बनि आई, तब यह तीखी बुद्धि उपाई।।

मान तज मान तज प्यारी, पिय की ओर निहार।

बिनु आगस रूसी काहे, हौंजु पियौं जल बार ॥

(१५९)

बिनु जल क्यों जीवै मछरी, अपने जिय विचार।

तू घन वे चातक प्यासे, व्याकुल करत पुकार।।

आतुर उठ भैटौ हा-हा , जोलों घट में प्रान।

सुन संभर्म चोंकै दोऊ, विरह व्यथा जिय जान।।

सहसा पिय पाई सन्मुख, प्रिया परम अनुकूल।

प्यारी हँसि चितई सादर, पकरि नाह भुजमूल।।

वे जु दुरे चरनन लीन्हें इन जु खेंच हिय लाय।

ऐसै हित डूबत काढ़े , झूँठौ मान मनाय ॥

वह मिलन परस्पर फूलन, झूलन उमगन प्यार।

बलि-बलि हित भोरी, पुनि-पुनि पीवत पानी वार।।

(१६०)

बलि-बलि जाऊँ कोकिल तेरी, प्यारी-प्यारी गावौ री।

मेरौ सौ रँग रूप तिहारौ, मोसौं मनहि मिलावौ री॥
यह जु नाम है जीवन मेरौ, प्यासे श्रवण सिरावो री।
रँग में रँग बढ़ावौ हा-हा, उमगि-उमगि रट लावौ री॥
तन मन प्राण निछावर तेरी, अब न अधिक तरसावौ री।
भोरी हित यह सुधा सजीवन, मेरौ जिय जिवावौ री॥

रसिक संग एवं कृपा बल

रसिक संग बिनु सब ही झूठे।

झूठे मन इन्द्रिय अरु काया, धर्म पुंजी हठ लूटे॥
झूठे राज साज सुख सम्पति, ह्वै-ह्वै सबकौ छूटे।
झूठे कुटुम, बन्धु, सुत, नारी, अन्त जु नातौ टूटे॥
झूठे कर्म, धर्म, व्रत, संजम, हिय न प्रेम रस घूटे।
कठिन घड़ी जब आवत भोरी, सबके भांडे फूटे॥

(१६२)

रसिक संग बिनु प्रेम न होई।

बिनु पद प्रेम भये अलबेली, भव सौं छुटत न कोई॥

कीजै कृपा कृपालु किशोरी, रसिक संग जो पावौं।
जासौं उपजै भाव हिये में, चरण कमल चित लावौं।।
निशि वासर करि तन की सेवा, तन की तपन मिटैये।
तन मन जीवन वारिय भोरी, आँखिन माँहिं बसैये ॥

(१६३)

रसिक रूप रस भीने। रहत सदा रुचि लीने।।
रहत सदा रुचि लीने सेवत, नवल निकुञ्ज निवासी।
जस जग जगमग रीति अटपटी, कुञ्जन करत ख्वासी।।
छबि मधु छके खुमारी निशदिन, रहत चरण चित दीन्हे।
अधम उधारण कारण डोलत, रसिक रूप रस भीने।।
कारण रहित कृपाला। शरणागत प्रति पाला।।
शरणागत प्रतिपाल कृपानिधि, निर्मल जस श्रुति गायौ।
जुगल रूप जग जीव उधारन, अन्तर नैक न पायौ।।
तद्यपि हौं कछु अन्तर मानौं, सो सुनिये नव बाला।
तब पद-धन यह दाता ताके, कारण रहित कृपाला।।
देखन हियौ सिरावौ। तन की ताप भुजावौं।।

तन की ताप भुजावौं प्यारी, चरण कमल हिय राखौं।
नित-नित नव-नव सेवा ठानौं, कोमल बतियाँ भाखौं॥
तिन की कृपा -कोर अलबेली, बान रसीली पावौं।
मूरति भव-भय हरण मनोहर, देखत हियौ सिरावौं॥
कृपा कोर टुक हेरौ। भव भय हरहु घनेरौ॥
भव भय हरहु घनेरौ मेरौ, जुगल प्राण सों प्यारे।
नित नव प्रीति रीति रस छाके, हिय में बसौ हमारे॥
ब्रज कौ बास प्रेम की आसा, हिय में जुगल बसेरौ।
माँगत भोरी गोद पसारै, कृपा कोर टुक हेरौ॥

(१६४)

रसिकन की सत संगत दीजै।
जासौं विमल भाव उर आवै, हियौ प्रेम रस भीजै॥
तन मन धन पद ऊपर वारिय, नित-नित सेवा कीजै।
भोरी भाग्य बड़े सौं कबहुं, जूठन लै लै जीजै॥

रसिक-चित्त -स्थिति

बिनती सुनियो नव नागरी।

अमल कमल पद निरखति सिरात। लोचन सों न विषय
लालचात।।

नूपुर धुनि सचु मानत कान। सुनत न जो श्रुति कथा पुरान।।
मदन कदन विधु बदन निहार। जरत न सो तिय रूप दँवार।।
मृग मद लौं दृग लोभित भाल। परत न सो भव-भँवर विशाल।।
मृदुल हँसन पर वारत प्रान।देखत सो दृग खोलि न आन।।
उमड़त हिय अनुराग अपार। करत न सो तन-बसन सम्भार।।
जगमग-जगमग तिन के भाग। निवहत सो नित प्रीति की लाग।।
भोरी विलपत दरशन चाह। करहु कृपानिधि नेह-निवाह।।

(१६६)

मन मेरौ सुन्दर छवि पर झूलै।

छाकौ पियै प्रेम रस प्यालौ, असन -बसन सुधि भूलै।।

बिरमै विमल कदम्बन छाहीं, हंस सुता के कूलै।

मोहन मूरति देखत भोरी, उमगि-उमगि अति फूलै।।

(१६७)

मन मेरौ रहै प्रेम रस छाकौ।
विरमै मञ्जुल कुञ्जन माँहीं, तट न तजै यमुना कौ।।
रीझ-रीझ कै तन मन वारै, देखत रूप छटा कौ।
हिल मिल डोलत भोरी किशोरी, लाल बिहारी बाँकौ।।

(१६८)

जे जन चरणन के रस पागे। तीन लोक तिन्ह तृण सम लागे।।
छिन-छिन दरसन कौ मन लौभा।तिन कौं धूरि स्वर्ग की सोभा।।
पंकज-पावँ छटा अति भावै। हियरा टूक-टूक ह्वै जावै।।
लीला ललित सदा सुधि आवै।तिनकों कछू न देखि सुहावै।।
युगल मिलन की आसा धारैं।काहू ओर कभू न निहारैं।।
सोचि-सोचि काटैं दिन राती। दुखसौं फटत छिनै-छिन छाती।।
ऐसेन की जो जूठन पावौ। तौ अपनौ सौभाग्य मनावौ।।
विषय पंक में बूढ़त भोरी। करहु कृपा अब सहज किशोरी।।

(१६९)

रूपहि दृष्टि समाय रही री, रूप हिराने नैना।
बानी रूप हिरानी मुख सौं, क्यों कहि आवै बैना।।
रूपहि श्रवन विमोहे ऐसे, शब्द न देत सुनाई।
नासा गंध न सूंघ सकै री, रूप जु घ्राण समाई।।
तनु कौ परस रूप हरि लीन्हौ, शीत उष्ण नहिं कोई।
कहा खात कछु जीह न जानत, स्वाद रूप में खोई।।
अचल भयो मन रूप समानो , सकल कल्पना त्यागी।
फुरत विचार-विवेक न होई, बुद्धि रूप में पागी।।
चित-चिंतन हरि लियो रूप ले, कछु न आवत ध्यानै।
अहं भाव हू रूप समान्यौं, को मैं कहाँ न जाने।।
अखिल विश्व लय भयों रूप में, जाग्रत रूप हरि है।
इक रस स्वप्न-सुषुप्ति-तुरीया, रूपहिं में धगरी है।।
रूप कौ रूप फूल ही दीसत, देखत तन मन फूलै।।
फूल कौ रूप भूल है कैंधौ, फूल अपनपौ भूलै।।
भूलहि भूल अधिक अधिकावै, रूप कौ स्वाद न पावै।
जल के दरस मरै जो प्यासौ, कैसे तृषा बुझावै।।

भूल के सिंधु अथाह रूप रस, प्यास बढ़े उर भारी।
समरथ श्री हित सजनी ताकी, एक पिवावन हारी।।
प्यास अनन्त करौ हियरे में, रूप अनन्त पिवावौ।
भूल अनन्त माधुरी मादक, चाह अनन्त जगावौ।।
उछरि-उछरि कै डूबत फिर-फिर डूब-डूब कै उछरै।
पीवत तृषित रहै हित भोरी, जो हित कृपा करै।।

(१७०)

जो नैननि नैना अरुझाते।

तो लै स्वाति बूँद सीपी लौं, पलक मूँद रहि जाते।।
डूबत अधिक-अधिक गहरे अति, थाह न कबहूँ पाते।
बाहिर कौ कछु दीख न परतौ, अन्धे लौं हहराते।।
जियन मरन कछु समझि न परतौ, सब ही द्वंद नसाते।
हित भोरी का कहिये कैसे, केतौ काल बिताते।।

(१७१)

जो नैननि नैना अरुझाते।

तौ मेरी गति औरहि होती, जो हित मे हित आते।
भूख प्यास नहिं शीत न गर्मी, सुख दुख सकल सिराते।।
बाहिर पंथ दीख नहिं परतौ, कर टटोर मग पाते।
श्रवण शब्द सुनते नहिं मुख सौं, बचन कहत लड़खाते।।
सब तन शिथिल पुलकि झरतौ जल, ज्ञान सकल बहि जाते।
छिन-छिन अधिक-अधिक उमगत हिय, हुलसि-हुलसि बौराते।।
हँसि-हँसि अधिक-अधिक ही हँसते, बार-बार बलि जाते।
जियत मरे बौरे मतबारे, भोरी जगत हँसाते।।

(१७२)

जो नैननि नैना अरुझाते।

तौ नैननि धँसि रहते नैना, नैननि व्यथा सुनाते।
नैननि कुशल बूझते नैना, नैननि पर बलि जाते।।
नैननि पीर समझि कै नैना, उमगि-उमगि भर आते।
नैना बरसत नैना पीवत, नैन तरसि अकुलाते।।
नैनं अथाह पैरते नैना, ना थकते न अघाते।

नैनन हौंस समुझकै नैना, नैनन में मुस्काते।।
नैननि नैन विहार देखते, नैननि नैन सिराते।
नैननि कौ हित जानत नैनां, नैननि धीर बंधाते।।
नैननि व्यथा नैन ही सुनते, नैन नैन उर लाते।
ज्यों-ज्यों नैना नैननि मिलते, मिलन प्यास अधिकाते।।
नैननि की गति अद्भुत देखत, नैना जिय पछताते।।
नैना हँसत नैन ही विलपत, नैना उमगत गाते।।
नैननि की अरुझन नैननि में, तोरत सबसों नाते।
हित भोरी यह दुखिया नैना, जो कबहुँ मिल पाते।।

(१७३)

जो नैननि नैना अरुझाते।
जल में जल ज्यों दीठ-दीठ यों, फिर न कभू विलगाते।।
छिन पल घड़ी याम निशि वासर, मास बरस जुग जाते।
परती खबर न कैहूँ जोपै, कोटिन कल्प सिराते।।
इक टक पलक न लगते कबहुँ, जाग्रत नींद भुलाते।
उमग-उमग उमगत ही रहते, कोयन नीर चुचाते।।

चकित शिथिल गति , थके-थके छवि मतवारे मदमाते।
अन्धे से कछु देख न सकते, टीम प्रकास बिसराते।।
डूबत अधिक-अधिक अति प्यासे, छिन ही छिन बौराते।
हित भोरी हित माहिं समाते, हेरत हुलसि हिराते।।

(१७४)

क्यों विलपत तू बैठि अकेली, कौन सुनै को जानैं।।
जो परि जाय श्रवण हूं कबहूं, को सांची करि मानै।।
मत जु सुनौं मत जानौं मानौं, मोहि विलपिबौ प्यारौ।
नहिं बस चलैं न सूझे कोऊ, दुख में और सहारौ।।
वे जु हँसै झूठी करि मानैं, नावँ धरैं सब मोकौं।
पै का करौं समात नहीं हिय, रुकै न कैसै रोकौं।।
जो चुप रहौं बढै व्याकुलता, बरबस बैठि कराहौं।
मैं कब कहौं हँसौं मत कोऊ, साँची कहौं सराहौं।।
मोहि लगै हिय परम अकबकी, ऊँचे टेर बुलाऊँ।
जो सब हँसे बुरौ कहूँ काकौं, सबकौ मन बहलाऊँ।।
सबनि विनोद मोद हिय मेरे, कछु-कछु धीरज होई।

भोरी हित कछु लेत काहु कौ, निजु दिन काटत रोई।।

(१७५)

मुख चन्द्र की यह चाँदनी, हिय कुञ्ज में छाई रहै।
छवि पान मत्त चकोर अखियाँ, देखि बौराई रहै।।
यह कोर करुणा सिंधु की, लहरी हिलोरत ही रहै।
यह प्रेम की उमगन उमंग जुत, जीय बोरत ही रहै।।
यह बंक चितवन नैन की, हियरा में नित धँसती रहै।
यह चारु छूटी लटन ऊपर, मो सुरत फँसती रहै।।
यह बाँह फरकीली सदा, भुज दीन पकरत रहै।
यह माधुरी के जाल तन-मति, मेरी जकरत ही रहै।।
नख चन्द की यह ज्योति हिय, तम-तोम टारत ही रहै।
यह बाण करुणा की सदा, बिगड़ी सुधारत ही रहै।।
यह आँख मेरी लाडिले, मग रावरौ हेरत रहै।
यह मेरी रसना चातकी, रस-घन तुम्हें टेरत रहै।।
जहँ-जहँ परै मम दीठ जागत रावरी छवि लखि परै।

सोवते-सपने न हिय सौं, आपकी मूरति टरै।।
भोरी हित जन दीन की, बिनती अबसिं यह मानिये।
कोटि जन्मन की भिखारिन, आपुनी पहिचानिये।।

(१७७)

कहा कहौ कछु कही न जाय।
तुम हिय तुम ही दरद हिय कौ, औषध वैद उपाय।।
तुम ही अगनि, जरनि ही हौ, तुम पुनि लेत बुझाय।
तुम ही सुधा हहा विष तुम ही, मारत लेत जिवाय।।
हौं बलि कबहुँ उमगि हित प्यारी, हेरौ मृदु मुसिकाय।
कहा कहौ गति कौन भई यह, मरम न जान्यौ जाय।।
हुती हौंस हियरे लै राखौ, मृदु मूरत दुलराय।
सो न मिली ना ललकन, उलटौ हियरा गयौ हिराय।।
रह गई पीर पिरात, कहारी को विलपत बिललाय।
बिनु जिय-जियत लाड़िली दासी, कहौ कौन पतियाय।।
मृदु मुसिकात छबीली छबि सौं, रहौ दृगन में छाय।

विलुलित-ललित संभारत बारन, भुजा मृनाल उठाय।।
भृकुटि मरोरि तिरीछी चितवन, सुधा सिन्धु बरसाय।
बलि-बलि जात ललित हित प्यारी, प्रियतम हा-हा खाय।।

(१७८)

सब विधि मैं हित की हित मेरे।

परिहरि संक सकुच सब ही की, प्रकट कहत हौं टेरे।।

मैं जानों हित जानत नीकैं,रीझि बोलि लई नेरे।

मतलब नहीं कछु काहू सौं, मिटि गये झगरे-झेरे।।

कोऊ निन्दित कोऊ बन्दत, वृथा बकत बहुतेरे।

अपनौ दूल्हा राजी चाहिए, जा संग पारे फेरे।।

यहै प्रतीति प्रबल उर अन्तर, तदपि न चैन हियेरे।

हित भोरी बलिहार लाडिले, आवहु उमगि सबेरे।।

(१७९)

प्रीति रीति कैसे कहि आवै।

करि बिचार हिय हार रहत हौं, क्यौ हूँ मन न समावै।।

चन्दहि रहत एक टक देखत, सो जग धन्य चकोरी।
टूटै सीस दीठ ना छुटै, तदपि प्रीति अति थोरी॥
तन मन होइ चकोरी चन्दा, शशि ह्वै शशि छबि पीवै।
तौ कछु स्वाद और ही पावै, पियत जु प्यासी जीवै॥
तद्ध्यपि प्रीति इकन्गी कहियै, जहाँ न प्रेमी दोऊ।
उघरहि रस जु चकोरहि, इक टक चाहै चन्दा सोऊ॥
ह्वै चकोर वह चहै चकोरहि, यह चन्दा ह्वै चान्दहि।
छिन-छिन में तन पलटें दोऊ, अरुझि प्रेम के फन्दहि॥
याकौ वामें वाकौ यामें, पलटि-पलटि हित पावै।
छिन-छिन प्रेम पयोनिधि संगम अधिक-अधिक अधिकावै॥
ज्यों द्वै दरपन बीच दीप की, अगनित आभा दरसै।
द्विगुण चौगुनौ फेर अठगुनौ, त्यौ अनन्त हित सरसैं॥
अनुप्रमान अनुमान कह्यो यह, प्रीत बात कछु ओरैं।
ताकी थाह कौन अबगाहै, दुरहि तैं मति बौरै॥
भोरी हित जब द्रवै व्यास सुत, गूंगे लौं गुर खाऊँ।
रोम-रोम भरि रहै मिठाई, ना कछु कहौं कहाऊँ॥

(१८०)

श्री हित कृपा कोर की लीला, मोपै कही न जाय।
अति मीठी अति पैनी कसकै, रोम-रोम गई छाय।।
बिन देखी देखी सी लागै, यह अचरज गति हाय।
मादक बिना पियै मतवारी, निलज फिरौं बौराय।।
जो कोऊ कछु पूछै हा-हा, कहा कहीं समझाय।
अंधेरे कौ उन्माद रूप कौ, कहौ कौन पतियाय।।
रोमनि रोम अग्नि सी व्यापै, तदपि देह न जराय।
जो कोऊ काढ़ि करेजौ देखै, सो समझै उर घाय।।
मन-मन आप-आप ही खीझौं, आप रीझि बलि जाय।
आप ही हँसै आप ही रोवै, फूल उठै मुरझाय।।
होतौ हिय तौ मरम बूझतौ, सोऊ गयौ हिराय।
तौहू पीर कहौ को मानै, बिनु हिय कहा पिराय।।
कोऊ कछु अबलम्ब बतावौ, जैसे विरह सिराय।।
हित भोरी बलिहारी वाकी, जो हित के गुण गाय।

डूबत दीन दुखी दुख सागर भुज गहि लेहि जिवाय।।

(१८१)

हम रूप सुधा रस वारे, कोई का जानैं बेचारे।

पड़े रहत अलमस्त एक रस, छके प्रेम मतवारे।

अटके छबि जनु भौर कंज पर, तन-मन-धन सब हारे।।

भुक्ति मुक्ति अरु कुगति-सुगति लौं भरि दृग छिन न निहारे।

भोरी श्री हरिवंश कृपा बल, जागे भाग हमारे।।

(१८२)

मेरी लटक रही बैनी घुटुअन लौं मोपै नीकैं गुही न जाय।

जौलौं पकरि सम्भारन लागौं, हिय जिय जात हिराय।

रुचिर मनोहर कोमल चिकनी, नागिन ज्यों बल खाय।।

याके फन्द कौन निरवारै, देखत सुरत ठगाय।

गहरु वृथा ही होत टहल में, समुझत जीय पिराय।।

अपनी छबि पर आप सखी री, मन मेरौ पछिताय।

श्री हित रूप प्रसादी रीझन, हित भोरी बलि जाय।।

(१८३)

सहज सुभाव परयौ इन अँखियन, देखत हूँ अकुलाय।

टरत न टारी बदन चन्द्र सौं, पान करत न अघाय।।

छकी मत्त बलि जात रंक तऊ, महा तृषित पछिताय।

रोम-रोम मिलि एक हौंन कौं, अरवराय बौराय।।

डूबत थाह न रूप सिन्धु में, पैरत पार न पाय।

छबि की तुङ्ग-तरंगन झोकन, कहा मीन ठहराय।।

डूबत उछरत रहत निरन्तर, चैन नैकु हूँ नाय।

दरसन हानि अकबकी लागै, जहँ की तहँ न समाय।।

हेरत हहा हिराय जात हैं, अति व्याकुल विललाय।

इनकौं सुख न कहूँ सपनेहूँ, मिली-मिली बिलगाय।।

गद-गद कंठ हियौ भरि आयौ, कोये उमगि चुचाय।

आतुर उठीं भुजा भरि भोरी, चख चूमत बलि जाय।।

(१८४)

हिय के भीतर अरुझैं अँखियाँ, बाहिर कछू न दिखावैं।

हिय के भीतर श्रवण समावै, बाहिर बचन न आवैं।

स्वाद घ्राण रस परस हिये में, बाहिर मन नहिं धावै।।
हिय भीतर प्रगटै हित जोरी, सब द्वारे मूँदि जावैं ।
तब हिय पैठि बैठि हित भोरी, उमगन लाड़ लड़ावै।
हित कौ बन हित की ही जमुना , हित की कुञ्ज सुहावै।
हित के दम्पति हित की सजनी, हित सों हित दुलरावैं।।
भोरी हित हित ही की याचक, कृपा कोर हित पावैं।
हित तन हित मन हित की इन्द्रिय, हित हिय हितहि सिरावैं।।

(१८५)

हिय मेरौ प्यारी भयौ, नैना मोहन लाल।
नैना अटके हिय सौं, हित भोरी बेहाल।।
जब सौं वह छवि हिय गढ़ी, हिय गति कही न जाय।
नित सिरात नित ही तपत, टूटि-टूटि जुरि जाय।।
कठिन पीर है प्रेम की, बिरले जानैं ताहि।
जो जानैं ते कहैं नहिं,सहै सराहि-सराहि।।
ना काहू सौं बोलिबौ, ना कोई ब्यौहार।
अपनी कुंवरि कृपालु कौं, जियत निहार-निहार।।

जिय तोहि ऐसी चाहिये, सब ही कि सहि लेहि।
घट-घट में प्रभु रमि रह्यौ, उत्तर काकौं देहि।।
तन छुटिवे लौं हृद् है, सहि लै मन धरि धीर।
क्यों इतनी ममता करै, कोटिन छाँड़ि शरीर।।
क्यों काहू कौं बाबरे, अपनों दुख सुनाय।
वह हिय में दुःख पावई, तेरी पीर न जाय।।
रे मूरख क्यों चतुर बनि, अरुझत बारम्बार।
भलौ-भलौ कहि छाँड़ि दै, बहु बातन ब्यौहार।।
हठ करि पक्ष न रोपिये, नहिं करिये उपदेस।
सब सों नमि नीचे रह्यौ, छाँड़ि बड़पन लेस।।
सब ज्ञानी सब ही चतुर, उर प्रेरक हित-चंद।
कहैं-करैं सो सब भली, तू न बोल मति मंद।।
कठिन पीर है प्रेम की, बिरले जानें ताहि।
जे जाने ते कहैं नहीं, सहै सराहि-सराहि।।
जब सों वह छवि हिय गढ़ी, हिय गति कही न जाय।
नित सिरात नित ही तपत, टूटि-टूटि जुरि जाय।।

आत्म -निवेदन

हरिवंश हित जोरी उमगि, ऐसी कृपा मोपै करौ।
परिजाय यह जु सुभाव सहजहि, कबहुँ अन्तर परौ।।
जे नाम मुख सौं लैहि तुम्हरौ, उमगि तिन पायन परौं।
तिन सौं सदा आधीन बनौं, दीन वाणी उच्चरौं।।
छवि रावरी देखत उमगि जे नैन जल भर लावहीं।
तिन दरस इक टक करत कबहुँ, नैन मम न अघावहीं।
जे प्रीति सौं रस रीति के, मृदु गीत उमगत गावहीं।
ते प्राणहू के प्राण लागैं, सदा हिय मम भावहीं।।
अपराध मन क्रम वचन तिनके, कबहुँ जिन करबाइयो।
जैसे लहैं सुख सोई करौं , यह बुद्धि जिय उपजाइयो।।
अभिमान तिन सौं ना करौं, कबहुँ बराबर ना बनौं।
मत्सर न कबहुँ होय तिन उत्कर्ष हिय लखि सुख सनौं।
जो त्रासन कोटिन दैहिं मोकौं, शस्त्र लै लै मारहीं।
तऊ भाव बढतौ ही रहै, जिय लेश दुख मानैं नहीं।।
नर-नारि साधु-असाधु राजा-रंक जिय में न धरौं।

जन रावरे जिय जानि मैं तौ दौरि पायँन ही परौ।।
अति पातकी अति स्वार्थी लंपट न जिय जानौं तिन्हें।
जन जानि तुम्हरे नाथ तुम हूं ते अधिक मानौं तिन्हें।।
मोसौं सदा सुख ही लहैं , मोपै कृपा नित ही करैं।
यह बीनती साँची करौ, मेरी न वे सुधि बिसरैं।।
तिनकौ न छोड़ौं संग चाहे विश्व सब निन्दा करै।
तिनसों न होय कुभाव तिनमें कोउ न अवगुण लखि परै।।
जौलौं जियो तिन संग रहि, तिनकी कृपा अनुभव करौं।
हित भोरी तिनके ढिंग मरों, ह्वै छार तिन पद पर परौं।।

(१८७)

भव सिंधु बही हौं जात।

बार-बार हरिवंश लाडिले, टेर-टेर अकुलात।।

नाना भौर तरँग कामना, इत उत गोता खात।

भोरी तुम सौं क्यो बन आबै, खड़े-खड़े मुसिकात।।

(१८८)

ऐसी क्यों बनि आवत प्यारी।

तुम ठाडो तट पै मुस्कावत, हौं डूबत भव सिंधु मंझारी।
व्याकुल चित्त शिथिल सब देही, परी भँवर हौं पैरत हारी।।
अब विलंब जिन करहु लाड़िली, पल-छिन कठिन जात
सुकुमारी।

हौं भोरी पीछै पछितै हौ, आप आपनी ओर निहारी।।

(१८९)

मोहि टेरन की कछु बान परी री।

दानी बड़ी सुनी त्रिभुवन में, तासों द्वार पै आइ अरी री।
टरिहौं नहीं न याचहुँ औरें, अब तेरे द्वार डरी सो डरी री।।
अजरज हौं कब की जु पुकारत, भनक न अजहु कान परी री।।
तब हूं तौ मोरी बनि आई, हो भोरी यह कीर्ति खरी री।
कहि हौ बिकल कबहुँ इक कोऊ, भोरी टेरत तलफ मरी री।।

(१९०)

मोहि परी अडिबे की बान।

तुम अजहुँ हेरत न कृपा करि, मैं टेरत हठ ठान।।

तुम पर हार जन्म हौं बैठी, श्री पद शपथ प्रमान।
अब बलिहार नैक हँसि हेरौ, भोरी आपनि जान।।

(१९१)

कोमल चित्त लाड़िली प्यारी, क्यों निष्ठुरता आनी।
कारण रहित कृपाल सुन्दरी, सर्वोपरि महारानी।।
अधम उधारन प्रगट लोक तिहुँ, कोमल चित ठकुरानी।
मेरेहि ओर न देखत अजहुँ, हौं टेरत अकुलानी।।
आपनि बानि न छांड़िय भोरी, मोहि अभागिन जानी।।

(१९२)

अब मैं काहि सुनावौं टेरी।
श्री राधावल्लभ लाल लाडिले, ओर सुनै को मेरी।।
यह संसार मूँज-बन भटकत, विपत सही बहुतेरी।
अब पद कंज छाड़ि मन मधुकर, कित ले जावौं फ़ेरी।
नहिं माँगौ बैकुण्ठ स्वर्ग कछु, माँगत लाज हियेरी।
भुक्ति-मुक्ति कौ भार चलै क्यों, क्षीण अवस्था मेरी।।

प्रीति रीति परबीन जुगल वर, गत जानों हिय केरी।

लाग्यौ नेह निहाहव भोरी, कृपा कोर सौं हेरी।

(१९३)

प्यारी हो, मेरौ हृदय अकुलावै।

जमुना तीर मूंद दृग अब कब, चरण कमल चित लावै।।

अरबराय दृग खोलि निहारत, आरत टेर सुनावै।

कबहुँ भाग सराहत अपनौ, रीझि-रीझि गुन गावै।

कबहुँ समझि अभाग सहमि, दृग जल ढारत मुरझावै।।

आयु सिरानी जात छिनहि छिन, धीरज नैक न आवै।

मन माने मन करत मनोरथ, हौंसन जन्म गवावै।

सहज कृपाल स्वामिनी भोरी, छिन इक दरसन पावै।।

(१९४)

सुनि राधे तोहि ऐसी न चाहिये।

कब लौं नरक सरिस विषयन में, दारुण दुख सहैये।।

कब लौं कोटि प्रलय सी स्वामिनी, विरह अग्नि तनु दहिये ।।

भोरी की स्वामिनी अलबेली, हठ बरबस भुज गहिये।

जन्म-जन्म लागि सहज किशोरी, नित नव नेह निबहिये।।

(१९५)

सुनौ विनय दे कान नवेली।

नंद-नन्दन बस करन राधिके, छबि निधि गरव गहेली।।

तौ बल साधन धर्म-कर्म-व्रत, निगम-नीति हठ ठेली।

सहज कृपालु कृपा घर बैठे, चाहत लूट सकेली।।

भोरी पावँ पसारे सोवत, सिर स्वामिनी अलबेली।

(१९६)

कब तौ लाड़िली द्रवहु दया करि।

मेटहु विषम जगत की ज्वाला, सजल जलज से चरण हृदय
धरि।।

सूझ परत न साधना कोऊ, चहुँ दिशि हेरत टेरत डरि-डरि।

भोरी मूर्छि परि तेहि भेटिय, लै उठाय उर लाय भुजा भरि।।

(१९७)

टेरि सुनौ वृषभान किशोरी।

बीती वृथा आयु बहुतेरी, शेष रही अति थोरी।।

मन अकुलात उपाय न सूझत, शरण गही दृढ़ तोरी।
भोरी सहज कृपालु निहारौ, नैक कृपा की कोरी॥

(१९८)

तुम तौ दीऊ रहत रस छाके।
नित नव हास विलास रास रस, मगन सदा सुख ताके॥
भोरी आरत टेरत द्वारे, बचन सुनै को ताके।
प्राण की लाज कृपालु सुन्दरी, हरौ अशुभ-शुभ वाके॥

(१९९)

हो प्यारी यह मांगे जु दीजै।
नित पद लग्यौ रहै अनुरागै, ऐसौ मो मन कीजै॥
मैं जु चहत तोहि भेंट चढावन, सो बरबस लै लीजै।
हौं हारत निज तन-मन-जीवन, जीति आपनों कीजै॥
भोरी हित पद-कंज छटा कौ, आसा धरि-धरि जीजै॥

(२००)

ऐसौ शुभ दिन कबहुँ जु आवै।
जमुना तट पै विकल विरहनी, दृग जल धार बहावै॥

जब दृग मूँदि उच्च स्वर टेरौं, स्वामिनी मृदु मुसिकावै।
जब हौं विकल परौं धरणी पै, भुज गहि आइ उठावै।।
कोटि चन्द्र छबि बदन मनोहर, मृदु मुसिकान सुहावै।
भोरी छिन दृग दरसन आसा, बार-बार ललचावै।।

(२०१)

कब हौं कुञ्ज गली चलि जैहौं।
लै लै नाम पुकारत आरत, चहुँ दिसि चकित चितैहौं।
दरसन लोभ मगन हौं इक टक, हेरत पल न लगैहौं।।
आवत परम कृपालु स्वामिनी, लोट पन्थ में जैहौं।
भोरी अधर अरुण रँग रंजित, मुसिकन दृगन बसैहौं।।

(२०२)

देखत-देखत दिन सब बीते।
तुम अटूट अनुराग की दाता, हम अजहूँ रीते के रीते।।
हृदय न प्रेम न नैम नाम कौ, साधन सकल तजे अबहीते।
बिनु पद पंकज भोरी स्वामिनि, कितहूँ ठौर न ठीक सुभीते।।

(२०३)

बीत गये दिन सोच न अबहूँ।।

ध्यान कियौ छिन नाम लियौ ना, हृदय न भाव भयौ कबहूँ।

सन्त मार्ग तजि छाड़े कुल ब्रत, और कुकर्म किये सबहूँ।।

ठाँव न कोटि नरक में दीसत, नहिं पछितात बैठिकै लबहूँ।

भोरी की स्वामिनी अलबेली, चरण कंज की आसा तबहूँ।।

(२०४)

शरण-शरण कहि आरत ठानी।।

किये कुकर्म कोटि विधि जग में, प्रीति रीति बिनु सहमि सकानी।

लोक-वेद की रीति न जानी, निशि दिन विषय रही लपटानी।।

अब सूझत सब ही अँधियारौ, आयु सिरात जानि पछतानी।

तामस तन कछु भजन बनत ना, चरण विमुख मति अवगुन
खानी।।

तिन भय विकल काँपत तन भोरी, दीन पुकार करी घबरानी।

कोमल चित्त कृपाल स्वामिनी, आरत टेर करत अकुलानी॥

(२०५)

चकित चितै चहुँ ओर पुकारी।

गहन विपिन संसार माहिं चहुँ, लागी विषय दवारी।

जरत देखिये साधन सब ही, भक्ति आदि सुखकारी॥

कितहुँ न ठौर भृमत मन मेरौ, पल छिन बीतत भारी।

त्राहि-त्राहि शरणागत भोरी, श्री वृषभान दुलारी॥

(२०६)

माई मोकौं बधिक भयौ मन मेरौ।

विषय डोर सौं बांधे मोकौं, खेंचि खेंचि झकझेरौ॥

दै-दै घाव तलफिवौ देखै, नित-नित नयौ बखेरौ।

कोटि जन्म कौ बैरी अजहुँ, करत न हाय निबेरौ॥

तिहि भय विकल पुकारत आरत, भोरी मोतन हेरौ।

सहज कृपालु अभय करि दीजै, श्री पद माहिं बसेरौ॥

(२०७)

रोकत चित्त रुकत नहिं प्यारी।

विषय प्रवाह बह्यौ ही जावै, रोकि-रोकि हठ हारी।
हौं असमर्थ न कछु बन आवै, लगत नैन अंधियारी।।
लीजै खेंचि कृपालु कृपा करि, प्रेम पाश गल डारी।
भोरी की अलबेली स्वामिनि, सब विधि राखन हारी।।

(२०८)

मो मन मोहि नित नाच नचावै।
विषयन में भटकै निशि बासर, नित नव त्रास दिखावै।।
हौं तासौं अति आरत टेरत, तो बिनु कौन छुड़ावै।
भोरी स्वामिनि बेर न कीजिय, तन मन अति अकुलावै।।

(२०९)

श्री वृषभान लाड़िली प्यारी, अब जिन बिलंब लगावौ।
मैं घबरात परी विषयानल, बेगि धाई किन आवौ।।
हौं त्रयः ताप तप्त अति विह्वल, सो तुम सहज मिटावौ।
कोमल कमल चरण अति शीतल, हिय धरि हृदय सिरावौ।।
मो मन चञ्चल इत उत दौरत, तिहि निज रूप फँसावौ।
विषय महाविष पियत बरजि हठ, प्रेम सुधा रस प्यावौ।।

हैं इतनी जु कृपा करि, छिन इक सन्मुख आवौ।
कोटि चन्द द्युति फीकी करि कै, मंद-मंद मुस्कयावौ।।
प्यासे नैन चकोर वदन विधु, माधुरि पान करावौ।
मनमोहन मन हरन महाछवि, सो मम हृदय बसावौ।।
अधम उधारन सहज कृपानिधि, भुजा पकरि अपनावौ।
भोरी की अलबेली स्वामिनि, त्रिभुवन सुयश बढ़ावौ।।

(२१०)

हरि-हरि जन्म बीतयौ जात।

योग यज्ञ जप साधन संयम, सब ही कठिन दिखात।।
भक्ति न भाव न नेम नाम कौ, चित्त न छिन ठहरात।
विषय मत्त निज दशा निहारत, हैं पुनि-पुनि पछतात।।
बहु विधि यत्न हेरि हैं हारी, कछु नहिं बनत दिखात।
भय व्याकुल लै नाम तिहारौं, टेर-टेर अकुलात।।
भोरी की अलबेली स्वामिनि, सुनि-सुनि मृदु मुसिकात।।

(२११)

कटि कसि मुकुट सम्भार स्वामिनी, वेगहि आवहु धाई।

विषय अग्नि की ज्वाल जरत तन, भोरी अति घबराई।।

हेरत दिशा नाम लै तेरौ, आरत टेर लगाई।

यह उद्धार समय है वाकौ, दुख अब सह्यौ न जाई।।

इतनी करहु कृपालु स्वामिनी, छिन इक प्रगटौ आई।

मन्द हास्य मुख कंज माधुरी, देखि जु नैन सिराई।।

सोई स्वरूप दृग भरौ सदा ही, सोई चहुँ ओर दिखाई।

रोम-रोम रमि रहै लाड़िली, तौ सब भाँति भलाई।।

पुनि न स्वर्ग वैकुण्ठ चहत कछु, नरकन सौं न डराई।

लीला नाम रूप जो तुम्हरौ, तिन मन रहै समाई।।

सेवा करै मगन मन निशि दिन, बहु विधि लाड़ लड़ाई।

गावत गीत माधुरी छाकी, लीला ललित लुभाई।।

करत मनोरथ बहु विधि नित-नित , तेरी आस सदाई।

अधम उधारन सहज कृपा करि, देहु जु आस पूजाई।।

जानत हौं सब ही बनि ऐहै, स्वामिनि तोरि बनाई।

भोरी बलि अलबेली अब ही, प्रगट करहु प्रभुताई।।

(२१२)

बैठी कहा रूप गर्वीली।

नँदनन्दन मन हरण लाड़िली, वारिज मुख पर भौँह लचीली॥

अधर बिंब रंजित मृदु हाँसी, शरद कोटि विधु बरन छबीली।

चिकुर चन्द्रिकन बीच अरध विधु, चिबुक चारु दृग चपल
रसीली॥

कोमल तनु कोमल मन प्यारी, प्रीति रीति सँकोच लजीली।

हौँ बूड़त भव सिंधु माँझ अब, थकि-थकि देह भई सब ढीली॥

है इतनी उर उमंग लाड़िली, छिन इक देखौँ रंग रंगीली।

हा-हा अब विलंब नहिं कीजै, मत तरसावौ दिल दरदीली॥

भोरी की अलबेली स्वामिनि, श्याम सुन्दर रस रसिक रसीली॥

(२१३)

अब मोहि कछु ऐसी जान परै।

हौँ जु पतित सब भाँति अभागी, स्वामिनि नहीं निज ढरनि ढरै॥

कांपत देह त्रास हिय भारी, अब न चित्त छिन धीर धरै।

साधन नेम न ठौर ठिकानौ, व्याकुल द्वार पै दीन ररै॥

कहौ कृपा करि कै अलबेली, भोरी शठ कित जाइ मरै॥

(२१४)

आपनि दिस देखत त्रास बढै।

नीची अति सब ही पतितन में, का बनाय कै बात गढै।।
का मुँह लै बिनती हठ ठानै, लाज सौं बैन न एक कढै।
अलबेली जु रुचै सोई कीजै, अब तौ भोरी असीस पढै।।

(२१५)

का मुँह लै बहु बिनय सुनावै।।

सबै भाँति पतितन में नामी, गढ़ि-गढ़ि कै बात बनावै।
झूठी प्रीति चलै किमि तोसौं, कैसे कौन कुकर्म छिपावै।।
विषयन में घूमत नित भोरी, भक्ति किये बिनु अति पछतावै।
याहू पै अचरज न कछू जो, अलबेली हँसि पार लगावै।।

(२१६)

विषय दवार लगी जग बन अति घोर।
सुनहु कुञ्ज सुख पुञ्ज सु शीतल छाँव।
जमुना कूल कदम्बन स्वामिनि मोहि बसाव।।

भजन नहीं अनुराग न ठीक न ठाँव।
ताकों बास बतावहु बरसानौ निज गाँव॥
मो मन ऐसौ करौ कृपा की कोर।
तजि पद पंकज विषय में कबहूँ रमै न फेरि बहोरि॥
नाम रटत निशि वासर झूमत नैन।
गाबत डोलौं ब्रज में श्री राधा जस बैन॥
रहसि निकुञ्ज देखि गोवर्धन भूमि।
फटै हृदय विरहाकुल पुनि-पुनि गिरौं जु भूमि॥
तुम हिय बसौ न दूजौ छिनहु दिखाव।
भाल कु अंक मेटि हठ भुजा पकरि अपनाव॥
दरस चटपटी बाढ़ै प्रेम अभंग।
आइ मिलौ तब कबहूँ लै नट नागर संग॥
श्याम तिलक पट श्यामा नदी सुहाइ।
श्यामा नाम आप लिय श्याम सौं नेह लगाइ॥
श्याम हृदय मम तामें नीके वास।
आइ करहु अलबेली मेटहु त्रास॥

टेढौ वेष भृकुटि तिमि लोचन रंग।
टेढी मूरति टेड़े ही कौ निशि दिन संग।।
टेढी मति अति मेरी टेढौ हीय।
टेढ़े आइ अडौ तहँ दोऊ प्यारी पीय।।
मिटै सोच नित नव-नव होइ हुलास।
भागै दूर अभाग तम देखि चरन परकास।।
विनवत नित-नित भोरी आरति ठानि।
सुनि कृपालु अलबेली स्वामिनि मृदु मुसिकानि
(२१७)

सुन मेरी विनय छबीली राधा, तू तौ करुणा सिन्धु अगाधा।
मैं सब भाँतिन अधम अभागी, तो पद -कंज नहीं अनुरागी।
सकल भाँति विषयन में पूरी, प्रीति-प्रतीत भजन सौं दूरी।
बीती आयु समुझि पछताती, तौहू फटै न दुख सौं छाती।
तू सब भाँति राखिवे वारी, सर्वोपरि अलबेली प्यारी।
नँदनन्दन बस करन छबीली, सहज कृपानिधि दिल दरदीली।

देखहु सहज कृपा की कोरी, विपिन विहारिन नवल किशोरी।
मेटहु सब भव ताप हमारी, सीतल चरण कंज हिय धारी।
भय सब हरौ नेंक हँसि हेरौ, हस्त कमल सिर ऊपर फेरौ।
चन्द्र बदन नीकी मुस्कावन, दृष्टि कृपामृत रस सरसावन।
छिन इक दरस दिखावौ नीकौ, सब सुख सिन्धु भांवती जीकौ।
साधन -साध्य न और सुहावै, दरस लालसा दृग अकुलावैं।
बार-बार विन्वौं कर जोरी, चरण शरण हठ राखिये भोरी
(२१८)

सुन्दर श्याम सौं सीख उपाई।
दुखिया दीन सभीत लाड़िली, हौं तोहि याचन आई।।
वाकौं बकी पयोधर लिप्टयौ, दीन्हौ गरल पिवाई।
तो पद कंज सजीवन हिय धरि, विष तन दियौ मिटाई।।
हौं जो विषम विषय विष पीयौ, हृदय ताप अधिकाई।
सोई चरण चहौं लै राखौ, तप्त हृदय सौं लाई।।
सो नाथयौ अहि-नाथ कालिया, त्रिभुवन भई बड़ाई।

तब पद नख-मणि मंजु छटा सौं, विष की व्यथा न पाई।।

हौं संसार महा अहि काटी, तासौं अति घबराई।

सोई पद नख-मणि छटा लाड़िली, याचत विनय सुहाई।।

दावानल तिन पान कियौ हौ, अग्नि प्रबल सुख पाई।

सजल जलज पद युगल तिहारे, सहजहि ताप बुझाई।।

हौं त्रय ताप तपत निशि वासर, पीर प्रचण्ड सदाई।

सो पद सीतल कंज कृपा करि, हिय पर धारौ आई।।

इन अति कठिन कुरोगन कौ कहूँ, कछु उपचार न माई।

तू तौ है अलबेली स्वामिनि, विश्व विदित प्रभुताई।।

देखि बिलम्ब भई अति व्याकुल, रोवत टेर सुनाई।

भोरी सहज कृपालु किशोरी, करुणा कहाँ भुलाई।।

(२१९)

आज लौं लखी न नैन , आसहू कछू परै न,

कौन भाँति धीर धरौं , कृपा सिन्धु स्वामिनी।

फाटत नहिं हीय हाय , छिन-छिन प्रति घटत आयु,

विषयन में नयौ नेह, बाढ़त नित भामिनी।।
खान पान सोई ठाठ, प्रेम की मिली न बाट,
सोच-सोच दिन कटै न, रोइ-रोइ जामिनी।
भोरी दृग बार-बार , व्यर्थ जन्म जिय विचार,
अब तौ इक आस तोरी, नँदनन्दन कामिनी।।

(२२०)

मन में नहिं लाज नेंक, चित्त में न प्रेम टेक,
सूझत नहिं यत्न कोऊ, बीतत दिन सकल जात।
विषयन रँग नैन रँगै, झूमत नहिं प्रेम पगे,
बोलत नहिं रुकत कण्ठ, इत उत बहु करत बात।।
बाढ़त ना प्रेम हाय, विषयन चित फँसत जाय,
बीतत सब जात आयु, साधन ना कछु लखात।
भोरी अति बड़ अभाग, चरनन नहिं प्रेम लाग,
अब तौ सब भाँति लाज, स्वामिनि इक तेरे हाथ।।

(२२१)

देखन दै नैक छटा नीकी।

चहुँ दिशि ललित भूमि हरियाली, ऊपर झुकी घटा नीकी।।
चपला कोटि दिव्य द्युति मूरति, ठाड़ी मंजु अटा नीकी।
पल में हठ अपनाइय भोरी, निगम की रीति हटा नीकी।।

222

दरसन दै नैक बिहँसि प्यारी।

सहज कृपालु लाड़िली राधा, सर्वोपरि सुखकारी।।
जीति लियौ घनश्याम लाडिलौ, विहँसि अपुनपौ हारी।
वृन्दावन रजधानी राजत, तीन लोक सौं न्यारी।।
शिव सनकादिक सन्त मुनि महिमा, रहे विचार विचारी।
पचि हारे श्रुति बरनि-बरनि कै, क्यों हू न पायौ पारी।।
उमा रमा ब्रह्मादि भवानी, चाहत चरण छटारी।
त्रिभुवन विदित कृपालु किशोरी, सब्कौं राखन हारी।।
युग-युग पतित अनेक उधारे, जस गावत श्रुति चारी।
भोरी ओर कृपा करि हेरौ , श्री हरिवंश दुलारी।।

223

बिनु देखे किमि होवै प्यारी नेहु,
तासों नैक नैन भरि दरसन देहु।
तिरछी चारु नजरिया मृदु मुसिकान,
उर में गड़ै नैन छिन लखै न आन।
कुटिल भौंह मुख कंज सुभग कच चारु,
छिन इक भरि दृग प्यारी लेहु निहार।
पुनि न बिसरिहौं कबहूं सुन्दर रूप,
हिय में नित्य वसैहौं छटा अनूप।
जबही हीय आइ है मृदु मुसिकानि,
तब कि लोक श्रुति रीति रहै कुलकानि।
जबहि माधुरी पिये बढै उन्माद,
भाजै तुरत अभाग धर्म-मरजाद।
जब पद पंकज रस मन रहै लुभाई,
विषय महाविष चाखन फिर क्यों जाई।
कठिन प्रीति की रीति सुगम अति ताहि,
छिन इक दर्शह देहु प्रगट ह्वै जाहि।

तासौं टेर-टेर नित बिनवत भोरी,
देहु दरस नित बिनवत भोरी, देहु दरस अलबेली नवल
किशोरी।।

224

जो कहूँ चरण कमल रति होवै।
तौ क्यों भटकत विषय गहन बन, जन्म अकारथ खोवै।।
तौ क्यों मित्र सभा मिलि बैठे, दीन भयौ युवती मुख जोवै।
करै कुकर्म कहौ कस दिन भर, रात निसंक कहौ किमि सोवै।।
हौं पछितात यही नित सोचत, कैसे चरण कंज मन लोभे।
कैसे हिय में लगै चटपटी, दरस प्यास निसि वासर रोवै।।
कैसे पुलकि-पुलकि गुण गावै, भाल कुअंक कौन विधि धोवै।
करहु कृपा अलबेली भोरी, तुम बिन कौन अशुभ सब खोवै।

225

दीजिये मोहि नेह की वान।
व्याकुल प्रेम अधीर निरन्तर, पुलकन रुदन हेर पछितान।

छिन-छिन मगन भाव मिलिवे के, प्रफुलित गात हर्ष
मुसिकान।।

छिन-छिन जरत हियौ विरहानल, सहमि सूखि गिरीबौ मुरझान।

कबहूँ गदगद कंठ हर्ष सौं, रीझि-रीझि जस निर्मल गान।।

कबहूँ विरह पीर अति गाढ़ी, गुण गण गिन-गिन दिवस सिरान।

अड़त चकोर चन्द्र पै जैसे, रहत भौर ज्यूँ कज्ज लुभान।।

त्योँ निशि बासर मत्त एक रस, रूप माधुरी करिबौ पान।

झूमत नैन अधिक श्रम चलिबौ, बैन सिथिल कछु सुनत न
कान।।

मत्त गयंद मनहुँ रस छाके, चले छाँड़ि कुल-कान अलान।

अति अलमस्त सबन सौं न्यारे, रहत अनन्य पतिव्रत ठान।।

एक नाम हिय रहत समायौ, एक रूप पर वारत प्रान।

मुदित सम्भारत कच मुख छूटे, श्रवनन सुनत सरस् बतरान।।

श्री हरिवंश चरण बल हिय में, श्यामा चरण-कज्ज अभिमान।

याचक भोरी आस पुजावौ, दिल दरदीली कृपा निधान।।

हो प्यारी, यह दीजिये दान।

जैसे दृगन हेरियत नित ही, जैसे झार बैठियत थान।
जैसे श्रवनन सुनियत शब्दन,, तृषित कीजियत ज्यों पय पान।।
हाथ धोइ ज्यों करत रसोई, जैसे पीवत पानी छान।
हो प्यारी कबहूँ मोहि दैहौ, ऐसेहि सहज रसीली बान।।
निशि दिन रूप सुधारस पीवौ, प्रेम छकी करिबौ गुन गान।
नई-नई छवि नित्य हेरिबौ, नित्य बारिबौ कोटिन प्रान।।
कीजै विनय कान अलबेली, गरव गहेली कृपा निधान।
रसिक रसीली भोरी किशोरी, मंडन विमल वंश वृषभान।।

227

विनय करत मेरी बनि आई।

येहु बड़े भाग्य जो प्यारी, याचक तोरि कहाई।
याचक सबहि जगत में जेते, सुर-नर-मुनि समुदाई।।
मोसौं बड़ौ न याचक कोऊ, का मुख कहौं बड़ाई।
जाकौ जाचत श्याम लाडिलौ, तीन लोक कौ साई।।
भूरि भाग्य सौं भरी लाडिलौ, हौं तोहि जाचन आई।

यह तौ बात सबै विधि मेरी, अति आछी बनि आई।।
और द्वार मन जाइ न छिन अब, यह वर माँगहु माई।
दीजै सहज कृपा करि भोरी, सुनि श्यामा मुसिकाई।।

(२२८)

जब पावँ तुम्हारे देखौं, तब जन्म सुफल चरि लेखौं।
जब पीर उठै हिय गाढ़ी, तब जानहुँ कछु रति बाढ़ी।
जब निशि दिन हृदय बसावौं, तब अपनौ भाग मनावौ।
जब देखि कै नैन सिराउं, तब आपनि आस पूजाऊँ।
जब टेरि कै पास बिठावौ, तब जिय की त्रास मिटावौ।
जब बाँह गह्यौ हँसि नीकी, तब करहु भांवती जीकी।
जब आइ भुजा भरि भेटौ, तब सूल हिये कौ मेटौ।
जब हेर कै अंक लगावौ, तब तन की ताप बुझावौ।
जब बाँह पकरि अपनेहौ, तब सब सौं नेह छुड़ैहौ।
जब लगि नहिं आस पुजैहौं, तब लग नित टेर सुनैहौ।
तब लग मैं परम अभागी, जब लग नहिं पावँ सौं लागी।
इति गदित भोरी अकुलाई, तुम छमियो मोरि ढिठाई।।

(२२९)

कुमति कुटिल पन सब हरियो।

रँग रँगिली सौं रँग बढै नित, रँग रँगिले कृपा करियो।।

रसिक रसीले ससि सरसीले, दिल दरदीले अवसि ढरियो।

भोरी प्यारी पद रस चाहत, हठ कर भुजा पकरियो।।

230

अजहूँ कस न उठत अकुलाई।

डूबत भव निधि माहिं छिनक में, कठिन घरी चली आई।

थकि-थकि शिथिल भई सब देही, बनि नहिं परत उपाई।।

दरसन कौं तरसावत अबहूँ, फिर रहिहौ पछिताई।

कोमल चित कृपालु बलि भोरी, दया सिन्धु सुखदाई

(२३१)

जो कबहूँ मुख देखन पावौं।
इकटक रीझ रहौं वा छबि पर, छिन न निमेष लगावौं।।
ताही रँग रँगौ दोऊ अखियाँ, पुतरिन माँहिं बसावौं।
छिन-छिन पियत सरुप माधुरी, इक रस धौंस गंवावौं।।
नाचत हँसत मत्त रस छाकी, डोलत जगत हंसावौं।
भोरी सपनेहु आन न देखौं, देह-गेह बिसरावौं।।

(२३२)

कबहुँ नैन भरि रूप दिखावौ।
नैना दरस रूप रस प्यासे, अब न बहुत तरसावौ।।
मृदु मुसिकान मनोहर आनन, तनक-तनक दरसावौ।
भोरी व्याकुल बिलपै कब लागि, सपने नेंक हंसावौ।।

(२३३)

हिय में आइ बसौ वर जोरी।
दीन्हें जुगल विमल गलबाहीं, सोभा सुखद न थोरी।।
मंद-मंद मुसिकात लाडिले, नागर नवल किशोरी।

भोरी श्री हरिवंश चरण बल, आस पुजावौ मोरी॥

(२३४)

रसना कौ अब नाम मिटावौ।

कै यह सरस् करौ रस दाइनि, कै जर सौं उपटावौ।

बहु बकवाद स्वाद सौं रोकौं, आपन नाम रटावौ॥

पर निन्दा पर अस्तुति बरजौ, निज गुन-गन प्रगटावौ।

भोरी दासी मूक भली नतु, जर सौं याहि कटावौ॥

(२३५)

नूपुर की झनकार सुनावौ।

हौं व्याकुल दृग मूंद पुकारत, रुनक झुनक चलि आवौ॥

तन मन अति अकुलात दयानिधि, धीरज आइ बंधावौ।

भोरी बलि अलबेली कबहूँ, सपने दरस दिखावौ॥

(२३७)

मन मेरौ बार-बार ललचावै।

लोचन रहत रूप के प्यासे, धीरज नैक न आवै॥

उर में बढ़त विरह दिन दूनौ, असन बसन नहिं भावै।

भोरी परम कृपालु स्वामिनी, सपने दरसन पावै।।

(२३८)

दरसन दीजै नैक दया कर।

हास-चाँदनी हँसि छिटकावौ, मेटहु हिय कौ तिमिर कृपा कर।।

भव की ताप मिटाइय प्यारी, चितबहु नयन कोर करुणाकर।

भोरी दृग रस विकल चकोरी, अलबेली मुख विमल सुधाकर।।

(२३९)

मधुर-मधुर हँसि बचन सुनावौ।

श्रवन माधुरी रस के प्यासे, तिन्हें सुधारस प्यावौ।।

दसन चाँदनी जग विस्तारौ, दृग कौ तिमिर मिटावौ।

अधर अरुणई विमल छटा सौं, हृदय प्रेम सरसावौ।।

रूप सुधारस बरसि-बरसि कें, सब भव ताप मिटावौ।

नैन कृपा रस बरसत भोरी, सबहिं भाँति अपनावौ।।

(२४०)

रंग रंगीली के रंग रँगौंगी।

अब लगी सोवत रही लुभानी, अब तौ अवसि जगौगी ॥

अब न काहु की ओर चितेहौं , दृढ़ ह्वै पगन लगौगी ।
या विधि सोचि-सोचि कै प्यारी, प्रीति के दाग दगौगी ।
भोरी बलि हँसि कहौ कृपानिधि, कब हौं प्रेम पगौंगी ॥

(२४१)

नैननि बसौ नवल नवेली ।

वृन्दावन रजधानी राजत, जुगल करत नित केलि ॥
दोरु मिलि कुञ्ज-निकुंजनि डोलत, भुजा अंस पर मेली ।
जीति लियौ घनश्याम लाड़िली, तिहि बल गरब गहेली ॥
तो बल निदरि वेद के साधन, सन्त सीख हठ ठेली ।
अब गहि भुजा राखिये भोरी, बिलपत बिकल अकेली ॥

(२४१)-२

या जीवन कौ करौं कहा री ।

बिन नख चन्द छटा अलबेली, तिहूँपुर अति अँधियारी ॥
नैन पसारि कहा अब देखिय, सुनिये कान पसारी ।
कौन भाँति मन धीरज धरिये, बैठि बिचार बिचारी ॥

परम कृपालु लाड़िली राधा, त्रिभुवन कीर्ति उजारी।

भोरी पर इतनी निठुराई, कांधौ कहौं पुकारी।।

(२४२)

ऐसी प्रीति देहु मन माहीं।

बिनु पद पंकज विमल छटा के, मन कहूँ जावै नाहीं।।

प्रमुदित मत्त रूप रस छाक्यो, फिरे कदम्बन छाहीं।

हँसत विलोकै भोरी किशोरी, लाल देत गलबाहीं।।

(२४३)

ऐसौ जीवन कब लौं जीजै।

लीला ललित जबहि सुधि आवै, हियरा भरि-भरि लीजै।

पंकज पावँ छटा कौं तरसत, तन निशि वासर छीजै।

भजन भाव बिनु बरबस पुनि-पुनि , विषय महा विष पीजै।।

तन मन अकुलत बैठि उमंगन, रुचि-रुचि बिनती कीजै।

तौहू हिय रीते कौ रीतौ, रति-रस नैकु न भीजै।।

झोंकिय भार शस्त्र हिय छेदिये, घोर गरल लै पीजै।

कहा करौं कछु बनत न भोरी, प्राण कौन विधि दीजै।।

(२४४)

कबहूँ हृदय प्रेम रस भीजै।

पीजै रूप उमंगन जीजै, प्राण निछावर कीजै।।

तन मन वारि वारि पद पंकज, देखि-देखि कै जीजै।

भोरी हिय अकुलात कृपानिधि, हँसि-हँसि दरसन दीजै।।

(२४५)

बाढ़ै प्रीति हृदय केहि भाँती।

यमुना तीर विकल तनु डोलौं, चुवत नैन जल स्वाती।।

जुगल नाम की रट नित लागै, टेर-टेर अकुलाती।

ढूँढ़त जुगल लाडिले कुञ्जन, फिरहुँ रूप रस माती।।

पुलकित गात देह सुधि बिसरी, गुण गावत दिन राती।

यह विधि भाग जगै कब भोरी, जरत सोच सों छाती।।

(२४७)

झूठौ भयौ दृगन कौ नेम।

तब तौ नीर बहाबन लागे, अति ही काचे प्रेम।।
दृग भरि कछु न देखन हु की, हठ तब कीन्हीं होई।
अब पुनि विषयन दूँढन लागे, निलज लाज सब खोई।।
मेरे ह्वै मोसों बैर विसावौ, कुसमय धोखो दीन्हों।
का मुख कहों अनीति कृपानिधि, जन्म अकारथ किनहौ।।
जड़ कठोर ताहू पै चँचल, तिनहुँ दोष न भोरी।
तुम तौ कृपा कोर टुक हेरौ, कोमल चित्त किशोरी।।

(२४८)

तुम रूठत सब रूठत प्यारी।
तेरी कृपा कृपा सब ही की, तो रिस विपद सदारी।।
जब सौं तुम उर धरि निठुरता, सब ही प्रीति विसारी।
मन-इन्द्रिय-काया करुणा निधि, अधिक शत्रुता धारी।।
रोके रुकत न बरजे मानत, चाहत बात बिगारी।
जिनकों कहत हुतौ नित आपनौ, जिनकौ भरोसौ भारी।।
सोतौ ऐसे भये कृपानिधि, निलज लाज लौं टारी।
झूँठ साँच तुम सब ही जानत, कीजै न्याव बिचारी।।

होतौ आरत हरण कृपानिधि, जस गावत श्रुति चारी।
भोरी बेगि कृपा करि हेरौ, अधम निबाहन हारी।।

(२४९)

एक सोच नित ही उर मेरे।

सोच न लोचन पोचन ही कौ, निशिदिन विषयन हेरे।।

सोच नहीं पद कज्ज बिसारे, प्रेम भाव बिनु पाये।

सोच नहीं मन सदा विषय के, रहत लोभ ललचाये।।

गरजत काल सामने ठाड़ौ, सोच ताहू कौ नाहीं।

घोर यातना सुनत नरक की, सोच नहीं मन माहीं।।

इतनौ सोच कृपाल किशोरी, कोमल चित सुकुंवारी।

नित की बान छाड़ि के भोरी, अब तौ निठुरता धारी।।

(२५०)

बैठि-बैठि नित सोचिबौ कीजै।

रचि-रचि विनय नित्य ही कहिये, रोइ-रोइ कै जीजै।

इत अभाग उत बान कृपा की, सोचत नित तन छीजै।।

लीला ललित जबहि सुधि आवै, हियरा भरि-भरि लीजै।

भोरी सहज निठुरता पर हू, प्राण निछावर दीजै।।

(२५१)

भलौ-भलौ सब ही कौं प्यारौ।

खोटी कुटिल कुबुद्धि अभागी, मोहि सकल मिलि टारौ।।

औरन की का कहौं कृपानिधि, को जग हितू हमारौ।

अपने कहियत इन्द्रिय-काया, घनौ बैर उर धार्यौ।।

अब तौ ठौर कहूँ नहिं सूझत, मैं सब भाँति विचार्यौ।

तुम ही सहज कृपा करि भोरी, चरण शरण प्रतिपार्यौ।।

(२५२)

इतनी बात कृपा करि दीजै।

सब ही सुख अति खारौ लागै, विरह ताप तन छीजै।।

सोच-सोच दृग ढारत आँसू, नैन नींद नहिं आवै।

हा राधे मेरौ और न कोऊ, टेर-टेर अकुलावै।।

नाम रटै चौकै चहुँ हेरे, पुलकै सकल सरीरा।

मिल्वे की अति लगै चटपटी, पल छिन परै न धीरा।।

हिय में पीर उठै अति गाढ़ी, छिन-छिन फाटै छाती।

ऐसी कृपा करौ अलबेली, करुणा कोमल गाती॥

(२५३)

इतनी बात मांगिवे आई।

तेरे द्वार दीन नित टेरौं, छिन हू आस करौं न पराई।

नित प्रति प्रीति नाम सौं तेरे, दरस आस नित रहौं लुभाई॥

रसिक संग हिय ध्यान चरण कौ, गाढ़ी पीर हिये अधिकाई।

कुगति-सुगति कौ सोच न भोरी, करियो जो कछु तुमहिं सुहाई॥

(२५४)

सोबत बीत गई बहु रतियाँ।

कानन सुने न दोऊ रँग भीने, करत भांवती बतियाँ॥

सैनन माहिं संकेत बतावत, पुरबत रति रस घतियाँ।

भोरी सो छवि सुमिरत अजहूँ, दुख सौं फटत न छतियाँ॥

(२५५)

जन्म सब योंहि बीत गयौ।

प्रीति रीति हिय माहिं न जागी, नहिं सत्संग भयौ॥

कोटि कुकर्म किये निसि बासर, छिनहुँ न नाम लयौं।

भजन -भावना हिये न परसी, विषयन सहज गह्यौं॥

हा राधे नहिं कोऊ मेरौ, कबहुँ न टेरि कह्यौ।

सब ही भाँति कुटिलपन लीन्हों, कोटि प्रपंच ठयौ।

अब अबलम्ब न कोऊ सूझत, तन मन बिकल भयौ।

एक कृपालु बान कौ भोरी, हिये भरोस रह्यौ॥

(२५६)

मोसौं मोसी करौ तौ कहा बसि आई।

सहज कृपालु किशोरी राधे, का मुख कहौं बनाई॥

कोटि जन्म जो बसौं नरक में, नित नव त्रास सदाई।

तौहू निघटै नहीं किशोरी, मेरी कुमति कमाई॥

सो सब उचित सुनौ करुणानिधि, आयु जो व्यर्थ गंवाई।

पतित उधारण चरण न ध्याये, विषयन रही भुलाई॥

तोसौं प्रीति करी नहिं प्यारी, अब उघरी स्ठताई।

तैं छिन हूं मेरी सुधि न बिसारी, मैं छिन-छिन चितलाई॥

याहू पै जो सहज कृपानिधि, हठ राखौ सकुचाई।

भोरी नीच कहा मुख भाखै , तुम ही सौं बनि आई।।

(२५७)

मोसौं मोसी करौ तौ कहा बस मेरौ।

सुनौ कृपालु किशोरी राधे, अब तौ आसरौ तेरौ।

कोटिक जन्म नरक में भोगूँ, सहि-सहि त्रास घनेरौ।।

ऐसे पातक पुञ्ज कृपानिधि, तदपि न होय निबेरौ।

अब तौ ठीक-ठौर नहिं सूझत, नैननि लगत अँधेरौ।।

कहियत यही किशोरी प्यारी, कृपा कोर टुक हेरौ।

भोरी हिय सौं छिनहु टरौ जिन, निशि दिन साँझ-सबेरौ।।

(२५८)

यही सोच हिय अजहुँ न टूट्यौ।

सहज कृपालु किशोरी पद तजि, विषयन कौ रस घुट्यौ।।

ता पर और निलजता ऐसी, प्रेम जनावत झूठ्यौ।

भोरी कहा कहै करुणानिधि, भाग्य सबै विधि फुट्यौ।।

(२५९)

यही सोच हिय फटत न छाती।

सहज कृपालु कृपा लखि तेरी, दरकत कुलिस सिला पिघलाती।

यानै ऐसी गही निलजता , कहा कहीं कछु कही न जाती।।

पद सौं प्रीति होत न प्यारी, झूठौ प्रगट प्रेम बहु भाँती।

अब तौ कृपा करौ अलबेली, भोरी प्रीति बिना पछताती।।

(२६०)

२६०

यह इक सोच रहत मन मांहीं।

सहज कृपालु किशोरी चरणन यह मन लागत नाहीं।।

गढ़ि-गढ़ि मुख बहु बात बनावै हिय रीती की रीती।

ऐसे कहौ रीझिहौ कैसे अति ही काची प्रीति।।

हौं तौ प्रीति करत परघट की तुम घट-घट की जानौ।

बड़े भाग्य जो काची प्रीति हिय साँची कर मानौ।।

नातर सहज कृपालु किशोरी प्रीति रीति हिय दीजै।

भोरी बलि-बलि जाइ चरण पै सोच पोच हरि लीजै।।

(२६१)

मन तैं काके चरण विसारे।

सहज कृपालु किशोरी राधे, हरिजू जाके झाँकत द्वारे।।

शिव ब्रह्मादिक पद रज चाहत, गूढ भाव उर धारे।

महिमा अमित कहा कहि वरनौ , वेद सबै पचि हारे।।

यह प्रभाव तउ बान कृपा की, पतित अनेक उबारे।

आवत धाइ बेर नहिं लावत , आरत टेर पुकारे।।

सो कृपालु सौं विमुख भयौ तैं, छिन न नाम उच्चारे।

धृग-धृग निलज प्राण ये भोरी, अजहूँ टरत न टारे।।

(२६२)

बिनती सुनौ अधम प्रतिपाला।

हिय में दीजै मिलन चटपटी उर में बिरह विसाला।

छिन-छिन चहुँदिशि फिरि-फिरि देखौं आबत जान कृपाला।।

सजल नैन गदगद स्वर पुलकत टेरौं नाम रसाला।

दीप शिखा लौं जरौं दिवस निस कठिन बिरह की ज्वाला।।

ऐसी प्रीति रीति हिय दीजै करुणा सिन्धु दयाला।

भोरी पामर दीन पुकारत सुनौ

नवल ब्रज बाला।।

(२६३)

या मन की शठता हठ रोकौ।

काची प्रीति कहा फल पैहै, हरहु सकल भृम धोखौ।

साँची प्रीति हिये में दीजै, करुणा कोर विलोकौं।।

तुम ही नेह निबाहौ प्यारी, पार लगावौ मोकौं।

हौं तौ प्रीति रीति बिनु भोरी आरत टेरत तोकौं।।

(२६४)

कहँ मैं कुटिल कुमति अघरासी।

कहँ विधि हरि-हर अगम चरण रज अलबेली राधा सी।।

सहज कृपालु कृपा की आसा, ठानी बिनती खासी।

मुख आबत सो कहत कृपा निधि, प्रीति रीति की प्यासी।।

उर में बिरह-पीर हँसि दीजै, करि दृढ़ चरण उपासी।

भोरी सहज किशोरी राधे, दीजै कुञ्ज ख्वासी।।

(२६५)

कहँ मैं पापी मूढ़ दुराचारी, कहँ विधि हरि-हर अगम चरण रज
प्यारी।

कहँ श्रुति अगम श्याम नट नागर,

लीला ललित कृपालु रस सागर।

कहँ हरिवंश जुगल वपु लीन्हें,

चरण शरण प्रतिपाल माधुरी भीने।

मैं तौ कुटिल कुमति अघरासी,

सन्तन कौ मग छाँड़ि विषय अभिलाषी।

हौं तौ सबै भाँति बिसराई,

तद्यपि सहज कृपाल न मोहि भुलाई।

कुलिस कठिन हिय फटत न मेरौ,

तदपि अधम प्रतिपाल आसरौ तेरौ।

हौं तौ प्रीति करी अति काची,

तुम अब देवहु पीर हिये अति साँची।

मुख बहु बिनय करौं केहि भाँती,

भोरी उर यह सोच फटी नहिं छाती॥

(२६६)

कठिन अभाग्य कहा मुख कहिये।
आपनि खोटी दसा दयानिधि, देखि-देखि चुप रहिये॥
सागर बास नीर कौ टोटौ, अग्नि ज्वाल सौं दहिये।
कल्पवृक्ष की छाँह कुटी रचि, भूख प्यास नित सहिये॥
इतने निकट कृपालु किशोरी, तऊ न दरसन लहिये।
भोरी भाग्य कुटिलता ऐसी, सब कछु सहिबौ चहिये॥

(२६७)

कौन भाग्य भरि नैन निहारौ।
बिनु नख चन्द्र चन्द्रिका देखे, त्रिभुवन सब अँधियारौ॥
सहज छबीली छबि के ऊपर, त्रिभुवन सोभा वारौ।
भोरी छिन इक दरसन कारण, कोटि प्राण तजि डारौ॥

(२६८)

भाग अभाग कर्म गति न्यारी।
भागवान कौं सब ही मङ्गल, भाग्य हीन कौं दुखद सदारी॥

यह नित चाल बिलोकी जग की, अचरज एक तहाँ ये प्यारी।

सकल अभाग्य हरण करुणानिधि, भाग्यहीन लखि बान
बिसारी॥

कछु बस नहीं न कछु कहि आवै, खोटी पामर दीन दुखारी।

असरण-सरण न केहि अपनायौ, सहज कृपालु कृपा न
बिचारी॥

अधम उधारण को न उधारयौ, जुग-जुग बिदित कहत श्रुति
चारी।

भोरी बिरियाँ रीति बिसरि गई, आरत टेरत-टेरत हारी॥

(२६६)

अधम उधारण सुनियत प्यारी।

पतितन पै नित बान कृपा की, जस गावत श्रुति चारी॥

ह्यन्ते चूक परी नहीं मोपै, सब मे प्रथम पुकारी॥

तौ हू परम कृपालु किशोरी, क्यों न द्रवौ सुकुंवारी।

इतनी हौ हँसि कहौ कृपानिधि, अब हिय कहा बिचारी॥

(२७०)

ऐसी तोहि कि बूझिये वृषभान किशोरी।

तू घन हौं चातकी , तू चन्दा हौं चकोरी।।
तू जल हौं मीन प्यारी, तू दानी हौं भिखारी।
तू पतित पावन हौं पतित, इक आस नित तिहारी।।
तू आरत हर हौं दीन दुखी, आरत नित टेरीं।
चिन्तामणि तू रंक सु मैं, चहत शरण तेरीं।।
तू स्वामिनि सबल सदा, दासि नवल भोरी।
हौं तौ छिन चहत दरस, मन्द हँसन थोरी।।

(२७१)

ऐसी तोहि कि बूझिये वृषभान दुलारी।
वेद विदित प्रणतारति भंजन , सब्कोँ सुखद सदारी।।
हौं तौ चरणन तिहारे, पुनि-पुनि टेर पुकारी।
मेरी लाज रावरे हाथन, मुख सौं कहीं कहारी।।
हौं तौ किये कुकर्म , कोटि विधि लादयो बोझौ भारी।
विषय विपिन कुञ्जर , ज्यों मातौ, तकत धाम-धन-नारी।।
ठाड़े गगन बाट यम देखत, हँसत देत कर तारी।
सब विधि निज बस जानि, भयंकर नरक रहे मुँह फारी।।

तब कछु सूझ परी न कृपानिधि, सब बिधि आयु बिगारी।
अब पुनि ठीक ठौर नहिं सूझत, लगत नयन अंधियारी।।
गाढ़े संकट कोऊ न सहायक, सोच-सोच हिय हारी।
भोरी करत बिलम्ब कहा अब, पोच निवाहन हारी।।

मैं तौ प्रीति करी अति काची।
झूठौ भजन भावना झूठी, कोटि कुटिलता साँची।।
साँची झूठ झूठ की साँची, तो बिन कौन करै री।
इतनी समरथ और कौन की, वेद विमल यश गावै।
तुम सर्वोपरि सहज कृपानिधि , वेद विमल यश गावै।
जो तुम सहज कृपा उर धारौ, तौ सब विधि बनि आवै।।
सहज कृपालु किशोरी राधे, जो यह कीरति साँची।
तौ यह विनय सत्य हठ कीजै, भोरी जो मन राँची।।

(२७३)

झूठी प्रीति हिये में मेरे।

साँची कोटि कुकर्म कुटिलता, पातक पुञ्ज घनेरे।।
ऐसौ कौन कृपालु किशोरी, अवगुण चित्त न आनै।
झूठी किंचित प्रीति कृपानिधि , ताहि सत्य करि मानै।।
कोटि कुटिलता चित्त धरै नहिं, आरति सुनि प्रतिपारै।
नातौ प्रीति रीति कौ मानै, सबही दोष विसारै।।
ऐसौ और दिखात न तिहुँपुर, सोच-सोच हिय कारी।
अब तौ द्वार रावरे भोरी, आरत टेर पुकारी।।

(२७४)

प्रीति रीति उल्टी जग गाई।

काहू सौं सो बन न परत है, जस तुम सौं बनि आई।
प्रीति-रीति परबीन राधिके, सब मे श्रेष्ठ सदाई।।
उलटौ जो मानों करुणाकर, तौ सब भाँति भलाई।
झूठौ प्रेम सत्य करि जानौ, झूठी करि कुटिलाई।।
बिन आगस-अपराध रुठिवौ, श्री हरिवंश बताई।
बिनु गुन क्यों न रीझिये तैसे, सब ही दोस विहाई।।
ज्यों-ज्यों बाँह गहौ अलबेली, कृपा करौ मुसिकाई।

भोरी की तुम भोरी स्वामिनि, चतुरन चतुर सदाई।।

(२७५)

सुनि राधे तोहि ऐसी न चहिये।

तुम घन हौं चातक रस प्यासी, कब लौं दीन रटैये।

तुम आधार एक हौ मोकौ, कहि-कहि कहा सुनैये।।

क्यों नहिं सहज कृपालु कृपा करि, माधुरि नैन पिवैये।

भोरी यह न उचित अलबेली, काहे कौं देर लगैये।।

(२७६)

तुम सौं बात हिये की कहिये।

भजन-भक्ति बन परत न मोसौं, काहे कौं बात बनैये।

विषयन सौं मन रुकत न रोक्यो, रोकि-रोकि रह जैये।।

दीजै प्रीति हिये करुणानिधि , बिरह अधिक सरसैये।

व्याकुल देह रटत श्रीराधा, नैनन नीर ढरैये।।

तन मन की न सम्भार रहै कछु, इतनी आस पुजैये।

और कहा मुख मांगो भोरी, छिन इक छटा दिखैये।।

(२३७)

तुम सौं कहत हिये की बात।

ऐसौ मन यह करहु कृपानिधि, जस कछु मोहि सुहात।
विष सम सब सुख लगै किशोरी, बिना चरण जलजात।।

नाते कुटुम मित्र सुत नारी, जननि जनक अरु भ्रात।
बिनु पद पंकज दुखद सब लागै ज्यों चकई कौं रात।।
तुम बिनु और न नेहु काहु सौं, नहिं दृग देख्यो जात।
भरि-भरि नैननि नीर बहावौ, सोचत दिवस बितात।।
इतनी करहु कृपा अलबेली, तन मन अति अकुलात।
भोरी भाग अभाग लाड़िली, एक तिहारे हाथ।।

(२७८)

या जीवन की चरचा न चलैये।

प्राणनाथ सौं पोच प्राण की, बात कौन विधि कहिये।।
असन-बसन-तन सोचि पोच सब, पानी माहिं बहैये।
मिलन आस पर तन मन वारिय, बड़े भाग्य जो पैये।।

नातर बैठि-बैठि भरि साँसें, सोचत द्योस बितैये।
सजल नयन तनु पुलक मगन मन, नाम टेर रट लैये॥
गाढ़ी पीर बढै उर अंतर, मुख सौं कछू न कहिये।
टूक-टूक हिय कीजिय भोरी, औषध वैध न चाहिये॥

(२७९)

अस कछु आस होत हिय माहीं,
वे दिन ज्यों न रहे, ये रहि हैं नाहीं।
परिहै कहूँ कान भनक जाई,
आरत हरण कृपालु आइ हैं धाई।
दीन गरीब दुखी सब भाँती,
आपनि जानि प्रिया ऐहै सकुचाती।
तजहि न चन्द सुधा जैसे,
सहज कृपा की बान बिसरिहै कैसे।
मिटि है कठिन अभाग पलक में,
सब बनाव बनि जैहै एक झलक में।

लहि हौं सहज कृपा की कोरन,
रहि हौं अटकि जैसे चन्द चकोरन।
कढि हौं उमंग हिये केरी,
बसि हौं हिलमिल कुञ्ज छाँव में तेरी।
इक रस कटि हौं दिन राती,
किये माधुरी पान फिरौंगी माती।
भोरी तौ सब भाँति अभागी,
सहज कृपा की आस रावरी जागी।

(२८०)

इतनी कहौ कृपालु किशोरी।
कबहूँ तौ तुम मोहि देखिहौ, सहज कृपा की कोरी।
कबहूँ तौ व्याकुल भटकैहौ, ढूँढ़त निधुवन खोरी।।
कबहूँ तौ भुज गहि मुसिकेहौ, सहज पौँछ दृग भोरी।
कबहूँ तौ छिन दरस दिखैहौ, मन्द हँसन मुख थोरी।।
इटनौ हँसि अवलंब दीजिये, ज्यों थिर होय हियौ री।
भोरी नेक मिलन आसा पर, काटौ जन्म करोरी।।

(२८१)

जौ पै कृपा रावरी होती।

तौ क्यों मन रमतौ विषयन में, आयु व्यर्थ क्यों खोती।।

तौ किन मित्त कोटि कुटिलाई, क्यों कुकर्म हठ करती।

पकंज चरण हरण भव बाधा, क्यों नहीं बैठ सुमरती।।

क्यों न अनन्य ब्रतहिं लै प्यारी, लीला में मन देती।

सोच-सोच नित दिवस गंवावत, हिय किन भरि-भरि लेती।।

मिलन चटपटी बढ़त न हिय क्यों, मित्त न क्यों जग प्रीति।

काहे कौं मुख सौं गढ़ि बातें, अजहुँ रहत हिय रीती।।

जान परत नहीं प्रगट कृपा कछु, सुनहु कृपानिधि प्यारी।

तासौं कहियत सहज किशोरी, काहे निठुरता धारी।।

भोरी यह चाहत करुणा निधि, दास्य रावरौ दीजै।

मेटिय शूल मलिन मन कल्पित, प्रगट कृपा किन कीजै।।

दुविधा में कछु लख न परै।

सोच-सोच चुप रहिये प्यारी, मुख सौं कहा उचरै।।
जब हौं अपनी ओर निहारत, आसा कछु न परै।
कहँ मैं कहँ अलबेली राधा, काहे कौं चित्त धरै।।
जब अपनी करतूत बिचारत, हियरा अधिक डरै।
हौं तौ नीच निद्य शठ लम्पट, सो क्यों भुज पकरै।।
सहज कृपाल बान सब सोचत, हृदय उमंग भरै।
पतित उधारन बान प्रिया की, सो कैसे बिसरै।।
नित-नित यही रीति चलि आई, अवगुण चित न धरै।
आरत टेर सुनत करुणानिधि, छिन न विलम्ब करै।।
यह विधि सोचत रहत निरन्तर, निश्चय कछु न परै।
बेगि कृपा किन करत किशोरी, भोरी दीन ररै।।

(२८३)

उमड़ि-उमड़ि नयना जल बरसै।

भीजत जाइ रङ्ग में देही, हृदय प्रेम सरसैं।।

तन मन विकल नाम रट लागै, निशि-दिन परै न जानी।

छिन-छिन गावत नाचत रोवत, बन-बन फिरैं दिवानी।।

झूमत नयन कछू नहिं सूझत, पुलकावली सरीरा।

ऐसै कबहुँ बसैहौ भोरी, रँग भरी यमुना तीरा।।

(२८४)

उमड़ि-उमड़ि दृग नीर बहावै।

कबहुँ भाग्य होयगौ ऐसौ, नयन अँधेरौ छावै।।

जुगल रूप हिय मध्य प्रकासै, बाहिर कछु न दिखावै।

झूमत झुकत फिरत ब्रज वीथिन, पुनि-पुनि पंथ भुलावै।।

टेढ़ी लगी हिये अभिलाषा, सो कैसे कै पावै।

भोरी सहज कृपाल किशोरी, टेर-टेर अकुलावै।।

(२८५)

कपटी कुटिल कौन प्रतिपारै।

ऐसी और न बान काहु की, अवगुण चित न धारै।।

तन मन अति अकुलात किशोरी, चहुँदिसि चकित निहारै।

करि अनुमान सबहि कौं देखेउ, बिगरी कोऊ न सम्भारै।।

चित्त अधीर नहिं धीरज आवै, नैनन सौं जल डारै।
सहज कृपालु लाड़िली राधा, भोरी विलपत द्वारै ॥

(२८६)

दिल कौ दरद कौन सौं कहिये।

दिल दरदीली और न तो बिनु, जाकी आसा गहिये।
अब तौ यह जिय आवत प्यारी, नित-नित रोवत रहिये॥
अबहूँ सहज कृपालु कृपा सौं, कृपा कोर हठ लहिये।
भोरी कोटि जन्म लग नातर, सोच-सोच तन दहिये।

(२८७)

कहा कहौ कछु कहि नहिं आवै।

तजि पद -कज्ज छटा अलबेली, विषयन में मन धावै।
नैनन नीर बहावत निशि दिन,इनकों सैर सुहावै॥
ये सब पातक के फल मेरे, भजन भाव क्यों भावै।
ये तौ सहज जन्म के बैरी, काहे न बैर बिसावै॥
तुम तौ सहज कृपालु किशोरी, वेद विमल जस गावै।

भोरी सोच यही करुणानिधि, क्यों न बिहाँसि अपनावै।।

288

आपनि दसा कहा अब कहिये।

अचरज देखि कृपालु किशोरी, समुझि-समुझि चुप रहिये।

कामधेनु लै भूखन मरिये, सर बिच प्यास जु सहिये।।

चिन्तामणि कर रंक तऊ अति, भीख मांग कै खैये।

सिंह सरण गीदड़ मिलि मारयौ, जग उपहास करैये।।

मन भावै सो करहु कृपानिधि, तुमहिं कहा समुझैये।

श्री हित चरण सरण भोरी की, ऐसी दसा कि चहिये।।

(२८९)

ऐसी पीर होत हिय भारी।

सुनिये करुणाधाम किशोरी, सहज कृपानिधि प्यारी।।

ज्यों सजि आई वेष कामिनी, हौंसन अधिक सिंगारी।

पिय लखि फेरि बदन जब लीनौ, बहन लग्यो दृग वारी।।

मूँज -विपिन अलि भटकत भूल्यो, पाइ सुगन्धित ब्यारी।

सरवर आस तृषित मृग भाजेउ, लागत विपिन दवारी।
सूखौ सर लखि भाग कुटिलता, बिकल भयौ सुकुमारी।।
प्यासौ पपिहा घन अवलोकयो , बहुविधि कीन्ह पुकारी।
बिनु इक बूंद दिये घन मिटिगौ, रहिगौ चौन्च पसारी।।
रुचि-रुचि हौंसन करत बीनती, सो सब होत वृथा री।
भोरी कृपा कहाँ सो बिसरी, पोच निबाहन हारी।।

290

करहु कृपा अब श्यामा श्याम।
करुणा सिंधु लाडिले प्यारे, दीन बन्धु सुख धाम।
आरत हरण अधम प्रतिपालक, कृपा मूर्ति अभिराम।
भोरी दुखिया दीन पुकारत,टेरत लै लै नाम।

(२९१)

कहौ जो मुख कहि आवत बात।
ऐसी और न बान काहु की, सत्य कहौं सौं खात।
सकल लोक चूड़ामणि प्यारौ, चरणन सीस नबात।

सो चमार के हेत लिये जल, धावत आधी रात।।
जाकौ नाम सुनत मन मोहन, नयनन नीर बहात।
सोई अली किशोरी प्यारी, टेर सुनत अकुलात।।
सोतौ नारि विरह सौं व्याकुल, छिन-छिन टेर सुनात।
कारण रहित कृपालु महल में, सुनि-सुनि कै सकुचात।।
भोरी पामर नीच अधम गति, सब जगै नाम धरात।
तौहू तुम्हें सुरत हिय ताकी, अस जिय जानी जात।।

(२९२)

जोपै सोचेहु इतनी कृपा प्यारी।
तौ किन देत प्रीति हिय गाढ़ी, कृपासिंधु वृषभान दुलारी।।
जोपै ऐसी रीति रावरी दीन अधीन सकहु न बिसारी।
तौ किन ऐसौ करौ मन मेरौ छिन न तजौं पद कज्ज सुखारी।।
जोपै सत्य कृपा कछु मोपै मेटहु कृपा करि हिय भृम भारी।
सहज कृपालु करहु अस भोरी ज्याँ देखै भरि नयन छटारी।।

(२९५)

श्री राधे तोहि कैसे कै जानौं।

कैसो रूप कहा छबि सोभा, बैठ-बैठ अनुमानौ।।
कहा सुभाव माधुरी लीला , कोटि कल्पना ठानौ।
ऐसौ भाग्य जागि है कबहुँ, देखि-देखि हिय आनौ।।
एहो करुणा धाम किशोरी, जो हिय की पहिचानौ।
तौ किन भोरी प्रगट करत अब, सहज कृपा कौ बानौ।।

(२९५)

युगल रूप कैसे चितलावौं।

लीला ललित बैठि अनुमानत, नित-नित जुगति लड़ावौं।।
ऐसी कृपा करौ अलबेली, छिन इक झाँकी पावौं।
भोरी श्याम-गौर नव जोरी, हृदय निकुञ्ज बसावौं।।

(२९६)

छिन इक तुम मोहि देखौ न प्यारी।

छिन इक मैं तेरौ बदन विलोकौं, भरि-भरि कै नयना री।।
छिन इक तुम मोसौं कहौ कृपानिधि, रस भीजे बयनारी।
छिन इक मैं कछु तुमहिं सुनावौ, आपनि बात बिचारी।।

कबहूँ तौ यह भाँति लाड़िली, कीजै प्रगट कृपा री।
भोरी कोटि वारिये तो पर, मुख सौं कहौं कहा री॥

(२९७)

ऐसी कृपा किन करहु किशोरी।
उर में गडै मनोहर मूरति, मन्द हँसी मुख थोरी।
हियरा नयन बाण सौं बेधहु, हँसि-हँसि भौंह मरोरी॥
घायल करि भटकावहु प्यारी, झूमत निधुवन खोरी।
जियरा टूक-टूक ह्वै जावै, इटनौ माँगत भोरी॥

(२९८)

हौं प्यारी तोहि कैसे कै पावौं।
जो तुम बन में मिली कृपानिधि, तौ बन कौं उठि धावौ॥
जो बरसाने करहु अनुग्रह, आरत टेर सुनावौं।
गह्वर वन यमुना तट बैठी, आरत टेर सुनावौं॥
जेहि विधि रीझौ कुँवरि किशोरी, सो मोसौं करवावौ।
भोरी पै तौ कृपा सदा ही, हँसि किन दरस दिखावौं॥

(२९९)

हौं प्यारी तोहि मन की बात सुनावौं।
कारण रहित कृपालु किशोरी, कौन भाँति तोहि पावौं।।
जो मन बस में होत जात लाड़िली, चरणन ध्यान लगावौं।
जो मन सौं सहि जात लाड़िली, तौ तप योग करावौं।।
जो उर प्रीति होत करुणामय, तौ छाती दरकावौं।
हियरा टूक-टूक करि छिन में, सकल अभाग्य मिटावौं।।
सो तौ ऐक बनत न दयानिधि, कहा करौं कित जावौं।
भोरी ललकि-ललकि दरसन कौ, रोइ-रोइ रहि जावौं।।

(३००)

अब कब मेरी सुधि करिहौ प्यारी।
नवल निकुञ्ज महल में बैठी, श्री वृषभान दुलारी।
ललितादिक सखि संग सहचरी, टहल करत गिरधारी।।
शिव-हरि-अज श्रुति नेंक न जानी, रहे विचार विचारी।
सो कृपालु भोरी की स्वामिनि, सब विधि राखन हारी।।

(३०१)

अब कब मेरी सुधि करहु कृपाला।
नवल निकुञ्ज विराजत प्यारी, करुणासिन्धु दयाला।
जहँ ललितादिक टहल में ठाड़ी , गावत गीत रसाला।।
जहँ हरिवंश संवारत बारन, शोभा विशद विशाला।
जहँ पग कंजन देत महावर, उमगि-उमगि नन्दलाला।।
अनुपम थल मुनि ध्यान अगोचर, जड़ वपु आप गुपाला।
तहँ भोरी की चरचा करि हौ, हँसि-हँसि नव ब्रजबाला।।

(३०२)

जय राधा चरणन की प्यासी।
ललितादिक जे सखी सँग की, प्रिय पद कंज निवासी।।
शिव ब्रह्मादिक वन्दत पद रज, राधा चरण उपासी।
जिनकौ जोरि-जोरि कर बिनवत, मोहन कुञ्ज विलासी।।
महिमा अमित अपार अगोचर, सहज नेह की रासी।
सिध-निधि कोटि-कोटि की दाता, आरत कलपलता सी।।

श्री दम्पति मन लिये रहत नित, निसि दिन करत खवासी।

हित नाते सुधि करहु करावहु, भोरी शठ रस प्यासी।।

(३०३)

कबहुँ तौ सुधि मेरी करै हौ।

श्री ललितादिक सखी सँग की, चरचा कबहुँ चलैहौ।।

श्री हरिवंश नाम की महिमा, सबै भाँति प्रगटैहो।

कहि हौ करहु कृपा अलबेली, अब कब लौं तरसैहौ।।

कुञ्जन में तुम बसत सदाही, अवसि सु अवसर पैहौ।

भोरी पामर दीन दुखी तन, करुणा कोर चितैहौ।।

(३०४)

मेरौ मन बात इती चाहै।

तुम बिनु सब सुख विष सम लागै, लै लै नाम कराहै।

तोसौं प्रीति बढै अति गाढ़ी, तो बिन और न चाहै।।

निशि वासर नित नेम नाम कौ, नित नव नेह निबाहै।।

(३०५)

सब कछु बदल जात जग माहीं।

या मन की यह कठिन कुटिलता, कैसेहु बदलत नाहीं।
अजहूँ विषयन लोभ लुभायौ, तजि निधिवन द्रुम छाहीं।।
कोटिन जन्म बीत गये ऐसै, यह पुनि जात वृथा हीं।
भोरी सहज कृपालु किशोरी, अब तौ गहौ हठ बाहीं।।

(३०६)

कोटि कुलिस सौ कठिन हियौरी।
अजहूँ दरकत नहीं दयानिधि, करुणाधाम किशोरी।
किस विधि प्रीति रीति उर ऐहै, सोचे यत्न करोरी।।
तौहू सुनहु कृपालु सुन्दरी, कछु नहिं ठीक परयोरी।।
भोरी कहा कहै अलबेली, तुम ही बिहसि कहौरी।।

(३०७)

सोइ-सोइ सब जागत प्यारी।
आधी बीते, भोर भये कै, सब कोऊ आँख उघारी।।
मेरौ भाग्य कौन गत सोयौ, अजहूँ जागत नारी।
कोटिक जन्म बीत गये यौ ही, यह पुनि जात वृथारी।।

दिन-दिन आयु सिरात किशोरी, त्रास होत हिय भारी।
भोरी करुणा धाम लाडिली, करुणा कहाँ बिसारी।।

(३०८)

ऐसौ दुख दीजै हिय माहीं।

बिनु पद-कंज छटा दृग देखे, कोऊ सुहावै नाहीं।।
नाम रटै दृग ठारै आँसू, छिन-छिन अति अकुलाहीं।
काहू सौं मिलिबौ न सुहावै, बातन सौं घबराहीं।।
बस्ती छोड़ि एकान्त बैठिबौ, जग सब शून्य दिखाहीं।
भोरी ऐसे दुख बिनु प्यारी, जीवन जन्म वृथा हीं।।

(३०९)

दीजै हिय में गाढ़ विरह दुख।

बिनु पद-कञ्ज कछू न सुहावै, विष सम लगै सबै जगत कौ
सुख।।

आपनि दसा कहा कहि बरनौ, हियरा तौ निदरत कोटि कुलिष।
कौन काज जननी जड़ जाई, भोरी शठ सब ही भाँति विमुख।।

ऐसी पीर हिये में व्यापै।

नयना सजल नाम रट लागै, अंग-अंग अति कांपै।।

कोऊ दृग देख्यौ न सुहावै, अति दुख नैनन ढाँपै।

भोरी लै-लै नाम रावरौ , ऊंचे टेर अलापै।।

(३११)

सो छवि नयनन में न बसीरी।

त्रिभुवन मोहन श्यामसुन्दर दृग, जा छवि माहिं फसीरी।।

बरसत सहज माधुरी धारा, मृदु मुसिकान लसीरी।

अँग-अँग भूषन बसन मनोहर, कंचुकि कसिब कसीरी।।

भरि-भरि नैन न सो छवि देखी, जैसे चकोर शशीरी।

भोरी धृग-धृग जीवन ऐसौ, सब जग करत हँसीरी।।

(३१२)

अब तौ आई हौं सरमात।

करि अपराध कुकर्म कोटि विधि, कछु-कछु हृदय डरात।

जैसे नारि भूलि पति आज्ञा, पीछै अति पछितात।।
लाजन सन्मुख दृष्टि करत नहिं, भय सौं काँपत गात।
तुम तौ सब विधि हिय की जानत, कहा बनावौं बात।।
करुणाधाम किशोरी राधे, त्रिभुवन जस विख्यात।
भोरी सहज कृपा की आसा , अवनि देखि रह जात।।

(३१३)

यह मन तौ न भयौ मेरौ।
जिहि देखत ताही सँग लागत, सब विषयन कौ चेरौ।।
अब तौ प्रीति रीति बिनु प्यारी, नयनन लगत अँधेरौ।
भोरी अब तुम ही करुणानिधि, कृपा कोर हँसि हेरौ।।

(३१४)

पोच प्राण की गिनती कीनी।
वा पद कंज छटा पर वारौं , त्रिभुवन शोभा जितनी।।
दृग भरि कबहुँ माधुरी प्यावौ, आस पुजावौ इतनी।
स्वर्ग-मुक्ति-सम्पति-सिधि भोरी, तृन सम गिनत न टितनी।।

(३१५)

झूठी प्रीति हिये में थोरी।

सो झूठी साँची कर मानत, यह अंधेर बड़ौरी।
ताहू पै मिलिबे की आसा, हिय में उमंग करोरी।।
सेवा के बहु भाँति मनोरथ, करत बहोर-बहोरी।
भोरी के या भोरे पन पै, रीझत क्यों न किशोरी।।

316

इतनो तौ कबहूँ हँसि दैहौ।

सुनहु कृपालु किशोरी राधे, अवसि कृपा की कोर चितै हौ।
तुम मोहि मिलौ -मिलौ न कृपा करि, मोकौ ढूँढ़त तौ भटकै हौ।
तुम मेरी सुनौ-सुनौ न किशोरी, मोकों तौ नित दीन रटै हौ।।
तुम मेरी बाँह गहौ न गहौ हँसि, भुज पसार मोसौं विनय करै हौ।
तुम मेरे दृग पौँछौ मत पौँछौ, मोसौं नित दृग नीर ढरै हौ।।
हौं अति नीच कहा मुख मांगौ, इतनी तौ तऊ आस पुजैहौ।
भोरी नेम बढै तुम ही सौं , सब जग सौं सम्बन्ध छुड़ैहौ।।

317

इतनी बात कृपा करि दीजै।

मिलन चटपटी हिय में लागै, विरह ताप तन छीजै।
तुम तौ मिलौ मिलौ न कृपा करि, मो चित प्रेम सौं भीजै।
नयनन नीर बहै निशि वासर, हियौ कठोर पसीजै।
भोरी कौ अबलम्ब न दूजौ, टेरि-टेरि कै जीजै।

318

लबहूँ बढै विरह दिन दूनों।

बिनु भरि नयन माधुरी देखे, सब जग लागै सूनों।।
मिलिबौ-हाँसिबौ-कहिबौ-सुनिबौ , चित कछू न सुहावै।
सब सौं जाइ बैठियत न्यारे, बात करत घबरावै।।
कहत सुनत तेरौ नाम किशोरी, उमगि नयन भरि आवै।
लीला ललित बिचारत जब-जब , हियरा टूटत जावै।।
विष सम लगै विषय सुख जेतौ, मुक्ति स्वर्ग नहिं चाहै।
मूँदे नयन पुलक तन पुनि-पुनि , लै-लै नाम कराहै।।
भोरी की अभिलाषा इतनी, बार-बार सोई मांगै।

कौन भाग्य सौं कुँवर किशोरी, प्रीति हिये में जागै॥

319

कबहूँ मो तन विहँसि चितै हौ।

सब विधि निराधार शरणागत, कृपा कोर अपनैहौ।

सहज कृपालु किशोरी राधे, सकल अभाग्य मिटैहौ॥

हिय की हरिहौ कठिन कुटिलता, प्रीति रीति हँसि दैहौ।

भोरी सहज बान करुणा की, अब कब लौं बिसरैहौ॥

320

या हिय की कठोरता कहि न परै।

काहू भाँति न टूटत प्यारी, कोटि कुलिस निदरै॥

कोटि जतन करि हार रही मैं, कछु पै बनि न परै।

यह अजहूँ जैसे कौ तैसौ, दिन-दिन कठिन परै॥

अब तौ कछु उपाय नहिं सूझत, इक तेरी आस करै।

भोरी तोहि सब सहज किशोरी, तो तै चित्त धरै॥

321

हँसि-हँसि क्यों न बोलियत प्यारी।

कोमल चित्त किशोरी प्यारी, यामें घटत कहारी।।
नातर इतनों देहु कृपा कर, माँगहु गोद पसारी।
याही सोच दिवस निशि काटौ, सुमिर-सुमिर लीलारी।।
काहू सौं करिबौ न सुहावै, हिल मिल हँसि बतियाँ री।
भोरी सहज किशोरी तो बिनु, जीवन जन्म वृथा री।।

322

दीजै प्रेम रावरे पग सौं।
तुम बिन और न काज काहूसौं, नातौ टूट जाय सब जग सौं।।
ऐसौ मन मेरौ करौ किशोरी, छिन-छिन टेरौ तोहि उमंग सौं।
तेरी सहज कृपा की उमंगन, बोर देय भोरी कौ रँग सौं।।

323

कबहूँ उठिहौ उमंगि किशोरी।
तन मन कौ संभार नहिं रहि है, देखि दीनता मोरी।।
हौं तौ कब की दीन पुकारत, आसा करत करोरी।
भोरी कुटिल पतित अति पामर, तौ हू सब बिधि तोरी।।

324

कृपा सिंधु उमड़ौगी कबहूँ।
हौं कब की तोहि टेरत आरत, तैं न सुनत अबहूँ।।
हौं तौ हाथ बिकानी भोरी, सोच नहीं लबहूँ।
बीत जाइ वरु जन्म किशोरी, हठ न तजों कबहूँ।।

325

तूनै हाय कहा कियौ मन रे।
कौन काज या जग में भूल्यौ, विषय महाविष चाखन रे।
जेहि सरुप घनश्याम बिकान्यौ, सो न लख्यौ भरि आँखन रे।।
अब किन सोच-सोच दिन काटत , रोइ-रोइ कै रातन रे।
भोरी सहज किशोरी छवि पर, वारौ कोटिक प्राणन रे।।

३२६

कैसे तोहि पाईऐ वृषभान दुलारी।
विधि-हरि-हर तेरी पद रज चाहत, रँग भरी चितवन कुंजबिहारी।
भक्त सखा जेते मोहन जू के, सब्कौं अगम सहज सुकुमारी।।

पचि हारे श्रुति पार न पायौ, गुनि मन ध्यान न आवत प्यारी।

केहि गुण रीझि मोहि अपनैहौ, मैं तो पामर दीन दुखारी।।

इतनी बान रावरी जानत, निरवलम्ब कौं राखन हारी।

तासौं आस परत यह प्यारी , करि हौं कबहूँ उमगि कृपारी।।

(३२७)

ऐसी कौन से ठौर दुरी सुकुमारी।

जहँ इन पायन दौरि न जइये, जहां दृगन सकिये न निहारी।।

जहँ कौ पन्थ न वेदन जान्यौ, जहँ कौ शब्द परत श्रुति ना री।

जहँ मन बुद्धि बचन नहिं पहुँचत, जहँ की रज जांचत त्रिपुरारी।।

कौन भाँति तहाँ ढूँढन आवै, मोसी पामर दीन दुखारी।

भोरी यत्न न सूझत कोऊ, तासौं पुनि-पुनि करत पुकारी।।

(३२८)

कौन भाँति रीझौगी प्यारी।

जिहि विधि रीझो सहज कृपानिधि, सोइ करौं सुकुमारी।।

तुम तौ सब विधि बुद्धि अगोचर, लोक लीक सौं न्यारी।

ना जानों तुम रीझिहौ कैसे, यही त्रास हिय भारी।

तुम ही क्यों न कहौ अलबेली, हौं तो शरण तिहारी।
ज्यों-ज्यों उमगि रीझि हँसि मिलिये, भोरी बलि-बलिहारी॥

(३२९)

कौन भाँति तुम रीझौ किशोरी।
ज्यों रीझौ सोइ करों कृपानिधि, जहँ लगि चलि है मोरी॥
मोहि तौ जतन नयन नहिं सूझत, मन बुधि वेग थक्यौरी।
भोरी सहज कृपालु लाड़िली, आपुन क्यों न कहौरी॥

(३३०)

श्रीराधे उर आइ हौं कैसे।
सहज कृपाल किशोरी कब लग, दिवस काटियत ऐसे॥
कौन भाग्य ऐसौ दिन देखौं, छिन टारौ न हिये से।
भोरी आस पूजावहु प्यारी, अब बनि आवै जैसे॥

(३३१)

कोटि जन्म लगि हठ यह मोरी।
बिनु पद कज्ज और नहिं लैहौ, करुणा सिन्धु किशोरी।
तीन लोक सम्पति नहिं चाहौ, रिधि-निधि-सिद्धि करोरी॥

कैतौ मिलौ कै दीन रटावौ, हौं तौ सब विधि तोरी।
कोटि जन्म वरु रोवत काटौ, हठ न तजौं भोरी।।

(३३२)

कृपा सो कैसे विसरि गई।

नित की बान हुती करुणा की, अब विपरीत भई।।
नहिं सहि जात टेर दुखियन की, मूरति कृपा मई।
हौं अब टेरत कौन बेर की, अँगुरी कान दई।।
युग-युग वही चाल चलि आई, अब कछु नई भई।
भोरी बिरियाँ सहज कृपानिधि, कौन सी रीति ठई।।

(३३३)

बिनती बार-बार का भाखौं।

जो कछु कान करौ अलबेली, तौ बहुरौ अभिलाखौं।।
सम्पति-साज लीद नहिं चाहौं, प्रेम सुधा रस चाखौं।
हौं तौ कोटि जन्म लागि प्यारी, आस रावरी राखौं।।
तेरी चरण रेणु पर कोटिन, प्राण गली में नाखौ।
आरत रटन न छांडौ भोरी, लोभ दिखावहु लाखौं।।

(३३४)

सब विधि सांचौ कठिन अभाग।
काहू विधि टारे न टरत री, लगन देत नहिं लाग।
कोटिक जन्म बीत गए ऐसे, याकौ येई राग।।
कर्म-धर्म सुभ साधन जितने, तिन पर डारी आग।
हो प्यारी , हौं बहु विधि चाहत, पद न बढ़त अनुराग।।
अब तौ सरण तिहारे आई, रही चरण सौं लाग।
यह डर सहज कृपानिधि भोरी, बान न दीजौ त्याग।।

(३३५)

मृदु मुसिकान हिये न समाई।
जीवन सबै अकारथ बीतयौ, का मुख कहौं बनाई।।
तन-मन -प्राण कोटि नहिं वारे, उमगि-उमगि निधि पाई।
सजल नयन तनु पुलकि जमुन तट, निशि कबहूँ न गंवाई।।
युगल माधुरी पान न कीन्हीं, नहीं छवि रही लुभाई।
गह्वर गिरिवर खोर साँकरी, ऊँचे न टेर सुनाई।।

दरसन मिलयौ न प्रेम जगयौ हिय, दिन सब गये सिराई।

भोरी धृग-धृग जीवन ऐसौ, सब जग होत हँसाई॥

(३३६)

जड़ अखियाँ न कभू उमडी।

या छबि दरस लोभ अकुलाती, धरि-धरि हठ न अड़ी॥

सुन्दर मृदुल मनोहर प्यारी, मूरति उर न गड़ी।

भोरी धृग-धृग जीवन ऐसौ, सब विधि विपद बड़ी॥

(३३७)

कठिन दैव गति टरत न टारी।

सोयो भाग्य न जागत प्यारी, टेर-टेर हौं हारी॥

तब कछु जानहुँ कृपा रावरी, फटन लगै हियरा री।

विषय भोग जग प्रीति न भावै, दिन दूनौ विरहा री।

सब सौं अलग बैठियत व्याकुल, पीर हिये अति भारी।

दिन नहिं भूख रैन नहिं निद्रा, रहत निहार निहारी॥

इतनी आस पुजावौ मेरी, हौं तौ सरण तिहारी।

भोरी प्रीति रीति बिनु धृग-धृग , जीवन जन्म वृथारी॥

(३३८)

कैसो बरनौ कठिन अभाग।

मूँद-मूँद दृग बैठत नित-नित , हिय न कछू अनुराग।।

तुन कौं धोखौ दैन कृपानिधि, रचत बहुत से स्वांग।

लै लै नाम नीर भरि लावत, जनु बैठी रस पाग।।

ह्वै हौ हँसि-हँसि देत लाड़िली, देखि-देखि सो राग।

छिन हूँ ऐसै हँसौ जु प्यारी, तौ लेऊं कछु माँग।

भोरी दीजै चरण कमल सौं , हिय की गाढ़ी लाग।।

३३९

कै तुम उमगौ कै मोहि उमगावौ।

कै तौ आइ मिलौ करुणानिधि, कै मोकौं ढूँढ़त भटकावौ।

कै भव ताप हरौ हँसि प्यारी, विरह ताप कै देह तपावौ।।

कै दै दरस जुड़ावौ हियरा, कै वियोग दुख सौं दरकावौ।

कै भुज गहौ कृपालु कृपा करि, कै सब ही सौं नेह छुड़ावौ।।

कै दृग आइ अचानक मुंदौ, कै मोहि हेरत बाट बिठावौ।

कै मुस्कान माधुरी देवौ, कै मोहि तन मन विकल फिरावौ ।।
कै हँसि कहौ कभू द्वै बतियाँ, कै मोसौँ किन दीन रटावौ ।
कै मोहि राखौ निकट आपने, कै तुम मेरे हिये समावौ ।।
द्वय में रुचि आवै सो कीजै, कै दोऊ करि सुयश बढ़ावौ ।
भोरी चरण शरण अलबेली, कृपा कोर की आस पुजावौ ।।

(३४०)

श्री प्यारी जी कौँ मेरी सुधि कौन करावै ।
कौन कृपालु गरीब दुखी की, बरबस बाँह गहावै ।
कहँ मैं कहँ अलबेली राधा, समझत हिय अकुलावै ।।
मन-बुद्धि-बचन अगोचर प्यारी, टेर कौन विधि जावै ।
श्री हरिवंश चन्द्र बिनु भोरी, को यह आस पुजावै ।।

(३४१)

सहज कृपालु कृपा की आस ।
जब-जब बैठि प्रभाव विचारत, हिय अति होत हरास ।
कहँ मैं कहँ अलबेली राधा, कहाँ मिलन की प्यास ।।
कौन भाग्य छिन प्रगट देखि हौँ, मुसिकन बदन बिकास ।

भोरी सहज कृपालु किशोरी, वेग हरहु भव त्रास।।

(३४२)

इतनी विनय मेरी मानों कृपाला।

झूठी प्रीति करौ सब साँची , करुणा सिन्धु दयाला।।

जनु पति मरत जरन उठि धाई, काची विरहिन बाला।

काँची प्रीति सत्य सब ह्वै गई, जब तन लागी ज्वाला।।

हों तौ रावरे दाग दगी अब, दीजै विरह विसाला।

व्याकुल तन बन-बन भटकाबौ, टेरत नाम रसाला।।

ऐसौ मन मेरौ करौ कृपानिधि, छिन-छिन होऊँ विहाला।

हा ! राधे विलम्ब ना कीजै, भोरी जन प्रतिपाला।।

४३

अब कब तोहि दूँढन उठि धावौं।

तून सम तजि सुत नारि धाम धन, त्रिभुवन चित्त न लावौं।

बिन देखे मन धीर न आवै, बार-बार अकुलावौं।।

छिन ठहरत नहिं बनै किशोरी, नयनन नीर बहावौं।

हा राधे कहि संभृम इत-उत , डोलत लोग हंसावौं।।

तन मन की न सम्भार रहै कछु, खान-पान विसरावौं।
चहुँ दिशि चकित विलोकित प्यारी, हिय कठोर दरकावौं।।
कैतौ रूप स्वाति जल पीवौं, कै टेरत मर जावौं।
भोरी चातक की गति लखि-लखि, अब कब लौं पछितावौं।।

(३४४)

सोई ब्रज भूमि विराजित नीकी।
सो वृन्दावन सोई जमुना, सोई कुञ्ज भांवती जीकी।।
हा राधे तुम कौं बिन देखे, चहुँ चितवत अकुलावौं।
किहि विधि कहाँ पाइये सोचत, धीरज चित्त न लावौ।।
तुम बिन सब जग सुनौ लागै, कछु देख्यौ न सुहावै।
श्री राधा कृपालु अलबेली, छिन-छिन टेर सुनावै।।
विलपत पुलकत अकुलत हेरत, नयनन नीर बहावै।
छिन-छिन मूर्छि परै अवनी पै, छिन संभर्म उठि धावै।।
कौन भाग्य ऐसौ दिन अइहैं, विरहा देह जरावै।
भोरी टूटि-टूटि के हियरा, टूक-टूक ह्वै जावै।।

(३४५)

कबलौं जियावौगी बिनु देखै।

ब्रज नव तरुणि कदम्ब नागरी, मृदुल मनोहर बेखै।
गुंथित अलक तिलक रहत दृग, लखत लगत न निमेखैं।
भोरी सो छबि बिना निहारे, जीवन कबने लेखैं॥

(३४६)

जूठन टूक न पायौ अब लौं।

सहज कृपाल किशोरी राधे, तरसाबोगी कब लौं॥
तुम्हरे सँग कटी सब ही ते, सब विधि भई तिहारी।
जूठन के टूकां कौं तरसत, ललकत गोद पसारी॥
स्वामिनि सबल नवल किशोरी, सर्वोपरि ठकुरानी।
हौं तौ तेरे चरण की चेरी, तेरे हाथ बिकानी॥
ऐसी रीति कौन सी नागरि, सहज कृपालु किशोरी।
भोरी उमंगि द्रवहु न कृपानिधि, सुनत याचना मोरी॥

(३४७)

भव सौं मेरौ तप्त हियौरी।

इती आस उर बढ़त लाड़िली, करुणा धाम किशोरी।।
कबहूँ बसन छोर सौं शीतल, चलै समीर भलौरी।
अंग-अंग मो परसि दयानिधि , हरै ताप सब मोरी।।
कबहूँ बरसौ सहज कृपा की, दृग सौं दृष्टि अथोरी।
मेटि दाह सब सहज कृपानिधि , रस में राखो बोरी।।
छिन-छिन अधिक अधीर लाड़िली, आस करत नित तोरी।
कुञ्ज कुटीर तीर यमुना के, भुज गहि राखौ भोरी।।

(३४८)

कबहूँ तौ लाड़िली ऐसी कृपा करौ री।
हौं तौ लोटि रहौं कुञ्जन मग, तुम हिय आइ कै पावँ धरौं री।।
हौं तौ लागि रहौं चरणन सौं, तुम झुक बिहँसि भुजा पकरौ री।
हौं तौ नैक उठौ न उठाये, तुम बल कर हठ भुजन भरौ री।।
हौं तौ सब विधि अधम अपावन, तुम तौ आपनी ढरनि ढरौ री।
भोरी नीच सबै नीचन में, कृपा आस नित द्वार ररौं री।।

(३४९)

भव निधि मेरौ मन मीन भयौरी।

सहज कृपालु किशोरी राधे, बिनय मानिये मोरी।
लीजै खेंचि सहज करुणानिधि , डार प्रीति की डोरी।।
तुम बिन और बनै यह कासौं , हौं बिनवत कर जोरी।
भोरी चरण शरण चलि आई, याचत लोचन कोरी।।

(३५०)

अब तौ हिय अति लाज लगै।
सारँग सँग शलभ , शशि ऊपर रहत चकोर ठगे।
नादहि दिये कुरंग रहत मन, मारत शर न डगै।।
पति सँग जरत चिता पर नारी, प्रेम हिये उमगै।
भोरी धृग-धृग जीवन ऐसौ, अजहुँ न प्रेम पगै।।

(३५१)

मो सम कौन निलज जग माहीं।
चातक मीन शलभ गति देखत, लाज लेस हिय नाहीं।।
पति बिन नारि प्राण नहिं राखत, उमगि सँग जरि जाहीं।
मरिबौ अबसिं अन्त काहू दिन, जीवन निपट वृथाहीं।।
कहा करौं बस चलत कछू ना, यह उर सोच सदाहीं।

अजहूँ दरस बिना धृग भोरी, पामर प्राण न जाहीं।।

लाड़िली प्यारी कभू मेरौ ताप हरि कै जाइयौ।

नेह कौ सम्बन्ध अब तौ, सत्य करि कै जाइयौ।।

हौं जु ढूँढ़त गिर रहौंगी, हार थकि कै राह में।

हेरि मृदु मुसकाइ मेरी, भुज पकरि कै जाइयौ।।

बंक चितवन बाण सौं , मेरौ हियौ हँसि बेधियो।

जाल छबि में नयन खंजन, द्वय जकरि कै जाइयौ।।

टेर मेरी तीर सी, हिय में न लग जावै कहूँ।

हाँ किशोरी लाड़िली, इतसौं सम्भरि कै जाइयौ।।

नयन करुणा सिन्धु ये तौ, आज उमड़ेंगे अबसिं।

पावँ पंकज पं परौं , तुम हू ठहरि कै जाइयौ।।

धूर में मोकौं मिलावौ, बात पै मानौ इती।

हाय मेरी धूर पै फिर, पावँ धरि कै जाइयौ।।

तब लागि विषयन में मन धावै।

जब लागि मन्द मनोहर हाँसी, हिय में नाहिं समावै।
कठिन अभाग न मिटि हैं तौलौं, प्रीति हिये नहिं आवै।।
तासौं पुनि-पुनि गोद पसारै, आरत टेरि सुनावै।
दिल दरदीली सहज किशोरी, भोरी भाग जगावै।।

(३५४)

ऐसौ विरह हिये अधिकावै।

छिन-छिन प्रीति उठै अति गाढ़ी, धीरज नैंक न आवै।।
जब-जब पात वायु सौं खरकै, तब-तब उठि-उठि धावै।
आवत जान कृपालु किशोरी, दरसन कौं अकुलावै।।
जब-जब बढ़त ताप दृग मूँदे, नाम टेर रट लावै।
शीतल वायु त्रास तन परसत, रोम-रोम पुलकावै।।
हियरा फटत जाय अलबेली, नैनन नीर बहावै।
भोरी सहज कृपालु किशोरी, तुम बिनु कछु न सुहावै।।

(३५५)

प्यारी हौं तेरे आगे गोद पसारौं।
जब लौं चार दिना यह जीवन, तेरौ नाम उचारौं।।
ऊँचे टेर सुनाऊँ छिन-छिन, नैनन धीर न धारौं।।
तन-मन धूर करौं निज भोरी, तेरे पथ में डारौं।
का जानौं मेरौ भाग जग उठै, जो उत में पग धारौं।।

(३५६)

प्रेमिन में यह साँचे चकोर।
एक चन्द्र सौं जोर रहत दृग, सब ही सौं तृन तोर।।
साँचे शलभ प्राण तजि डारत, उमगत प्रेम अथोर।
साँची नारि जरत जो पति सँग, बंधी प्रेम की डोर।।
लागत लाज देखि कै अपनौ, झूठौ हियौ कठोर।
भोरी लाज राखिये स्वामिनि, देखि आपनी ओर।।

(३५७)

बिनती सुनहु रसिक सिरताज।
शलभ चकोर मीन मृग चातक, प्रेमिन जुरयौ समाज।।
सन्मुख दृग करि देख सकत नहिं, अति खिसियानी आज।

भोरी सहज कृपालु कृपा करि, रखिये जन की लाज।।

(३५८)

कबहूँ मेरौ यह मिटि है तरसबौ।

बड़े भाग्य कहूँ मिलिहै मन कौं, अलक कुटिल में फसिबौ।।

चन्द्र बदन छवि बिमल चाँदनी, नित नव सुधा बरसिंबौ।

ओठन पै अब्दुत अरुणाई, ता पर मृदु-मृदु हँसिबौ।।

बचन मनोहर सुधा धार कौ, बदन कज्ज सौं खिसिबौ

लगि है हाथ तिरिछी चितवन, नयन कोर हिय धँसिबौ।।

पद पंकज रस माती प्यारी, श्री यमुना तट बसिबौ।

भोरी सहज किशोरी छबि कौं, नित-नित देख हुलसिबौ।।

(३५९)

किन सिखई तोहि दीन न पूछौ।।

कीनै कही सबल अलबेली,

सब विधि सौं बल हीन न पूछौ।।

तुम नित केलि करौ आनंद में,

टेरत द्वार अधीन न पूछौ।।
भजन भक्ति जप बनत न जासौं,
यों पुरुषार्थ छीन न पूछौ।।
हौं माँगत नित पीर विरह की,
याचक ऐसी नवीन न पूछौ।।
विलपत दीन दुखी भोरी सौं,
कस तब बदन मलीन न पूछौ।।

३६०

प्रीति साँची हिय जगावौगी, कहौ,
ढूँढती व्याकुल फिरावौगी कहौ।।
चारु कच के पेच के नित ध्यान में,
मेरौ मन व्याकुल भरमावौगी कहौ।।
जल की बूंदन की न कछु परतीति अब,
खून नैनन सौं ढरावौगी कहौ।।
अति विकल अंग-अंग पुलकित लाडली,

नाम अपनो नित रटावौगी कहौ।।

आयु बीती जाय टेरत द्वार पै,
मरिबे तक दरसन दिखावौगी कहौ।।

जौलौं मेरी मृत्यु मुख मूँदे नहीं,
चार दिन करुणा करावौगी कहौ।।

गिर रहौं मैं तौ उमंग कै राह में,
झुकि विहाँसि भुज गहि उठावौगी कहौ।

तेरी मृदु मुसिकान पै भोरी बिकी,
स्वामिनी मेरी कहावौगी कहौ।।

(३६१)

जब श्री राधे टेर सुनावौं।

दैउँ छुड़ाय चकोर चन्द्र सौं, चातक रटन भुलावौ।।

खग मृग जीव जगत के जेते, ते सब ही उमगावौं।

सहज प्रेम सागर की उमगन, तीनहुँ लोक डुबावौं।।

हौं तौ प्रीति रीति सौं रीति, निज गति कहा सुनावौं।

भोरी सत्य होय यह सब ही, कृपा कोर जो पावौं।।

(३६२)

कपट नीर नैनन ढरकायौ।

कछुवै करत बन्यौ न किशोरी, नाहक जगत हँसायौ।।

पर तिय द्रव्य लोभ लोचन में, अब लौं रहत समायौ।

प्रेम प्रवाह उमगि अलबेली, ताहि न धोइ बहायौ।।

उर में प्रीति नेंक नहिं आई, झूठौ स्वांग बनायौ।

भोरी धृग धर्म ध्वज पापी, जननी जनक लजायौ।।

३६३

हा!आयु सब सिरानी, जागयौ न भाग्य मेरौ।

अब तौ कृपालु प्यारी, अवलम्ब एक तेरौ।

मुस्कान माधुरी कौं, तरसत रही सदाही।

ना ओंठ खुलत देखे, ना दन्त कौ उजेरौ।।

दिन चार नीर ढारत, ढूँढत फिरौं दिवानी।

फिर अन्त धूर ह्वै है, सब चातुरी-बखेरौ।।

राखयौ न मन दिवानौ, मो बाँधि तुमने लट सौं।

जो अब विषय मे भटकै तौ खोट कौन मेरौ।।
मधु देत जो मरै री, विष दीजिये की ताकौं।
क्यों दुख सौं मोहि मारौ, हँसि नेक क्यों न हेरौ?
ललकत रह्यौ सदा ही, वे कज्ज पग परसिवे।
कर धूर निज गली में, किन दीजियौ बसेरौ।
ऐसी कठिन निलजता , अब लौं न देह छूटै।
बिनु देखे तोहि जीवन, यह कौन काम केरौ।
भोरी सौं काहे रुठौ, वा दिन अति निबल की।
कब तुमने बाँह पकरी, कब तुमने हँसि कै हैर्यौ?

३६४

मेरे कोटिक प्राण, हँसि-हँसि लीजिये,
करि कृपा छिन एक दरसन दीजिये।
तुच्छ जो यह भेंट अनुचित यह विनय,
तौ गली की धूरि अपनी कीजिये।।
जो न इतनाँ भाग मेरी लाड़िली,
तौ विरह की ताप नित तन छीजिये।

यह उमंग नित ही बसै मेरे हिये,
कैसे वह छवि नयन भरि-भरि पीजिये।।

तनु पुलक फाटत हियौ नयना सजल,
अति विकल तो नाम लै-लै जीजिये।

भोरी दौ लागै विरह की देह में,
तेरे द्वारे प्राण तलफत दीजिये।।

(३६५)

इतनौ माँगौ और या बिनु, कछु न माँगौ लाड़िली,
तेरी मृदु मुस्कान देखत, प्राण त्यागों लाड़िली।
प्रेम की तपि ताप पाहन, हीय पिघलैगौ कभू,
बनि महावर कौन विधि, तो पावँ लागों लाड़िली।।
चार दिन व्याकुल भटकती, तोहि बन ढूँढ़त फिरौं,
एक क्षण धरि शीश पग पै, प्राण त्यागों लाड़िली।
हाय बीते जन्म कितने, तुहि न देख्यौ आज लौं,
आयु यह पुनि ढर चली, कब सोइ जागों लाड़िली।।
उन युगल खंजन कौं धरि, राखी निछावर तुच्छ यह,

आयु बीती तुम बिना, किमि प्राण त्यागौं लाड़िली।
अब तौ भोरी करि कृपा, मेरी भुजा हँसि कै गहौ,
छोड़ि सब तृन तुल्य, तव पद प्रेम पागौं लाड़िली।।

(३६६)

तोहि दूँढन कुञ्ज आवौंगी अवसि,
टेर द्वारे पै लगावौंगी अवसि।
कौन मुख लै लौट जावौंगी विमुख,
प्राण द्वारे पै गवावौंगी अवसि।।
जब लौं उमगौंगी न मेरी लाड़िली,
टेरती जीवन बितावौंगी अवसि।
कैसे मेरी ओर देखोगी नहीं,
तो कृपा यह हठ छुड़ावौंगी अवसि।।
गुरु कृपा अवलम्ब यदि पैहौं कछू,
टेर सौं तिहुँतुर डुलावौंगी अवसि।
तुम उबारौ मत उबारौ करि कृपा,
भौर में नौका चलावौंगी अवसि।।

प्रेम पथ की अग्नि जोपै अति कठिन,
हौं शलभ गति तामें धावौंगी अवसि।।

जो कभू वह छवि समावै नयन में,
ढांप दृग हिय में छिपावौंगी अवसि।

जो सुधा मुस्कान मिलिवे की नहीं,
द्वार पै विष तेरे खावौंगी अवसि।।

खून जोपै नयन सौं बरसत नहीं,
बैठि कैं आँसू बहावौंगी अवसि।
भोरी जो रुचि होइ सो तुम कीजिये,
मैं तौ तेरी ही कहावौंगी अवसि।।

(३६७)

दरद देह , फिर दवा किशोरी,

पहलै प्रेम, निबाह बहोरी।

तजि सब बिकल बिपिन भट्कावौ,

ओचक बाँह गहौ फिर मोरी।।

पहलै बिरह की ताप तपावौ,

फिर मिलि देहु रँग में बोरी।
पहिले तौ हिय अति उमगावौ,
फिर तहँ आप समाइ रहौरी॥
प्रथम टेरती भूमि गिरावौ,
फिर उठाइवे धाई झुकौरी।
व्याकुल प्रथम नीर ढरबाबौ,
फिर दिखाऊ मुसकान जु थोरी॥
मूँदे नयन ध्यान करबाबौ,
अचक मूँद दृग मन्द ह्रसौरी।
पहिले मन मेरौ करहु दिवानौ,
फिर लट बांध राखो बरजोरी॥
ज्यों रीझौ सो मोपै करावौ,
फिर हँसि रीझौ कृपालु किशोरी।
पहिले आरत बिनय कहावौ,
उमगि सत्य फिर कीजिये भोरी॥

(३५८)

अपनौ दिवानौ , राखौ आप समहारी।

यह मन मेरौ सम्भारयौ न सम्भरत, हौं जु सम्भारत हारी।।

लोक लाज कुल मैड़ छाड़ि कै, कर्म-धर्म-ब्रत टारी।

यह तौ उमगि-उमगि उठि धावत, सब ही संक बिसारी।।

भाग-अभाग गिनत न किशोरी, भलौ बुरौ न बिचारी।

कुगति-सुगति कौ सोच नहीं कछु, चाहत रूप सुधारी।।

राखौ बाँधि आपनी लटसौं, कोमल चित सुकुमारी।

यह तौ प्यासौ तेरे रूप कौ, ललकत रहत सदारी।।

हौं तौ तोहि आज ही सौंपत, कहत पुकार पुकारी।

भोरी अंत कहूँ जो भटकै , तौ अब भूल तिहारी।।

(३६९)

ढारि-ढारि जल धोये नैन।

कबहूँ अमल कमल पग इन में, धरि हौ करुणा ऐन।

वेग उमगि किन उठत किशोरी, श्यामसुन्दर सुख दैन।।

दरसन कौ तन-मन अकुलावै, हिय नहिं आवै चैन।

भोरी दीन दुखारी आरत, टेरत धीर धरैन।।

(३७०)

कठिन अभाग देखि कै अपनों, हा-हा हौं पछतात।
कहा कहौं तुम बिनु करुणानिधि, देह न छाड़ि जात।।
नहिं दृग मूंद ध्यान धरि बैठत, नहिं देखन अकुलात।
नहिं बन धाइ ढुंढिवे आवत, तलफ न प्राण पठात।।
वृथा दिवस बीतत करुणानिधि, व्यर्थ जात सब रात।
लागत लाज हिये अति प्यारी, मुख नहिं आवत बात।।
हित हरिवंश प्रेम रस सागर, त्रिभुवन जस विख्यात।
भोरी सहज प्रीति की याचक, तुम्हें टेरि रहि जात।।

(३७१)

हा! राधे प्राण चले जैहैं।

मन की हौंस रहैगी मन मे, तुम पै वारि न पैहैं।
इक दिन मरन अवसि अलबेली, कब लग राखे जैहैं।।
जीवन तौ बीतयौ पछताते, मरत अधिक पछितैहैं।
भोरी सहज कृपालु किशोरी, तुम बिन काहि चितैहैं।।

पद पंकज मन मधुप बसत ना,
जगजंजाल तजि अलक फसत ना।
कोटिक यत्न हेरि हिय हारी,
नयन कोर हिय माहिं धसत ना।
इतनौ सोच रहत मन माहीं,
मुकुर सरस् छवि हिय निकसत ना।
दृग जल बहत कबहूँ करुणानिधि,
पै तब चरण कमल परसत ना।
विलपत आयु बीतिहै जानी,
दृग सन्मुख तुम हँसत ना।
कैसे प्राण कोटि तजि डारौं,
सो छवि नयन छिनहु दरसत ना।
कृपा कोर तिहुँ लोक डुबोये,
मो चातक पै कछु बरसत ना।
झूठी प्रीति जनावत तुमकौं,
लखि कृपालु क्योँ रीझि हँसत ना।।

काधौं करौं कहौ हँसि प्यारी,
हिय में प्रेम-भाव विकसत ना।
भोरी मिटै अभाग कौन विधि,
जो तब विरह प्राण निकसत ना।

३७३

इतनौ मांगौ प्राण दैकै हाथ में,
लट सम्भारो तेरी लैके हाथ में।
कब किशोरी लाड़िली करुणायत्न,
भुज गहौ हँसि-हँसि चितैकै हाथ में॥
कुञ्ज गलियन दूँढिबै तुम कौं कभू,
आइ हौं निज सीस लैके हाथ में।
तब दरस बिन अबतौ प्यारी रहि गयौ,
प्राण दिवौ विष अंचैकै हाथ में॥
कौन भागन होऊँगी रति-कुञ्ज फूल,
खेलि हौ छिन मोहि लैके हाथ में॥

धूरि पै भोरी के जो आवौ कभू,
प्यारी रज लीजौ चितैके हाथ में॥

३७४

तेरे द्वारे प्राण दैवे आइहौं,
अब न खाली , लौट जैवै आइहौं।
कब तलक रहि हौं मनोरथ ही करत,
झूठ कौ सच कर दिखावै आइहौं।
अब तौं बिलपत द्वार आरत टेरे कैं,
लोग या ब्रज के हँसेवै आइहौं।
तेरे पद कोमल कमल की आस पै,
राह में लोचन बिछावै आइहौं।
तेरे पद की धूरि लैवे के लिये,
धूरि में तन-मन मिलैवे आइहौं।
हौंस मन की अब तौ कर गुजरौं अवसि,
सीस दैवे , रीझि लैवे आइहौं।

भोरी तुम उमगौ न उमगौ लाडिली,
मैं तौ हठ प्राणन गंवैवे आइहौं।।

३७५

कबहुँ हृदय हठ ठान न देखी,
कुल दीपक वृषभान न देखी।
रहि हैं प्राण पोच तन कबलों,
परखि कृपा की बान न देखी।।
सब जग देखि कहा दृग पायौ,
जो तेरी मुस्कान न देखी।
सुनियत कृपा सुधानिधि प्यारी,
पै कबहुँ तजि प्रान न देखी।।
ललकत रही जख्म खैवे कौं,
दृग-सर भौंह-कमान न देखी।
आरत टेरि पुकारि किशोरी,
उमड़त कृपा निधान न देखी।।
तुम बिनु राखत प्राण आज लौं,

ऐसी निलज जग आन न देखी।
उमड़त क्यों न कृपानिधि भोरी,
पै मोसी अघ खान न देखी।।

३७६

ऐसौ दिन आवै कि तेरे द्वार टेरें ही बनै,
प्राण दीन्हें ही बनै, मुस्कान हेरे ही बनै।
ऐसी गिर मग में रहौं, तुमकों कृपानिधि लाड़िली,
हाथ गहते ही बनै, दृग-दृष्टि फेरे ही बनै।।
रुठि चलि हैं प्राण छिन में, छाँड़ि कै जब देह कौं,
तुमकों आते ही बनै, रहिबे कौ मेरे ही बनै।
या दिवाने मन कौं जब सौंपेगी तेरे हाथ में,
लट सौं बांधे ही बनै, जग सौं निबेरे ही बनै।।
ऐसौ मन अकुलायगौ दरसन कौं मेरौ कौन दिन,
नीर ढारै ही बनै, भरि नयन ही बनै।
भव गहन बन में भटकती दीन दुखिया मोहि कौं,
हाथ पकरे ही बनै, हियरा उजेरे ही बनै।

भोरी मेरी ओर तुम भरि नयन हेरत नहीं,
विष पिये ही अब बनै, हिय सर घुसेरे ही बनै।।

३७७

सुधि किशोरी मेरी करि हौ कौन दिन,
ताप या हियरा की हरिहौ कौन दिन?
कब उमगि टेरौंगी मैं तुमकों कुँवरि,
सुन उमगि तुम दौर परिहौ कौन दिन?
लोट रहिहौं कब विकल तो पंथ में,
तुम अचक हिय पावँ धरिहौ कौन दिन?
मैं तौ सुधि तजिहौं विरह की ज्वाल जर,
तुम सुधा दैवे ठहरि हौ कौन दिन?
देखि सोवत सीस पत्थर पै दियै,
हँसि कृपानिधि गोद धरिहौ कौन दिन?
हौं पतित अति नीच पै आसा इति,
आन अपनी आप ढरिहौ कौन दिन?
गीत मेरे सुनिकै भोरी लाड़िली,

रीझि मेरी भुज पकरि हौ कौन दिन?

३७८

माधुरी भरि नयन पीजै कौन दिन,
छबि तिहारी देखि जीजै कौन दिन?

मौ हियौ नित तीन तापन सौं तपत,
तेरे पद रस-रँग भीजै कौन दिन?

टेर मेरी दुख भरी सुनिकै पुलकि,
लाड़िली मेरी पसीजै कौन दिन?

हा किशोरी, तुम कौं देखे बिनु कहौ,
मेरौ तन पल-पल में छीजै कौन दिन?

देखिकै भरि नयन तेरी माधुरी,
लाभ निज जीवन कौं लीजै कौन दिन?

हौं कहावत रावरी दासी सदा,
बाँह गहि बलि अपनी कीजै कौन दिन?

तेरी लट पर प्राण कोटिक वारिये,

इनकों दीजै याहि लीजै कौन दिन?
बारि छवि पै कै विरह दुख सौं तलफ,
भोरी तुम पर प्राण दीजै कौन दिन?

३७९

ऐसी द्वार कब टेर लगावौं,
उमगौ और ताहि उमगावौं।
हौं तौ दीन छीन तन प्यारी,
केहि विधि बहुविध बात बनावौं।
श्री हरिवंश कृपा मति पाऊँ,
श्रील गुरु-महिमा प्रगट दिखावौं।।
लै तब नाम साँस जब खेंचौ,
निज तन शलभ समान जरावौं।
बिल्व पात लौं सहज किशोरी,
टेरत तीनहु लोक डुलावौ।।
खग मृग मूर्छि अवनि पर पटकौ,

सरवर सोखि शैल दरकावौ ।
रवि ससि चकित पंथ बिसरावै,
सरित सिन्धु तरुवर उमगावौं ॥
देब अदेव सिद्ध नर किन्नर,
सबके सब व्यवहार भुलावौं ।
कै देखौ भरि नयन किशोरी,
कै तृण सम तिहुँ लोक जरावौं ॥
बाढ़त नयन नीर झर लगै,
प्रलय पयोधि उमगि उमडावौ ।
बिनु देखे छिन धीर धरौं नहिं,
आप मिटौं सब विश्व मिटावौं ॥
यह सब सम्भव सुनहु किशोरी,
तेरी कृपा कोर जो पावौं ।
भोरी बल तब हिये कृपानिधि,
हौं तौ बहुत कहत सकुचावौं ॥

रूठि प्राण तन छाँड़ि चलैगे।

तो पद लोभ लुभाने प्यारी, धरि-धरि हठ मचलैगे।

रूठे पथिक मनावन एहौ, कठिन अभाग्य टलैगें।।

आतुर पावँ पंथ में परि हैं, कुंडल कान ह्लैंगें।

उमगत कृपा-अम्बुनिधि लोचन, सब विधि अशुभ दलैगे।।

ललित चाल नूपुर धुनि नीकी, सब ही सुकृत फलैगे।

भरि दृग छबि अवलोकत भोरी, भले भाग्य संभलैंगे।।

अखियाँ देहु रूप रस माती।

अरबरात मिलिवे कौ निसि दिन, छिन-छिन अति अकुलाती।

उड़ि-उड़ि रहत कज्ज मुख ऊपर, अलि लौं उमगि सुहाती।।

इक टेर हेर रहत हठ अरि-अरि, गिनत द्यौंस ना राती।

चन्द चकोर सरस् मिलि अटकत, रस की तृषा बुझाती।।

करत कलोल अगाध रूपनिधि, परी मीन की भाँती।

ह्वै फकीर नित रहत रूप की, तन मत लौं विसराती।।

एक नैम छबि पान निरन्तर, ज्यों चातक जल स्वाती।
हुलसत उमगत बरसत झूमत, छकित चकित रँग राती।।
मृग मद सरस् भाल पै, अँखियन काजर लौं जु समाती।
वह छवि छाँड़ि न हेरत काहू, नहिं विषयन ललचाती।।
अति रिझवार उदार सुन्दरी, करुणा कोमल गाती।
भोरी हित हँसि आस पुजावौ, छिनक हेरि मुस्काती।।

३८३

ऐसौ गिरिवौ कुंवर किशोरी, कब मोसौं बनि आवै।
कोमल कनक कमल कर कबहूँ, उमगि कृपालु उठावै।
ऐसी टेर कौन दिन करि हौं, बरबस धीर छुड़ावै।।
कोमल चित्त कृपालु किशोरी, अति आतुर उठि धावै।
तन-मन की सम्भार रहै कछु, भूषण वसन भुलावै।।
धीरज धरत बनै नहिं क्यों हू, पल-पल अति अकुलावै।
भोरी हित मेरी कहि मुख सौं, बार ही बार बुलावै।।

३८४

कबहूँ बदन कमल दिखरैहौ।

कोमल चित कृपालु करुणानिधि , हँसि-हँसि हृदय समैहौ।।

गूँथित अलक तिल माथे पै, सैंदूर मांग पुरैहौ।

नाक बुलाक नयन अंजन जुत, चितवन बंक चलैहौ।।

चिबुक चारु भृकुटि अति बाँकी, अधर मधुर मुस्कैहौ।

कोटि मयंक बदन की सोभा, हास सुधा बरसैहौ।।

सांवल बिंदु चिबुक पर राजत, सो छबि हृदय बसैहौ।

भोरी बहुत कहा मुख कहिये, अँखियाँ तृषित सिरैहौ।।

३८५

बिनु देखे कैसे धारौं धीर।

त्रिभुवन शोभा धाम किशोरी, बिहरत जमुना तीर।।

नव-नव गति लै ढरत रास में, फहरत अंचल चीर।

झलकत गात निचोल नील में, जनु ससि जमुना नीर।।

लटकत लर चवै चली सुधा मनु, बाजत मृदु मंजीर।

चंपक कनक कांति मिलि सोहत, कोमल कमल शरीर।।

ऐसे अधिक सिकारी कीन्हें, भृकुटि धनुष दृग तीर।

सांवल बिंदु श्याम मन डारे, चिबुक कूप गम्भीर।।

देखन कौं नयना अकुलावै, हियौ तपत भव पीर।
कौन भाग तनु परसहि प्यारी, अंचल डुलत समीर।।
सहज कृपालु किशोरी स्वामिनि, हरहु सकल भव भीर।
भोरी दीन दुखारी राखौ, भुज गहि कुञ्ज कुटीर।।

३८६

कैसे धीर हिये में आनौ।

सो छवि अजहुँ देखियत नाहीं, जो लखि श्याम बिकानौं।।
सो दृग कोर गड़ी न उर में, सो वपु दृगन समानौं।
सो मुसिकान माधुरी देखत, हियरा तौ न जुड़ानौ।।
हा हरिवंश किशोर लाडिले, जीवन वृथा सिरानौं।
मोकौं इक अबलम्ब रावरौ, हौं कछु और न जानौं।।
सहज कृपाल कृपा करि कीजै, प्रगट कृपा कौ बानौं।
भोरी गोद पसारि रावरे, द्वारे बिनती ठानौ।।

३८७

जो पै जिवावौ तो ऐसे जिवावौ।

करुणा धाम कृपाल कृपानिधि, सन्मुख मृदु मुस्कावौ।

मोहन प्रान जीवन धन सरबस, सो मो हृदय समावौ।।
मुदित सम्भारत कच मुख छूटे, कर गहि हृदय जुड़ावौ।
तुम बिन और लखौं नहिं काहू, दृग छवि में अटकावौ।।
नित नव छबि नव रूप माधुरी, दृग पुट भरि-भरि प्यावौ।
भोरी दीन दुखारी श्री हित, चरणन सुवस बसावौ।।

३८८

कहौ कृपालु मोल मोहि लैहौ।
खोटी दीन दुखारी पामर, कृपा कोर अपनैहौ।।
तिहुँपुर सुयश विदित अलबेली, मेरी विनय चित लैहौ।
सर्वोपरि उमगीली राधे, मोसी पोच निभैहौ।।
साधन साध्य निदरि हौ सब ही, श्रुति की लीक मिटैहौ।
भोरी श्री हित नातौ नीकौ, चरणन सुबस बसैहौ।।

३८९

द्वार रावरे मरिबौ नीकौ, विरह ताप सौं जरिवौ नीकौ।
जो तुम ठहरौ भरि दृग देखन, विकल पंथ में परिवौ नीकौ।

जो तुम उमगि सुधारन आवौ, तौ यह भाग्य बिगरिवौ नीकौ।।
दरस प्यास अकुलात किशोरी, ढूँढत बिपिन बिचरिवौ नीकौ।
जीवन व्यर्थ गयौ सब हा-हा, दृग दो दिन जल ढरिबौ नीकौ।
उठिबौ भलौ न भुज बिन पकरै, आरत द्वार पै ररवौ नीकौ।
रहिबौ भलौ अटकि कै छबि में, सुधि बुधि सबहि बिसरिवौ
नीकौ।।

कृपा सिन्धु हित दीन दुखी की ,उमगत बाँह पकरिबौ नीकौ।
कुञ्जन जात नवल अलबेली, बूझन कुसल ठहरिवौ नीकौ।।
छूटी लटन सम्भारत मुख पै, अचक पावँ हिय धरिवौ नीकौ।
सुनिवौ भलौ न आरत बानी, दसन-छटा तम हरिबौ नीकौ।।
मेचक कच दृग काजर रेखें, हिय समाइ उर अरिबौ नीकौ।
किसलय सयन पधारन प्यारी, भोरी की सुधि करिबौ नीकौ।।

३९०

तुम बिन जीवन भावत जाहि, जीवत कहौ कौन विधि ताहि।
जीवन लाहु यही करुणानिधि, अटक रहैं लोचन छवि माहिं।।
वा रंग रँगै नयन हित झूमै, विषयन में ना कबहूँ जाहिं।

इती मोहि अभिलाष किशोरी, बसहुँ सदा पद-पंकज छाहिं।।
विष सम लगै और सुख जेतौ, तुम बिन कछु सुहावै नाहिं।
मो पामर तन नयन जु फेरहु, शिव ब्रह्मादिक देखि सिहाहिं।।
कै भरि नयन दरस सुख पाऊँ, कै तन त्यागौं द्वार कराहिं।
इतनौ याचत भोरी किशोरी, पाहि-पाहि दरदीली पाहि।।

३९१

चलत-चलत हँसि हेरिये इत छिन।

कोमल चित्त कृपालु किशोरी, तुम बिन बीत गये बहुते दिन।
विलपत ढूँढ़त दिवस कटैं कब, निशा बीति है गुण-गण गिन-
गिन।।

छिन-छिन अति अकुलैहै हियरा, देखौ कछु न रुचै कब आँखिन।
हा-हा अब न जियावौ प्यारी, भोरी दृग भरि दरस मिले बिन।।

३९२

चलत-चलत मो तन हँसि हेरौ।

आलस बलित नयन अरुणारे, कृपा कोर छिन इत हू फेरौ।।

आरत टेरत आयु सिरानी, तुम बिन और न कोऊ मेरौ।
पूछौ कुशल बिहँसि करुणानिधि, दारूण त्रास हरहु हिय केरौ।।
मुख मयंक छिन प्रगट दिखावौ, जेहि बिन तिहुँपुर लगत अँधेरौ।
भोरी चरण शरण चली आई, अब सब भाँति भरोसौ तेरौ।।

३९३

चलत-चलत हँसि हेरिय प्यारी।
कृपासिंधु दरदीली स्वामिनि, कोमल चित सुकुमारी।।
उमगि बेगि किन द्रवहु किशोरी, टेरत दीन दुखारी।
खोटी रंक अभागी पामर, सब विधि पोच भिखारी।।
तुम सौँ आस तदपि करुणानिधि, ठाड़ी गोद पसारी।
नीच पतित भरि नयन निहारौँ, समरथ राखन हारी।।
तुम बिन ठौर कहूँ नहिं सूझत, नयन लगत अंधियारी।
भोरी त्रिभुवन सूनौ तुम बिनु, कछुव सुनावत नारी।।

३९४

अधमन हित चिरजीवहु प्यारी।
तुम नित राज करौ दरदीली, औरन सौं कहु काज कहारी।।
सेवा गुण लखि रीझत सब ही, पोच देत द्वारे सौं टारी।
पामर पतित निबाहन कारन, त्रिभुवन कीरति विदित तिहारी।।
कोऊ रहौ जाहु करुणानिधि, तुम रस बिलसहु स्वबस सदारी।
भोरी हित द्वारे पै ठाड़ी, देत असीस जात बलिहारी।।

३९५

पतितन हित नित कीजिय राज।
अधम उधारण सहज कृपानिधि, सकल लोक सिरताज।
स्वारथ के सब मीत जगत में, अन्त न आवत काज।।
तुम बिन कौन राखिबे बारौ, पामर जन की लाज।
नित की बान सहज करुणा की, कहाँ बिसारी आज।।
तुम बिन कौन काम के प्यारी, जीवन सम्पति साज।
भोरी ऐसेहि जुग-जुग राजहु , नवल निकुञ्ज समाज।।

३९६

कुञ्ज जात छिन इतहुँ चितैये।

कोमल चित कृपालु करुणानिधि, हिय की ताप बुझैये।
हैं कब की ललचात किशोरी, हँसि-हँसि आस पुजैये।।
नयन कोर रँग बोर कृपा करि, चरणन सुवस बसैये।
भोरी कुसुम-सेज दोऊ राजहु, कोटिक काम लजैये।।

३९७

कहौ कृपालु कहा मन ठानी।
निज हिय की बहु बेर कही मैं, हिय अभिलाष कहानी।
निज हिय की अब कहौ कृपा करि, कोमल चित सुखदानी।।
मैं तो द्वार टेरि हँ तुम्हरे, हँ तौ हाथ बिकानी।
तुम हू कभू कुशल बूझौगी, अपनी जान दिवानी।।
नित की बान सहज करुणा की, सुनहु सुबस महारानी।
भोरी दीन दुखारी याचक, टेरि-टेरि घबरानी।।

३९८

आरत टेर सुनहु दुखिया की, टेरत द्वार भिखारी सदा की।
जप-तप-संयम-नियम अपारी, वेद शास्त्र सब कहत पुकारी।
मोकौं भली इक आस तिहारी, तुमकौं भली यह बान कृपा की।।

मोकौं भली थकि भृम महि परिबौ, तुमकौं भली झुकि बाँह
पकरिबौ।

मोकौं भली तोहि टेरत मरिबौ, तुमकौं बरसिबौ वृष्टि सुधा की।।

तुमहि निबाह करौ पोचन की, हरिबौ ताप दुखारी जन कौ।

मोहि भलौ इतनौ अलबेली, सब जग कहत दासी राधा की।।

तुमकौं भलौ अभाग मिटैबौ, मोकौं भलौ अभागिन ह्वै बौ।

भोरी पतित , पतितपावन तुम, लाड़ लड़ैती भानु बाबा की।।

३९९

अँखियाँ बार-बार हठ ठानत।

बिनु विधु-बदन बिलोके प्यारी, एकहु ज्ञान न मानत।।

स्वर्ग-मुक्ति सुर दुर्लभ पदवी, तृन लौं चित न आनत।

साधन तुच्छ अल्प फल तिन के, सुगति-कुगति नहिं जानत।।

सहज कृपालु बान बिन कोऊ, उर अबलम्ब न मानत।

भोरी हित टेरत अति आरत, एक तुमहिं पहिचानत।।

४००

इन नैनन कौ मोहि भरोसौ।

इन समान को पतित उधारन, पतित पोच को मोसौ।।
उमड़त कृपा नीर-निधि लोचन, परि है सुरंग छटारी।
तन मन भीजि छिनक में जैहै, सुनहु कृपानिधि प्यारी।।
इनकी बान सहज दरदीली, सोई आसरौ मेरे।
कठिन अभाग पलक में मिटि है, एक नज़र भर हेरे।।
इनकी आस जन्म में हारयौ, अब जो होइ सु होई।
भोरी सहज कृपालु लाड़िली, तुम बिन और न कोई।।

४०२

चन्द्र बदन मुस्कान विलोकौं, त्रिभुवन सुषमा-खान विलोकौं।
उमगत नाहिं आजहू प्यारी, पै कबहूँ दै प्रान विलोकौं।।
कौन भाग्य ऐसौ दिन आवै, उमगत कृपा निधान विलोकौं।
हौं किम प्रीति-रीति सौं रीति, परखि कृपा की बान विलोकौं।।
नैनन-नयन फँसे दोऊ प्यारे, करत माधुरी-पान विलोकौं।
श्रीहरिवंश कृपालु कृपा सौं, मोहन प्रान की प्रान विलोकौं।।
आलस भरी प्रात चलि आवौ, नींद विवस अंगड़ान विलोकौं।

पतित निबाह बान हित भोरी, छाँड़ि निगम कुलकान विलोकौं।।

४०३

अँखियाँ जो पै चकोरी होती।

तौ उड़ि चन्द्र बदन लगि रहती, बैठि-बैठि क्यों रोती।।

इक टक सुधा-माधुरी छाकी, उमगि-उमगि पग धोती।

भोरी हित नित तरसत द्वारे, वृथा जन्म क्यों खोती।।

४०४

खँजन खग जो होते नैन।

तौ उड़ि श्री बन किन चलि आते, लाहु जन्म कौ लैन।।

ललकन फन्द फँसे ही रहते, मत्त मूँदि दिन-रैन।

करि हठ हौंस हार ही मानी, करतब कछुब बनैन।।

सब विधि पोच पतित पामर हौं, सुनहु श्याम सुख दैन।

दृग ललचात माधुरी प्यासे, हृदय न आवत चैन।।

कबहूँ उमगि द्रवौ अलबेली, प्यारी करुणा ऐन।

भोरी हित अकुलात द्वार पै, टेरत आरत बैन।।

लट सम्भारत लाड़िली आवौ कभू,
मेरौ मन हँसि बाँधि लै जावौ कभू।
दिन बहुत तुम बिनु जियत बीते प्रिया,
यह निलजता मेटि मुसिकावौ कभू।।
नयन प्यासे देखिबे तरसत बिकल,
माधुरी पीयूष बरसावौ कभू।
मेरौ मन मचलत तुम्हें दृग देखिबे,
ये दिबानौ अपनौ समझावौ कभू।।
टेर द्वारे पै करत बीतयौ जन्म,
अब तौ करुणा सिन्धु उठि आवौ कभू।
तेरौ तन-मन भेंट मृदु मुस्कान की,
आइ कै यह मोल निबटावौ कभू।।
जो पै हिय की ताप झूठहि हौं कहत,
पग हृदय धरि मोहि सरमावौ कभू।
हौं बिकी हरिवंश हित के नाम पै,

भोरी हित गहि बाँह अपनावौ कभू।।

४०६

सब नातौ मैं तुम सौं मानत।

इतनी कबहुँ कहौ हँसि तुमहुँ, हौकि नहीं मोहि जानत।।

कबहुँ मैं गुण बरनत तुम्हरे, कबहुँ बिनती ठानत।

कहौ कभू सुधि तुमहुँ करत हौ, निज चेरी करि मानत।।

तुम बिन और न कोऊ मेरे, सौं नित टेरि बखानत।

कहौ दीन दरदीली तुमहुँ, दीन दुखी पहिचानत।।

तुम्हरी कृपा एक बल मेरै, भाग-अभाग न जानत।

कहि द्वय बचन कभू हित भोरी, क्यों न प्रिया समानत।।

४०७

मो मन कहत कृपालु किशोरी, कभू कृपा करि आवौगी।

आरत टेर दीन दुखिया की, सुनत उमंगि उठि धावौगी।।

कुंतल कुटिल सम्भारत धावत, हँसि-हँसि हृदय लगावौगी।

फहरत अंचल चंचल कुंडल, पल-पल अति अकुलावौगी।।

ललित चाल नव वयस मनोहर, नूपुर मधुर बजावौगी।
बरसत रंग रँगीली अँखियाँ, रँग में मोहि डुबावौगी।।
अति बलहीन छिन दुखिया कौं, भुज गहि आइ उठावौगी।
भोरी हित यह रीति सदा की, अब फिर प्रगट दिखावौगी।।

४०८

काके बल अभिमान करौंगी।
बिनु भुज गहै कृपालु लाडिले, किस विधि धीर धरौंगी।
हिय में नव उमंग छिन ही छिन, करि-करि हौंस मरौंगी।।
कौन भाग सन्मुख दृग देखत, पंकज पावँ परौंगी।
केहि बल भुक्ति-मुक्ति सुर दुर्लभ, पदवी हिय न धरौंगी।।
अति निसंक सब ही सौं न्यारी, निगम नीति निदरौंगी।
भोरी हित-प्रभु पद मधुमाती, कब कुंजनि बिचरौंगी।।

४०९

मृदु मुस्कान देखिबौ भावै।
अरबरात द्रग चातक प्यासे, पल छिन धीर न आवै।।
मृदुल मनोहर मूरत सुन्दर, देखत मन ललचावै।

सब जग सूनौ लगत कृपानिधि, तुम बिनु कछु न सुहावै।।
वृथा भानु उगत नभ चन्दा, वायु त्रिविध बहि आवै।
त्रिभुवन निबिड़ अँधेरौ तुम बिन, ताप अधिक अधिकावै।।
सोचत समझत बनत न कछुवै, तन-मन अति अकुलावै।
भोरी श्री हित द्वार याचकी, ललक-ललक रहि जावै।।

४१०

ठाड़ी द्वार भिखारिन कब की।

लै-लै नाम पुकारत आरत, अँखियाँ प्यासी छबि की।
नहीं दृग ढरत न फरकत बैयाँ, रीति नई यह अब की।।
चलत उतावल पंथ , परत नहीं श्रुति, धुनि नूपुर रब की।
सब कोऊ कहत पोच प्रति पालक, राखन हारी सब की।।
मैं केहि भाँति कहौ करुणानिधि, उलटि कथा अनुभव की।
भोरी हित बलि विनय विचारौ, बिरद सम्भारौ अब की।।

४११

मैं भोरी मेरी भोरी किशोरी।

मैं भोरी सी बिनती लाई, तुम रीझन में भोरी।
छोटे मुख बड़ विनय लाड़िली, विहँसि बेगि पुजवौरी।।
भोरी स्वामिनि भोरी चेरी, नातौ नेह भलौरी।
भोरी हित हरिवंश कृपा बल, सत सम्बन्ध जुरौरी।।

४१२

कमल दल नैनन की आस।
कबहूँ उमगि बूझि हौ मेरे, मन की हौंस-हुलास।।
उमड़त कृपा सिन्धु परिपूरण, सब सुषमा की रास।
चितवन चपल हिलोरत चहुँ दिसि, तापर भृकुटि विलास।।
दरदीले रिझवार दीन हित, अति उदारता वास।
सील सँकोच स्नेह सुभगता, लाज रूप रस हास।।
मधु मद भरे रँगीले प्यारे, कोमल कमल विकास।
भोरे चतुर लड़ैते पैने, करत दीन भय नास।।
जाकी पद रज शिव-अज याचत,सो जिनकौ निज दास।
भोरी हित देखन कौँ ललचत, छिन-छिन छवि की प्यास।।

४१३

इतनौ है पुरुषारथ मेरौ।

जप तप योग याग नहिं जानौ, साधन नियम बखेरौ।।

इतनी बात बनि परै मोसों, कबहुँ अबेर सबेरौ।

भोरी ढार-ढार दृग आँसू, नाम पुकारूँ तेरौ।।

४१४

यों सुधि लीजौ नवल किशोरी।

वृन्दावन की ललित लतन में, गिनती कीजौ मोरी।।

गोरी घटा साँवरी हिलमिल, उमड़त प्रेम हिलोरी।

कबहुँ-कबहुँ बलि सींचत रहियौं, लाड़ भरी दृग कोरी।।

कबहुँ दिये ललित गलबहियाँ, छाँह विरमियौ थोरी।

कबहुँ झूला डारि झूलियो, रसिक रँगिली जोरी।।

फूलि-फूलि कै चटकत कलियन, खोलौं आंख करोरी।

निसि बासर देखत न अघाउँ, इतनौ जाँचत भोरी

शरणागति

४१५

लग्यौ नेह सब भाँति निभैहौ।

ये मेरे मन सुदृढ भरोसौ, बाँह गहे की लाज लजैहौ।।

लोक वेद परलोक जाति कुल, पाप पुण्य दुख द्वन्द छुड़ैहौ।

भोरी आपनि जान कृपा करि, श्री पद-पंकज सुबस बसैहौ।।

४१६

तो बिन और न कोऊ मेरे।

तन मन चित्त प्राण करुणामय, सब विषयन के चरे।

यह बैरी निशि वासर मोकौं, देत जु त्रास घनेरे।।

तिनकौ कौन आसरौ मोकौं, मैं गरजत बल तेरे।

हठ हिय आइ बसौ अलबेली, भोरी भाग्य जगेरे।।

४१७

मैं तो रावरे हाथ बिकानी।

भव जलनिधि सौं अब न डरौंगी, सत्य कहौं हठ ठानी।

रहौ कि जाहु सोच नहिं मेरे, लोक लाज कुल कानी।।

संजम व्रत श्रुति साधन जेते, तिन सब कौं दियौ पानी।
भोरी सब विधि अधम उधारण, अलबेली ठकुरानी॥

४१८

तेरी ह्वै अब कौन सौं डरि हौं।
नर्कन की न कछू मोहि चिन्ता, रुचि ऐहै सोई करिहौं।
डर न कछू इंद्रिन कौ मन कौ, अब स्वछन्द विचरिहौं॥
सोच न पोच कहाये जग में, यम की भीति न धरिहौं।
जानत हौं तुम आइ अबहुँ हठ, भोरी बाँह पकरिहौ॥

४१९

भाग्य हीन खोटी को लैहै।
को नित लाड़ लड़ाय राखि है, नित मुँह मांगौ दैहै॥
को सब दोष मेटिहै पल में, हृदय प्रेम सरसैहै।
भुज दै अंस कुञ्ज को चलि है, करुणा कोर चितैहै॥
को भव-ताप सहज हँसि हरिहै, रोवत आइ हँसैहै।
को दयाल महि परत विकल तनु, भुज गहि आइ उठैहै॥
को भव-भँवर बहत करुणानिधि, कर गहि पार लगैहै।

सुर मुनि दुर्लभ सहज सुगति दै, को नित सुबस बसैहै॥

सुनहु कृपालु किशोरी ऐसी, आसा कौन पुजैहै।

तुम बिन कौन कृपानिधि भोरी, बाँह पकरि अपनैहै॥

४२०

भाग अभाग न जानत अपने।

तन मन अकुलत जब सुधि आवत, पातक पुंज घने॥

सहज कृपालु बान की आसा, धीरज होत मनै।

मेरी बिगरी जदपि बिगरत, तेरी बनाई बनै॥

यह वर देहु कृपालु किशोरी, मति रस-रीति सनै।

तुम बिन और न बान यह काकी, जो अवगुन न गनै॥कोटिक
दोष मेटि अपनावै, देखि अधीन जनै।

भोरी के हिय बसहु निरन्तर, जगत-नींद-सपने॥

४२१

श्री राधा इक्र आस हमारी।

सबल सबै बल के बल गाजत, अबलनि कौ बल तैं सुकुमारी॥

समरथ तैर चले भव सागर, पोचन कौ तोहि सोच सदारी।

पर के उड़ चले व्याध विलोकित, बेपर की तू राखिबे हारी।।
भाग्यवान निज भाग्य सराहत, भाग्य हीन कौं आस तिहारी।
पुण्य करत सो शुभ फल पावत, पतितन कौं तू पावन प्यारी।।
सब विधि सौ अबलम्ब न जाकै, तू नित ताहि निबाहन हारी।
भोरी भाग्य हीन अति खोटी, सबल स्वामिनी सिर पर प्यारी।।

४२२

जेहि विधि तोहि प्यारी लागौं।

तैसी मोहि कीजिये प्यारी, बार-बार यह मांगौ।।
और नहीं कछु काज काहु सौं, तुम ही सौं अनुरागौं।
भोरी तेरी रीझ लहन कौ, त्रिभुवन तून सम त्यागौं।।

४२३

जेहि विधि तोहि अति लागौं प्यारी ।

सो गुण तैसी रहन दीजिये, करुणा कोर निहारी।।
हौं तौ तेरे हाथ बिकानी, तू इक राखन हारी।
तेरी सहज रीझ नित चाहौं, और सौं काज कहारी।।
कोटि प्राण तेरे पग पर वारौं, छिन हू देखि छटारी।

भोरी दृग भरि दरसन दीजै, मांगौ गोद पसारी।।

४२४

कोटि-कोटि ब्रह्मांड न लैहौं।

बिन पद कज्ज छटा दृग देखे, बार-बार पछितैहौं।।
धन ग्रह कुटुम्ब राज सुख सम्पति, कहा सँग लजैहौं।
योग सिद्धि नवनिधि जग गाई, सपनेहुँ चित्त न लैहौं।।
मुक्ति स्वर्ग ब्रह्मादिक पदवी, लै-लै कहौ कहा पैहौं।
चरण सरोज नैन बिनु देखे, नाहक जन्म गंवैहौं।।
यह तजि और कछू नहिं चाहौं, आरत टेरि सुनैहौं।
भोरी छिन इक्र भरि दृग देखे, प्राण निछावर दैहौं।।

४२५

सब विधि शरण गहि अब तोरी।

अब की टेरत द्वार रावरे, क्यों सहि जात किशोरी।
उठिहौ उमगि कभू करुणानिधि , देखि दीनता मोरी।
अबगुण कोटि समुझि नहिं रुकिहौ, उमड़त कृपा अथोरी।।

हैं जानत तोहि मेरी स्वामिनि, करुणा मृदुल हियौरी।

जो पै प्रीति हिये नहिं तौहू, आस न छाँड़त भोरी।।

४२६

हैं तौ और कछू नहिं चाहौं।

ऐसौ मन मेरौ करौ कृपानिधि, तेरे द्वार पै नित्य कराहौं।।

सम्पति सुख कछु और न चाहिये, याही सुख निज भाग सराहौं।

भोरी सहज किशोरी राधे, कुगति-सुगति कछू सोचत नाहौं।।

४२७

काहू भाँति रीझिये प्यारी।

जो चाहौ सौ करहु कृपानिधि, हौं तौ शरण तिहारी।

जो दुख चाहौ सबहि सहावौ, हौं सहिहौं सुकुंवारी।।

नर्क-स्वर्ग गति-कुगति न सोचौ , तुम हिय बसौ सदारी।

कीर्ति हानि धन हानि कृपानिधि, प्राण हानि दुख भारी।।

सब ही देहु कृपाल किशोरी, जो रुचि होइ तुम्हारी।

कोटि प्राण तेरे पर वारौं, कबहुँ दिखाऊँ छटारी।।

४२८

निठुर कहौं न कठोर कहौं री, कोमल चित चितचोर कहौं री।
जो भटकावौ बन-बन व्याकुल, दीन्हीं बंध सौं छोर कहौं री॥
जो दृग बाण करौ हिय घायल, लखी कृपा की कोर कहौं री।
जो सब सौं सम्बन्ध छुड़ावौ, गही बाँह बरजोर कहौं री॥
जो सब भाँति मिलाओ धूरि में, करी भांवती मोर कहौं री।
दृग-जल-धार नहाइ उठौ जो, दीन्हीं मोहि रँग बोर कहौं री॥
तलफत विरह-ताप तनु त्यागूँ, दीन्हीं कीर्ति अथोर कहौं री।
भोरी टेर सुनौं न दयानिधि, तौ निज भाग की खोट कहौं री॥

४२९

या द्वारे सौं नातौ हमारौ।

खोटे पतित निबाहन कारन, प्रगट रावरौ द्वारौ।
कितहू ठौर न ठीक दयानिधि, इक अवलम्ब तिहारौ॥
साधन और कछू नहिं सूझत, दृग लागत अँधियारौ।
भोरी की अलबेली स्वामिनि, चरण शरण प्रतिपारौ॥

४३०

मैं हूँ कभू अभिमान करौंगी।
सिर पर सबल स्वामिनी राधा, तिहि बल भय बिसरौंगी।
तून सम मुक्ति-स्वर्ग सुख गिन्हौं, श्रुति साधन निदरौंगी।।
पातक पुंज अपार भूलि हौं, सुगति-कुगति न डरौंगी।
मत्त मुदित रस छकी खुमारी, राधा नाम ररौंगी।।
श्रीबन नवल निकुञ्ज-निकुंजनि , गरजि-गरजि बिचरौंगी।
भोरी हित स्वामिनि सौं मचलत, हठ करि द्वार अरौंगी।

४३१

गरजत मैं हूँ फिरौंगी प्यारी।
तुम्हरे बल न गिनौंगी काहू, फिरिहौं संक बिसारी।।
निगम नीति कुलकानि मेटि तजि, लोक लीक सौं न्यारी।
श्रीबन मत्त मुदित बिचरौंगी, प्रिया रूप मतवारी।।
सिर पर हँसत स्वामिनी राधा, समरथ राखन हारी।
भोरी पोच पतित अति पामर, तदपि हौंस हिय भारी।।

श्रीराधा-नाम

अहो लड़ैती इतनी मोपै, कृपा करौ बलि जाऊँ।
जागत सोवत रटौं निरन्तर, राधा-राधा गाऊँ।।
हिय जिय रसना स्वास-स्वास प्रति रोम-रोम रट लाऊँ।
जौलौं नाम साँस तब ही लौं, एक मेक ह्वै जाऊँ।।
नाम रूप मय, रूप नाम मय, विवि मय ह्वै दुलराऊँ।
पियत छकी मतवारी प्यासी, प्यास पियत न अघाउँ।।
जान परै नहिं साँझ सबेरौ, ऐसे जन्म गमाऊँ।
श्री हित बेगि ढरौ भोरी पै, हुलसि-हुलसि जस गाऊँ।।

कुंडलियां

४३३

भाग अभाग लिखयौ जु विधि, ताकौ मोहि न ख्याल।
अपने कर लिख लेत हौं, नाम तिहारौ भाल।।
नाम तिहारौ भाल, भाग निजु याकौ मानौं।
याही की नित आस, आन सपने नहिं जानौं।।
विषयन सौं न बिराग चित, नहिं चरणन अनुराग।
तदपि भाल राधा प्रगट, हित भोरी कौ भाग।।

मेरौ जिय घबरात रहत नित, ऐसै तौ मन धीर न आवै।
 नाम-स्वास दोऊ बिलग चलत हैं, इनकौ भेद न मोकों भावै।।
 स्वासहि नाम, नाम ही स्वासा , नाम-स्वास कौ भेद मिटावै।
 रोम-रोम रग-रग जब बोलै, तब कछु स्वाद नाम कौ पावै।।
 इन्द्रिय मन सब होइ नाम जब , सकल विषय फुरना जु नसावै।
 बाहिर कछु न कछु तब भीतर, जिय और नाम एक ह्वै जावै।।
 तब निज रूप नाम कौ प्रगटै, तन में श्रीबन सहज दिखावै।
 ह्वै मृदु भूमि चरण तल चूमे, जमुना ह्वै जु ललित लहरावै।।
 जल-थल विविध कुसुम ह्वै फूले, सीतल पवन सुरभि लै धावै।
 अंबर ह्वै अंग अंगनि लिपटे, विविध अनिल हठि ताहि उड़ावै।।
 प्रफुलित लता लपटि भई कुंजै, पुहुप सेज ह्वै तहँ जु सुहावै।
 तापै हित उमगिली जोरी, तन मन उमगि-उमगि उमगावै।।
 तन हित, मन हित , प्रान तहाँ हित, हित मे ह्वै हित रूप समावै।
 हित कौ कोक कला सब हित की, हित पानिप , हित रँग

चुचावै।।

हित अनखन भौंह कौ चढिवौ, हित मिठास मृदु मुसिकान भावै।

हित नीवी-बन्ध खोलत, हित भुज गौर-श्याम हित कलह
मचावै।।

हित कौ खेत, जुरे भट हित के, हित कौ खेल अधिक अधिकावै।

हित उमगीली हित उमगीलौ, हित उमगै हित ही उमगावै।।

हित जु विवस, हित चेतत छिन-छिन , हित पानी हित प्यास
कहावै।

बिच-बिच मृदु-मृदु बोलनि की, हित पसेब हित आनन छावै।।

हित पौंछे हित बिजन डुलावै, हित समीर ह्वै सुख जु बढ़ावै।

हित नख-छत ह्वै लसत कुचन पै, हित रद-छद अधरनि
दरसावै।।

हित चुम्बन, हित ही परिरम्भन, भुजनि कसनि हित, हित
लपटावै।

हित जु झरत कुसुमावलि टूटी, हित लट छुटी कपोलन दावै।।

हित कौ रूप उमंग कौ सागर, क्षुभित अनन्त लहर अकुलावै।

तामें बून्द मिली हित भोरी, सो कहि कौन भाँति ठहरावै।।

सोहनी महिमा

॥दोहा॥

रे मन नवल निकुंज की, सुमिर सोहनी प्रात।
लपटी प्यारी चरण रज, लसत सहचरी हाथ ॥१॥

अहो सोहनी सोहनी, यह मति मौको देहु।
अति अधीनता दीनता, पद रज सों नित नेहु ॥२॥

तो समान कब सहचरी, मोहू कौ अपनाय।
नव निकुंज रति माधुरी, प्राप्त सुनावैं गाय ॥३॥

विरमि -विरमि हा सोहनी, देखि प्रिया पद अंक।
प्रियतम मन अटक्यो जहां,मेटत तिन्हैं निसंक ॥४॥

श्री प्यारी पद रैनुं में, उमगत लोटत लाल।
कोमल कर चुटकीनु लै, तिलक बनावत भाल॥५॥

कण-कण में जा रेणु के, बसत लाल के प्रान।
हाय सोहनी ताहि यों , साधारण मत मान॥६॥

अहो सोहनी सोहनी , यह न सोहनी रीति।
मो प्राणन की प्राण रज, ता संग करत अनीति॥७॥

कण -कण पै वारैं यहाँ, कोटिन तन-मन-प्रान।
सो रज दूर न डार तू, नेकु निहारौ मान॥८॥

अवसि झारि जो डारिबौ, यह रज प्राण अधार।
तौ मो तन-मन-प्राण में, हिय में, जिय में डार॥९॥

कोटि विश्व ऐश्वर्य सुख, नहिं जु एक कण तूल।

सो रज तोकौं खेल है,मेरी जीवन मूल॥१०॥

हरि-हर विधि ललकत रहत, लहत नहीं कण एक।
ताहि झारि यौ फैकिवौ, तुम्हें कौन यह टेक॥११॥

इतने हू पर सोहनी, लागौ प्यारी मोहि।
अहो कौन यह मोहिनी, लेत जु प्राणन मोहि॥१२॥

मो प्राणन की प्राण रज, तासन करत अनीति।
तदपि सोहनी तोहि में, बाढ़त मेरी प्रीति॥१३॥

रसिक सहचरी करन कौ,पायौ तुमने प्यार।
तेहि मद माती चलत हौ, नीति अनीति बिसार॥१४॥

याही सौं प्यारी लगौ, जदपि करत विपरीत।
छकन छकी रति केलि की, सुन सहचरी मुख गीत॥१५॥

अहो सोहनी मोहिनी , सर्वोपरि यह प्रीति।
यह रस मादक है जहां,तहां न नीति अनीति।।१६।।

यह रज, यह गति , यह रहनि, यह सुहाग यह भाग।
देहु सोहनी करि कृपा ,यह अपनौ अनुराग।।१७।।

तुम मेरे हाथन परौ, मो मन तुम तन माहिं।
एकमेक ह्वै सोहनी,चरण रेणु बिलसाहिं।।१८।।

मैं रज मिलि रज हौऊँगी, तुम जु बुहारौ आय।
तुम मोहि ठेलत चलौगी,मैं तुम सों लपटाय।।१९।।

प्यारी प्रीतम चरण रज,दुर्लभ देहु मिलाय।
धन्य धन्य वे रसिक जन,मन तन कुञ्जन आय।।२०।।

अहो सोहनी मम हृदय,रहै तोहि लपटाय।
तुम्हें हाथ लै सोहनी,भवन बुहारत गाय।।२१।।

या तनहू में प्रीति सों,तुम ही कों दुलरात।
श्री बन वीथिनु रमत हैं,लिये सोहनी हाथ।।२२।।

तिन चरणन में सोहनी,देहु प्रीति अति मोहि।
हित भोरी यह आस धरि,दिन-दिन सुमिरों तोहि।।२३।।

हितोत्सव की बधाईयां

४३६

आवहु ललिता आजु बधाई जु गाईये,
मेरे प्रान के प्रान लड़ैती लडाइयै।
लावहु साजि समाज सखी सब सोहनी,
बलि-बलि प्रीतम लेहु मुरलिया मोहिनी।।
यह मो जीवन मूरि सखी हित-रूपिणी,

सकल सार कौ सार अधार स्वरूपिणी।
यह मो अँखियन ज्योति हृदय सम्पुट मनी,
सुख सम्पति सर्वस्व हमारे धन-धनी।।
यह ह्वै वँशी लेत अधर पिय स्वाद कौं,
धुनि ह्वै मम श्रुति पैठि करत उन्माद कौं।
पोषत वृंदा रूप लता तरु-बेलि कौं,
ह्वै हित सजनी हमें सिखावत केलि कौं।
कोटि प्राण यह एक अनेकन वपु धरै,
परम प्रेम सौं तोषि-तोषि हियरा हरै।
याके गुण जु अपार , कोटिक मुख क्यों कहौ,
मीन जलधि की थाह दीन कैसे लहाँ।
याके बल हम जियें, जिवाबनहार ये,
याही कौ सब खेल खिलावनहार ये।
याकी सकल विभूति अनूपम धाम ये,
याकी सब रस-केलि परम विश्राम ये।
याके बल सब रास विलासन हम करैं,

याकी भुज अवलम्बी सुरत-सागर तरै।

यही डुबावै प्रेम, उछारै केलि में,

आप एक रस रहै उभय रस झेल में।

यह जल हम हैं मीन सदा ज्याये जियें,

यही प्यास यह नीर पिवावै ज्यों पियें।

याही कौ ब्रत एक हमारै जानिये,

दोउन हिय की सार परम निधि मानिये।

हम याके आधीन सदा रुख लै रहैं,

जाकौ यह दै देइ सु ताके ह्वै रहैं।

जहँ याकौ सम्बन्ध रंच हू देखिये,

तहँ पहिले आधीन जुगल हम लेखिये।

याके तन-मन-प्राण, प्राण की प्राण हौं,

यह मो तन-मन-प्राण सखी साँची कहौ।

मेरे हित अवतार अवनि इनने लियौ,

मोसौं लै निज-मन्त्र प्रकाशित जग कियौ।

धन्य-धन्य बलि जाऊँ द्योस यह चन्द कौ, उदय आज हरिवंश

रसिक रस कन्द कौ।

धन्य-धन्य यह मास गही हित टेक ही,

राधा माधव नाम युगल वपु एक ही।

बलि-बलि ग्रह-तिथि-पक्ष-ऋक्ष ओ पलघरी,

मेरे मन की साध सबै पूरन करी।

छिन-छिन बाढ़ै उमंग हृदय नहिं माय री,

रोम-रोम रस-सिन्धु अधिक अकुलाय री।

तुङ्ग तुरंगन परयौ न चित ठहराय री,

प्रेम-प्रवाह अथाह बह्यो सो जाइ री।

कहत-कहत तनु कम्प पुलक गद-गद भई,

स्नेह-सलिल दृग दौरि सखी भुज भर लई।

काहे होत अधीर कहौ बलि हीय की,

तुम जु प्रिया अवलम्ब हमारे जीय की।

बढतौ जान्यौ सोच भुजा ललिता गई,

कहा अनमनी होत आजु, हँसि कै कही।

श्री हरिवंश सु जन्म द्योस उत्साह सौं,

अपने हिय की बात कहौ जु उमाह सौं।
सत्य-सत्य सुन सखी बात तोसौं कहौ,
लेय जु याकौ नाम ऋणि ताकी रहौं।
याकी तन की वायु परसि जाकौ करै,
बलि-बलि ताकी जाऊँ जु पद-रज सिर धरै।
जिनकौ यासौं हेत मोल मोहि तिन लई,
जाकौं चाहैं देंय जु तिन कर बिक गई।
ता मुख की बलि जाऊँ जु नाम सुनावहीं,
सर्वस ता पर दैऊँ जु हित गुण गावहीं।
याके भजतन भजै , भजै पुनि ताहि जो,
सर्वोपरि सब भाँति हमारै आहि सो।
ज्यों-ज्यों सरिता नीर जु नीचौ जावहीं,
त्यों-त्यों गहरौ होय पार को पावहीं।
तैसे यह हित-हेत सदा बढतौ रहै,
बलि-बलि ताकी जाऊँ सरण हित की गहै।
हम दोऊ तन-मन-प्राण एक ही जानिये,

दुहुँन प्राण कौ प्राण व्याससुत
मानिये।

छाँड़ि खेल कौ भाव प्रगट जब यों कही,
तब प्रियतम हू उमगि सखि कीन्हीं सही।
हाँ ललिता यह सत्य-सत्य उर आनिये,
हम तन मन हिय जीय यही निधि जानिये।
हम अधनी धन-धनी यही दातार हैं,
अति उदार रिझवार खुले दरबार हैं।
जहाँ नाम हरिवंश प्रिया तहँ देखिये,
प्यारी हू ते प्रथम मोहि तहँ लेखिये।
दै जु अचल विश्वास दृढ़ाऊं प्रीति में,
अपने बल लै आऊँ खेंचि रस-रीति में।
भूलि स्वप्न हूं माँहिं शरण हित की गहै,
झूठी साँची होय सु दुर्लभ गति लहै।
सुनि फूली ललितादि बलैयां लेत है,
चिरजीवौ हरिवंश असीसै देत है।

अटल होय तुव राज जगत सब उद्धरौ,
भोरी हू से महा पतित पावन करौ।
जय-जय ध्वनि ह्वै रही, सकल लोकन छई,
सुनि हित भोरी दौरि , शरण हित की लई।
प्यारी जु की प्रीति कही क्यों जावही,
बून्द दिखाये सिन्धु न हियरे आवही।

४३७

अहो चलि देखौ री रसिकन नैन लाल रँगिली व्यास कौ।
अहो तन मन आनन्द दैन, लाल रंगिलौ व्यास कौ।।
सार रूप के रूप कौ, यह रस के रस कौ सार।
दम्पति हिय सुख-सार कोई यह अद्भुत प्रगट्यो प्यार।।लाल०।।
मो आँखियन की आँख यह, हिय के हिय कौ सार।
तन मन कोटिन प्राण बलि, जाके दैऊँ नाम पै वार।।लाल०।।
नेह सलिल दृग डहडहे , जाके बरसत प्यारी-पीय।
रोम-रोम अमृत झरैं, मेरौ सहज जिबावै जीय।।लाल०।।

गोरी की सब गौरता, अरु श्याम श्यामता सार।
दोउन हिये के हेत की, निधि प्रगटी मेरे लार।।लाल०।।

प्यारी कौ जु सुहाग पिय, प्यारी पिय कौ भाग।
दुहुँन भाग कौ भाग मेरे, जगमग सीस सुहाग ।।लाल०।।

छिनु-छिनु में रस सिंधु की, लहरिनु उमड़त रँग।
दम्पति जीय जीवाबनी, सुधासार सब अंग।।लाल०।।

देखत ही देखत दृगन, लगत और ही और।
उलहत छवि सौं छवि नई, ललित मनोहर गौर।।लाल०।।

कोटि विश्व की माधुरी, महा सार कौ सार।
सार-सार में नित नयौ, नैन न पावै पार।।लाल०।।

देखत अन देखौ लगै, हेरत हियौ हिराय।
मधु मादक मूरति मधुर, झलकन मति बौराय।।लाल०।।

मृदुता पग चूमत डरै, छवि दूरहि सौं बलि जाय।
सरस् सुदीठ स्नेह की, परसत जीय डराय।।लाल०।।

सुन्दरता सब विश्व की, करि कोटि गुनी अनुमान।
नहिं जोग निछावर रोम की, कहँ तुच्छ जु मेरे प्रान।।लाल०।।

मो मन मोहै सीस सुठि, अरुण जरकसी पाग।
परयौ पेच में पेच मन, पिय प्यारी अनुराग।।लाल०।।
कुञ्चित कोमल कुटिल लट, रुचिर मनोहर श्याम।
अलिकुल व्याकुल ह्वै चल्यो, पद-पंकज तकि ठाम।।लाल०।।
उन्नत भाल विशाल पर, सोहत टिलक ललाम।
ता मधि नाम जु राधिका, सेवत बैंदी श्याम।।लाल०।।
ललित भौंह सोहै बनी, पत्रावली सुरंग।
मानहुँ काम कमान ढिंग, कुसुमन कौ जु निषंग।।लाल०।।
अरुण श्याम सित चखन पै, पियौं जु पानी वार।
हित पिय-प्यारी सहज ही, मिले रहत अति प्यार।।लाल०।।
जलधि सरस् उमड़े रहैं, करुणा तुङ्ग तरङ्ग।
जलधर लौं बरसैं सदा , गौर श्याम विवि रङ्ग।।लाल०।।
इन नैनन सौं होय जब, जिन नैनन कौ मेलि।
तब सूझै वृंदा विपिन, कुञ्ज माधुरी केलि।।लाल०।।
एकमेक ह्वै कै रहौ, इन नैनन मो नैन।
श्री वृन्दावन हित माधुरी , अवलोकौं दिन रैन।।लाल०।।

विलग जो इनते ह्वै रहैं, ते अँखियाँ जरि जांय।
वस्तु न देखैं आंधरी, नित भव-पीर पिरांय।।लाल०।।
वारौं रुचिर कपोल पर, कोटि आरसी मंजु।
अति अब्दुत झलकत जहां, नील-पीत विवि कंजु।।लाल०।।
अलक लड़े हित लाडिले, दुहुँ दिस लिये उछंग।
प्रिया दाहिनी, वाम पिय , छवि बरसत अंग अंग।।लाल०।।
गौर-श्याम छबि सिंधु दुहुँ, अति अगाध लहराहिं।
प्रतिबिम्बित मिलि परस्पर, हित अंग-अंगनि मांहि।।लाल०।।
कैं राजैं हित गोद यह, कै हित हियरे मांहिं।
हित दृग हित की दीठ बिनु, देखि सकै कोऊ नाहिं।।लाल०।।
बेसर में मोती नचें, सो कैसे ठहरांय।
विवि विधु मुख छबि रँग-रँगै, ललकि-ललकि
लुभियांय।।लाल०।।
अरुण अधर की ज्योति मिलि, उज्ज्वल हाँसि सुहात।
विवि मुख कमलन पै छई, रवि किरणें जनु प्रात।।लाल०।।
चारु अंस ग्रीवा ललित, गौर श्याम तहाँ वाहि।

नील पीत कमलन मई, माला पहिरी आहि।।लाल०।।
भुज विसाल जु मृणाल जुग, सोहत ललित ललाम।
जिन बिच फूले कमल द्वय, गौर श्याम अभिराम।।लाल०।।
बलि-बलि हित के हृदय की, प्रेम पयोधि अपार।
भीतर बाहर लसत जहां, हित जोरी सुकुमार।।लाल०।।
त्रिभुवन में उपमा जिती, लौटत उल्टे पाँय।
परम सूक्ष्म कटि-भाग लौं, कोऊ पहुँचत नाँय।।लाल०।।
पृथु नितंब रंभा जघन, पद-अंबुज गज चाल।
कोटि मदन मन मोहिनी, वैस किशोर रसाल।।लाल०।।
प्यारी पिय अनुहार सब, रूप रङ्ग अँग अङ्ग।
उमड़त रोमनि रोम में, पिय प्यारी कौ रङ्ग।।लाल०।।
श्री हित-सिन्धु अथाह है, पिय प्यारी जु तरङ्ग।
रोमनि रोम झरे परै, उमंगि युगल इक्र सङ्ग।।लाल०।।
अति जु सूक्ष्म रोमावली ,उपमा क्योँ कहि जाय।
जनु निज हित की सूक्ष्मता, प्रगट विराजी आय।।लाल०।।
नख-सिख लौं यह माधुरी, रमौ जु मो दृग माहिं।

या छबि सौं बिलगाइकै, मो दृग अनत न जाहिं।।लाल०।।

इन नैनन नैना मिलौ, हिय में हिय रह्यौ भोइ।

भीतर बाहर एक रस, हित गौर-श्याम तहाँ दोइ।।लाल०।।

तब लौं जीवन जिन गनों, बीतत काल वृथाहिं।

हित चरणन की सरन में, जब लागि आवत नाहिं।।लाल०।।

दृग सोहै देखौं सदा, लिये गोद दोऊ लाल।

कै हित दृग हित हृदय में, देखौं केलि रसाल।।लाल०।।

जियौं तौ ऐसे ही जियौं, देखत निमिष विसारि।

मरौं तौ या छवि पै मरौं, प्राण निछावर वारि।।लाल०।।

बरस-गांठ रीझन यही, जांचों गोद पसार।

भोरी हित बलि बकसियौ, हित रिझबार उदार।।लाल०।।

ग़ज़ल बधाई

४३८

अनूठा आज मङ्गल है चलौ मिलि व्यास घर आली।

कुँवरि कीरति ओ नन्दलाला, हुए हितरूप धरि आली।।

मिटी अब मैड वेदों की बही सब लोक की लज्जा।
चढ़ा है प्रेम का दरिया , उमड़ता जोर पर आली।।
अजब वह चाँद सा मुखड़ा, गजब मुस्कान जुन्हैया सी।
कि तन-मन होवै मतवाला, जु देखै भर नज़र आली।।
जुगल मन हित के साँचे में ढली कञ्चन सी यह मूरति।
कि हौं कन्दर्प न्यौछावर चरण-रज चूम कर आली।।
उमड़ता रोम-रोमों में अजब दरिया है लावन का।
बरसता प्रेम का झरना लगी करुणा की झर आली।।
हमें यह राधिकावल्लभ सदा देने को आया है।
करम का, काल का, मेटा सभी माया का डर आली।।
जु रोमनि रोम हौं आँखियाँ जु देखै एक टक कोई।
न हो इक रोम, छबि पूरी हज़ारों कल्प भर आली।।
अभी कुछ और फिर कुछ और , फिर कुछ और छिन-छिन में।
जभी देखौ नई मूरत, नया लावन का भर आली।।
ये धनि-धनि मास माधव की उजारी धन्य ग्यारस है।
ये धनि-धनि जन्म का उत्सव, सभी रसिकों के घर आली।।

पड़ी द्वारे पै हित भोरी नज़र भर देख लो मुझको।
यही दो रीझि, तन-मन-प्राण वारु पावँ पर आली।।
हुआ है जग में उजियाला, हुआ रसिको का भूपाला।
यही वृषभान की बाला, यही है नन्द का लाला।।
यही मोहन की वंशी है, यही राधा प्रसंसी है।
यही रस-सर की हंसी है, यही दम्पति की उरमाला।।
यही नव कुञ्ज की केली, यही अनुराग की बेली।
यही राधा की निज चेरी, यही मोहन की प्रतिपाला।।
रसिक रस प्राण भी ये ही, मनावँ मान भी ये ही।
करै हित दान भी ये ही, सदा निज दीन जन पाला।।
खिलारी खेल मतवारे, खिलौना खेल के प्यारे।
यही है खेल श्री बन का, खिलाने खेलने वाला।।
यही हित प्यास का सागर, यही हित प्रेम का पानी।
यही हित प्रेम का दाता, यही हित प्रेम मतवाला।।
रसिक घर-घर बधाई है, भली तिथि आज आई है।
छटा हित प्रेम की छाई, कि कलि-कल्मष को धो डाला।।

रसिक जन भाग जागा है, जुगल अनुराग पागा है।
ये मांगे रीझि हित भोरी, कि मेटौ मोह-जंजाला।।

४३९

सुन्दर अनूप छबि है श्री व्यास जू कौ लाला।
नख चन्द्र जिसकी चाँदनी , त्रिभुवन हुआ उजाला।।
नव कुञ्ज नित बिहारी दोनों का हित अपारा।
उमड़ा प्रवाह आली सम्भला नहीं सम्भारा।।
दोनों के हिय में भरि कै सखियों को रँग में बोरा।
समाया न कुञ्ज बन में वह भूमि पर हिलोरा।।
अवनी का भाग जागा, घर-घर बजी बधाई।
सो वर्षगांठ आली हित जू की आज आई।।
हित से बरसि बहा फिर, होकर के हित की वाणी।
चौरासी अरु सुधानिधि , फुटकर सुनों प्रमानी।।
मही बोरता चला जो रस की हिलोरें खाता।
रसिकों को दे रसिकता , साधन का गुण डुबाता।।

है नाद -बिंदु धारा द्वै रूप में बहा है।
हित सो प्रभाव अब भी जग में छा रहा है।।
है आज ही का वो दिन रस रीति जग में आई।
अद्भुत सु आज मङ्गल , तिहुँ लोक धूम छाई।।
रसिकों की शुभ सभा है, आनंद उमंग फूली।
हित माधुरी की मूरति हित के स्नेह झूली।।
हित भोरी यों असीसैं रस रीति यह अचल हो।
जग तारने को हित के, दोनों ही कुल अटल हौं।।

होली

४४०

हिलमिल एकहि भाय, रसिक रस होली खेलें।
दोऊ रँग दोऊ पिचकारी, दोऊ मेलत धाय।
दोऊ बरसैं दोऊ भीजैं, दोऊ तन पुलक चुँचाय।।
दोऊ मादक दोऊ घूमैं, पी-पी मन न अघायँ।
दोऊ रीझि-रीझि हित भोरी, दोउन पै वलि जायँ।।

४४१

धमार

मम दृग बरसत रँग, उमगि दोऊ होरी खेलें।
गौर श्याम मिलि अँग, उमगि हित फागुन खेलैं।।
सागर रस लहराय , उमगि। पलकनि में न समाय उमगि।
श्री हित सेज सुदेस, उमगि। भरे प्रेम आवेश , उमगि।
बरसत लोचन कोर, उमगि। दोऊ में दोऊ सराबोर , उमगि।
भरन भुजन अति गाढ़, उमगि। छिन-छिन रस की बाढ़, उमगि।
पानिप पानी रँग, उमगि। पिचकारी अँग-अँग , उमगि।
कुच कुम-कुम की मार, उमगि। मची मदन रन रारि, उमगि।
नहिं तन बसन संभार, उमगि। विलुलित छूटे बार, उमगि।
मत्त रसासव स्वाद, उमगि।
चढयो प्रेम उन्माद, उमगि।
नहिं तहँ श्याम न गौर, उमगि। छिन-छिन औरहि और, उमगि।

छिनहि एक छिन दोय, उमगि।हित निधि मथत विलोय, उमगि।

हित सागर मित नायं ,उमगि।महा मत्स्य न समांय , उमगि।

उरझि-उरझि उरझात, उमगि।अदल बदल ह्वै जाय , उमगि।

अंगनि-अंग सिंगार, उमगि अंगनि-अंग आहार, उमगि।

झलकनि हित की बूंद , उमगि।पुलकि पलक दृग मूँदि, उमगि।

उर सौँ उर मिलि पेलि, उमगि।

रस की ठेलम ठेल, उमगि।अधर-अधर मिलि जात,

उमगि।दामिनी दसन उदाति , उमगि।

मोती मूँगन सँग,उमगि।विलसत अपने रँग, उमगि।

उरज कमल पर आय, उमगि।रहे कमल पर छाया, उमगि।

दोऊ दिसि कमलनि माहि, उमगि, नख ससि दीसत नाहिं,

उमगि।

अँग-अँग अद्भुत जोति , उमगि।ज्योति-ज्योति सौँ खेल , उमगि।

रस की रस में रेल, उमगि।रस की रस सौँ झेल, उमगि।

झूलत सुरत हिंडोर, उमगि।मचकत जोवन जोर, उमगि।

झोटा तरल झकोर, उमगि।बढ़त उरप दुहुँ ओर, उमगि।

विरम-विरम मुख बात, उमगि।पुलकि-पुलकि लपटाय, उमगि।

जल में जल एकमेक, उमगि।को करि सकै विवेक, उमगि।

श्यामल गौर तरँग , उमगि।प्रेम जलधि एक रँग, उमगि।

घुमड़ि-घुमड़ि इक भाइ, उमगि।स्वेद फेन झलकाय, उमगि।

नीलम कनक खचाई, उमगि।जनु मोती दिये छाया, उमगि।

तन मन प्राननि प्रान , उमगि।डूबि-डूबि उछरान, उमगि।

एक होय अकुलायँ, उमगि।विलग होय पछितायँ , उमगि।

मिले रहँ दिन रात, उमगि।मिलिवै को अकुलात, उमगि।

मिले मिलन ललकाहिं, उमगि।मनहुँ मिले ही नाहिं, उमगि।

बीते कल्प अपार, उमगि।इक रस करत बिहार, उमगि।

भई न तौहू चिन्हार , उमगि।अद्भुत मूरति प्यार, उमगि।

नित नव दुलहिनि बाल, उमगि।नित नव दूलह लाल, उमगि।

नित नव सँग कराय, उमगि।अंगनि-अंग मिलाय, उमगि।

लाड़त हित लै हीय, उमगि।तदपि चैन नहिं जीय, उमगि।

प्यास ललकि जल होय, उमगि।पियत प्यास ही सोय, उमगि।

दोऊ सागर रँग, उमगि।नहिं जल तहँ न तरँग, उमगि।

उमड़नि-घुमड़नि क्षोभ, उमगि।दोऊ लोभ ही लोभ , उमगि।
सो इक घुमड़ उमंग, उमगि।गौरश्याम विवि रँग, उमगि।
प्यारी प्रियतम रूप, उमगि।प्यारौ प्रिया स्वरूपः, उमगि।
प्यारी पीय न कोय, उमगि। हित विलसत वपु दोय, उमगि।
तामें सहज मिलाप, उमगि।सहज विरह की ताप, उमगि।
पान छकन रस स्वाद, उमगि।चाह ताप उन्माद, उमगि।
काल क्रिया क्रम नायं, उमगि।कहत कह्यौ नहिं जाय, उमगि।
सकल अँग भये नैन , उमगि। देखत पलक परै न, उमगि।
गये कल्प यों बीत, उमगि, नहिं दरसन परतीति, उमगि।
ललकि-ललकि अकुलाय, उमगि।मनहुँ मिले ही नाय, उमगि।
अँग-अँग की यह रीति, उमगि।विरह मिलन परतीति उमगि।
प्यासे पियें न अघाहिं , उमगि।प्यासे रहत सदाहिं, उमगि।
पियत प्यास कौ प्यास, उमगि।कहा तृप्ति की आस, उमगि।
हित मादक उन्माद, उमगि।अति अब्द्रुत रस स्वाद , उमगि।
अति तीखौ अति मिष्ट, उमगि।अति पैनों अति इष्ट, उमगि।
किरचि-किरचि करे हीय , उमगि।अतिहिं जुड़ावत जीय, उमगि।

बढ़त फूल में फूल, उमगि।तन-मन की तहँ भूल, उमगि।
भूल फूल कौ खेल, उमगि।फूलि-फूलि रस झेल, उमगि।
यह हित अँखियन खेल, उमगि।नहीं काम-रस केलि, उमगि।
नहीं वर वधु न कोय, उमगि।हित दृग तारे दोय, उमगि।
हित दृग सागर रँग, उमगि।उमड़त तुंग तरंग, उमगि।
हित के हिय कौ प्यार, उमगि।हित कौ लाड़ अपार, उमगि।
हित ललकन हित प्यास, उमगि।हित कौ सुरत विलास, उमगि।
हित सिज्या हित धाम, उमगि।हित के आठों याम, उमगि।
हित आत्मा हित प्राण, उमगि।हित बिनु तहँ नहिं आन , उमगि।
हित कौ हित आवेश, उमगि।नहीं प्राकृत कौ लेश, उमगि।
श्रीहित कृपा जु होय यह, उमगि।यह रस समझै सोय, उमगि।
हित ही हित के दृग होय , उमगि।और न परसै कोय, उमगि।
विधि हरि-हर ललचाहिं, उमगि।तिन उर आवत नाहिं, उमगि।
निगम अगोचर रीति, उमगि।सर्वोपरि हित प्रीति, उमगि।
सो हित भोरी गाइ, उमगि।कृपा कोर बलि जाइ, उमगि।

स्फुट-पद

४४२

श्री वृन्दावन तोहि करूँ परनाम।

रँग भरी केलि करत जहाँ नित-नित, रँग भरे श्यामा-श्याम।

रँग भरौ यमुना तीर सुहायौ, रँग भरे राजत धाम।।

रँग भरे कुञ्ज लता तरु पल्लव, शोभा अति अभिराम।

रँग भरे खग रँग भरे द्रुमन पै, टेरत राधा नाम।।

रँग भरी ललित रागनी गावत, रँग भरी सहचरी वाम।

भोरी हृदय रँग में बोरौ, देहु प्रीति निष्काम।।

।।दोहा।।

४४३

मृदुल मूर्ति सुकुमार अति, दीठ छुअत कुमहलाय।

देखै बिना न जी सकौं, देखत जीय डराय।।१।।

सुख आपनौ चाहै नहीं, यही प्रीति की रीति।

पै बिच लोचन लालची, बरबस करत अनीति।।२।।

बीतत जो मो जीय पै, सुनि दुख पैहौ हाय।

कह न सकौं ना सह सकौं, चुप हू रहौ न जाय ॥३॥

श्री यमुना के नीर लौं, दिन-दिन आपहि आप।

थिर न रहौं व्याकुल बहौं, सूखत हौं चुपचाप॥४॥

अंगन अंग मिलाइ कै, इकठां बैठिय जोय।

पै हिय सौं हिय बिनु मिले, शत योजन बिच होय॥५॥

ना काहू सौं बोलिबो, ना कोई व्यवहार।

अपनी कुँवरि कृपालु कौं, जियत निहार-निहार॥

४४४

राजी रहौ हँसौ ही मुख छवि नहिं तुमसौं कछु चाहिये।

जी देकर जी के सुख दुख की चरचा किस मुख कहिये।

हिय कौ दरद छिपाये हिय में मुख मूँदे सब सहिये॥

जहँ कोऊ देखै सुनै न जानै तहँ कहूँ बैठि करहिये।

हित भोरी मुख कमल माधुरी, सदा सराहत रहिये॥

४४५

ह्वै है कब चैन, जब देखौं भरि नैन।

जब राखौं भरि नैन, कैंधौं नैन करि राखौंरी॥
ह्वै हैं दोऊ नैन, तब पै हौं क्यों चैन।
तब देखे बिनु नैन, तृषित व्याकुल अभिलाखौंरी॥
जब ही बिलगाउँ, तब मिलिबे अकुलाऊँ।
जब रस ही ह्वै जाऊँ कहा स्वाद जाहि चाखौंरी॥
मिलेहु मिलत न पलहू बिलगात नहीं।
बलि भोरी हित रूप, जापैं बारि प्राण नाखौंरी॥

४४६

कबहुँ-कबहुँ मन में यों आवै क्यों अभिमान न करिये।
अपने प्रभु की ओर देखि टुक त्रिभुवन क्यों न निदरिये॥
नहिं गुण नहिं बल भागन वैभव सान संक उर धरिये।
आप समान आन नहिं देखौं फूली गरब जु मरिये॥
गुण मेरी हरिवंश लाडिलौ जाकी ज्योतिन बरिये।
बलि मेरो हरिवंश लाडिलौ गरजत काहु न डरिये॥
जगमगात हरिवंश भाग मम सकल सोच परिहरिये।
वैभव अति अपार हित दम्पति विलसि विलसि मुद भरिये॥

फिर आवत हिय यों नहिं बकिये निपट गरीबी ढरिये।
हित भोरी हित बपु जु दीनता सपनेहु सो न बिसारिये।।

४४७

कौन प्यास तृप्ति रूप, कौन तृप्ति प्यास मई।
प्रेम कौ अनूठो खेल कैसे हिये लाइये।।
कौन विरह मिलन रूप, विरह रूप मिलन कौन।
विरह मिलन एक जहां कौन स्वाद पाइये।।
कौन प्रिया पीय रूप, प्रिया रूप पीय कहाँ।
प्रिया-पीय एकमेक कैसे कै मिलाइये।।
जुगल हीय कुञ्ज जहाँ जुगल केलि होत तहाँ।
जुगल हृदय वृत्ति होय कैसे के लडाइये।।
मनहूँ न आवै जौन बुद्धि हू न पहुंचे जहाँ।
अद्भुत हित रूप हहा भोरी कैसे पाइये।।

४४८

कौन रूप कौन रँग कौन शोभा अङ्ग-अङ्ग,
माधुरी अपार ताहि रंचकौऊ जानैना।

लाडिली कौ रूप लाल प्यारो नित्य देखै ताहि,
बीते किते कल्प तउ देख्यौ नेकु मानैना।।
लाडिले कौ रूप त्योंही लाडिली न पावै थाह,
कुञ्ज की निकाई भूले दोऊ कोऊ छानैना।।
हित कौ स्वरूप: जहाँ देखिये न पार कहूँ,
देखै भरि नैन सोतौ काहू कौ पिछानैना।
भोरी बलिहार मोपै कीजिये कृपा की कोर,
यही सोच नैन यहाँ आजु लौँ हिरानेना।।

४४९

प्यारी हौँ तेरी भौहैं देखि डरात।
सहज सुभाव सामुहे देखत, बिनु कारण सतरात।
कुटिल कटाच्छ बाण तीच्छन जुत, ज्यों कमान झुकि जात।।
मेरे हिय के सन्मुख हा-हा , विकट तकत हँ घात।
मन मेरौ भय बिकल पखेरू , देखि निपट घबरात।।
उड़न चहत उड़ जाय न डर सौँ, चैन नहीं दिन रात।

तबहीं तौ कछु धीरज आवै, जब तैं मृदु मुसिकात।।
यह रस सुधा पान कौं ललकत, मेरौ मन अकुलात।
हा हरिवंश कृपा कब करिहौ, हित भोरी बलि जात।।

४५०

छूटी लट अब तैं न सम्हार।

जैहै उरझि अरी दृग तेरे अब्दुत रूप निहार।।
इनके फंद परयौ कई निकसै श्याम सरीखे बार।
तासों विनय मान लै मेरी तोपें पियों जल वार।।
तैं अति भोरी लाड़ लड़ैती यातै अति रिझवार।
हौं अति सुभग बनाऊँ इनकौ रचि-रचि गूंथि सम्भार।।
कब यह भाँति कहौ कछु बातें नव-नव युक्ति बिचार।
हँसि-हँसि सेवा देहु किशोरी नव निकुञ्ज सरकार।।
तन-मन अति अकुलात लाड़िली हौंसन मरत गंवार।
भोरी हित अब आस रावरी ठाड़ी गोद पसार।।

४५१

रैन अँधेरौ श्याम घन ढूँढ़त श्यामा श्याम।

कौन भाग भटकत फिरौं श्री वृन्दावन धाम।।
श्री वृन्दावन धाम चुबत दृग अँसुवन धारा।
खगमृग पुलकित वृक्ष उमगि जब करहुँ पुकारा।।
खगमृग पुलकित वृक्ष उमगि ढिंग लैहौं टेरी।
भोरी हित केहि भाग सघन बन रैन अंधेरी।।

४५२

रैन अँधेरी मेह झर पवन चलत झकझोर।
नौका टूटी राखियौ हित हरिवंश किशोर।।
हित हरिवंश किशोर बोझ पापन कौ भारी।
भवनिधि ओर न छोर शरण करुणानिधि तेरी।
भोरी हित तट दूर मेह अरु रैन अँधेरी।।

४५३

सब कोऊ हँसत हमें हित प्यारे।
तुम किन हसौ छिनक ह्वै सन्मुख रसिक सभा रखवारे।।
इन्द्रिय हँसत हँसत पुनि देही विषय देत दुख भारे।

मन खल हँसत हंसावत चहुँदिशि दया न नैक विचारे।।
मीच हँसत लखि विषय भुलानौ जम हँसि बाँह पसारे।
सब जन हँसत निलजता देखत कुल की मैड विसारे।।
तियगन हँसत चलावत भौंहन भरि अभिमान निहारे।
जनु यह कहत जगत हम जीतौ यह खेल कौन उवारे।।
त्रिभुवन विजयी सुभट कुसुम सर हँसत चाँप टँकारे।
हारेहू पग परत न मानत तकि-तकि बानन मारे।।
डूबत भव जग जुरौ त्माशौ सब कोऊ हँसि किलकारे।
तरसत तऊ तुमहिं देखन कौं हँसि बरसात सुधारे।।
सब जग हँसत देखि हिय फाटौ प्रफुलित हँसत तुम्हारे।
सो मृदु हास स्वप्रेहु दुर्लभ ऐसे भाग्य हमारे।।
ऐहो परम कृपाल लाडिले पोच निबाहन हारे।
भोरी हित क्यों न अब उमगत व्यास भवन उजियारे।

४५४

जब जब ऐसी बात सुनत हौं तब तब हियरा अधिक डरावै।

कनक कामिनी में मन जौलों तौलों श्याम न हिय में आवै।
में मन बैठि बहुत सोचत हों कनक कामिनी कौन छुड़ावै।।
जो यह बात बनै न तुम सों तौ हम पै कैसे बनि आवै।
कनक कामिनी ग्राह ग्रसित ग़ज़ माया सर बूड़त घबरावै।।
निज उद्यम जो छूटि सकै तौ शरण-शरण क्यों टेर बुलावै।
निबल मन्दमति पामर पापी अति भयभीत जु टेरि लगावै।।
कनक कामिनी जीति कौन विधि कहों नाथ सो तुमहिं रिझावै।
डूबत मध्य भौर सों कैसे सिन्धु पैर तुम ढिंग तट धावै।।
जदपि दवार चहुँ दिशि व्यापी बिनु पर पँछी क्यों जु उड़ावै।
तुम राखौ तौ मारि सकै को तुम त्यागौ तौ कौन जिबावै।।
तुम सिरमौर सबल सर्वोपरि तुमसों बड़ी न कोऊ दिखावै।
तुम आवौ हिय कौ बलि रोके तुम पकरौ भुज को छुटकावै।।
कनक कामिनी कहा बिगारैजो कृपाल जनकों अपनावै।
माया कौन अभाग कहाँ कौ कौन नियति को कर्म कहावै।।
तनक कृपा कोरनि अवलोकनि छिन में कोटि विश्व तरिजावै।
तुम जु रुकौ डरपौ सकुचावौ तौ अब कौन जु पार लगावै।।

तुम समर्थ हरिवंश शीश पै हित भोरी सब भय बिसरावै।
परी रहत द्वारे धरि आसा डरत न कौन कितौ डरपावै।।

४५५

श्रीहित दम्पति रँग रँगिले रसिकनि की बलिहारी हौं।
श्रीहित चरण उपासक जन के चरण कमल पर वारी हौं।
हित हरिवंश नाम जे सिमरत तिन दासन की दासी हौं।
हित भोरी हित बिंदु नाद कुल कृपा कोर की प्यासी हौं

४५६

जे हित गिरा माधुरी छाके प्रेम सुधा मतवारे हौं।
जे हित कृपा कोर पै बारे तन मन जीवन हारे हौं।
जे हित धर्म सुनावत समुझत उपदेशत ब्रत धारे हौं।
भोरी हित बलिहारी उनकी जे हित के हितवारे हौं।।
एक बार छवि देखी तिनकों त्रिभुवन तृन सा लागै है।
इस दर का जु भिखारी उससे सब जग भिक्षा मांगै है।।

जो ह्यां का फिर सो न अनत का दम्पति पानिप पागै है।
हित भोरी मतवारा बेसुध सोता सा जग जागै है॥

४५८

श्रीहत नाम बिचारा जबही हियरे हुआ उजाला है।
अब किसके मुंह मांगै याचक हुआ प्रेम मतवाला है॥
आँखों झरै लरी मुतियों की तन पर पुलकि निराला है।
भोरी हित लखि तन-मन भूला पिया जु पानिप प्याला है॥

४५९

अब तौ क्या इस छवि पर बारों यही सोच उर आवै है।
पल-पल रोम-रोम पर तन मन कोटिनु तुच्छ दिखावै है॥
कोटि विश्व इक रोम निछावर तउ संतोष न आवै है।
करना दूर, बनै न मनोरथ भोरी मन पछतावै है॥

४६०

कृपा की कोर टुक हेरौं बधाई जन्म की प्यारे।
न अब जाचक से मुँह फेरौ बधाई जन्म की प्यारे॥
न माँगू राजपदवी को न चाहूँ स्वर्ग मुक्ति को।

न जांचू द्रव्य बहुतेरौ बधाई जन्म की प्यारे।।
जरा दृग सामने आना जरा आंखों में मुसिकाना।
जरा हँसि अपना कहि टेरी बधाई जन्म की प्यारे।।
ये कहदो अब कि तुम मेरे ये कहदो हँस कि हम तेरे।
अभय कर शीष पर फेरौ बधाई जन्म की प्यारे।।
सदा का अब यह नाता है यही भोरी को भाता है।
न आवै इसमें झकझोरौ बधाई जन्म की प्यारे।।

४६१

कृपा की कोर हित करना बधाई जन्म की तेरे।
मुझे है द्वार पर अरना बधाई जन्म की तेरे।।
निछावर प्राण धन वारूँ पलक छवि देख जो पाऊँ।
बकस दे देखते मरना बधाई जन्म की तेरे।।
उमगती आँखें की कोरे हिलोरें प्रेम की लेकर।
बरसते रोम छवि झरना बधाई जन्म की तेरे।।
ललित ओठों की लाली पर निराली दांत की चमकन।
जरा मुस्काके मन हरना बधाई जन्म की तेरे।।

पड़ी हूँ खाक सी होकर तेरे कूचे में आशा से।
कभी आंखों में पग धरना बधाई जन्म की तेरे॥
सुधा पानिप पिया देना मृतक देही जिया लेना।
कहूँ क्या रीझ भुज भरना बधाई जन्म की तेरे॥
न इस लायक हूँ हा प्यारे कि चरणों से लगा लो प्यारे।
ठरन अपनी मगर ढुरना बधाई जन्म की तेरे॥
बना लेना जु बन पाऊँ न बन पाऊँ निभा लेना।
मगर निज प्राण से मत टरना बधाई जन्म की तेरे॥
मिटादो जग का सुख सपना फिराओ मस्त कर अपना।
उमग दो नाम का रटना बधाई जन्म की तेरे॥
न मेरे पार पापों का न नकों तक मे गुंजाइश।
तेरे द्वारे दिया धरना बधाई जन्म की तेरे॥
न जानौं भाग गति मुक्ति बना कुछ भी न बनता है।
न समझूँ डूबना तरना बधाई जन्म की तेरे॥
तेरे द्वारे की दासी हूँ तेरे पानिप की प्यासी हूँ।
पिला छवि चाहे जो करना बधाई जन्म की तेरे॥

तुही बल है मेरा कहाता दीन क्यों वानी।
बहुत सुन ली उमंग परना बधाई जन्म की तेरे॥
बरस की गांठ है तेरी पसारे गोद हूँ कह दे प्यारे।
कि हित भोरी न अब डरना बधाई जन्म की तेरे॥

ग्रंथ विश्राम